

RICHARDI
 ARCHIEPISCOPI
 ARMACHANI
 HYBERNIÆ PRIMATIS
 DEFENSORIUM. CURATORIUM

Aduersus eos, qui *Privilegiatos* se dicunt, habitum Auenione in Consistorio coram D. Pàpa Innocentio VI. & D. D. Card. ac Prælatiſ, anno Chriſti 1357. nunc recens excuſum iuxta Vetus Exemplar, & ex fide Codicis MS. Bibliothecæ S. Viſtoris PARIS. maiori ex parte auctum, ac diligentiffimè caſtigatum.

Accellit & brevis Præfatio Apologetica.




PARISIIS;

Apud PETRUM BILLAINE, viâ Iacobæâ
 sub ſigno Bonæ Fidei.

M. DC. XXXIII.

c/1



IOANNIS
TRITHEMII
ABBATIS

In lib. de Scriptoribus Ecclesiasticis
testimonium

DE RICHARDO ARCH. Armachano.

Richardus Archiepiscopus
Ardmacensis (Ar-
machanus,) & Primas
Hybernia: vir in diuinis scriptu-
ris eruditus, & secularis philoso-
phia, iurisque canonici non igna-
rus, ingenio clarus: sermone scho-
lasticus: in declamandis sermoni-
bus

bus ad populum excellentis industria. Scripsit ingenij sui nonnulla opuscula, quibus nomen suum ad posteros transmisit. Hic cum aliquando de materia mendicitatis predicaret populo, nouem conclusiones protulit: quibus offensi fratres ordinum mendicantium ad sedem Apostolicam coram plebe appellauerunt. Comparentibus ergo tam Archiepiscopo, quam fratribus in Auinione coram Papa Innocentio sexto, & Cardinalibus, anno Domini M. CCC. LVII. octaua mensis Nouemb. Richardus Archiepiscopus publice protulit, legit, & pronunciauit earundem propositionum suarum lib. I. Nolite iudicare secundum faciem, &c.

*Claruit temporibus Caroli
Imp. quarti, & Innocentijs Pa-
pe sexti, anno Domini M.CCC.
LXX.*

á iij





AD LECTOREM

PRÆFATIO APOLOGETICÆ.



Vm Illustrissimi Richar-
di Radulphi Archiepi-
scopi Armachani Hiber-
niæ Primatis librum pro
Curatorum defensione iterum in
lucem edi viderem, malivolorum
quorundam hominum peruersitas
atque inuidia memoriæ tum pri-
mum occurrit, qui eò temeritatis at-
que impudentiæ deuenere, vt san-
ctissimum illum atque doctissimum
virum hæresiarcharum numero ad-
scribere non dubitarint: vtque id
faciliori negotio hominum animis
persuadere possent, optimum Præ-
sulem miserrimum vitæ exitum for-
titum esse commenti sunt. Atque vt

illam infamiae labem commodius
 eluere possim, prout & patriae meae
 & viri ex ea oriundi innocentiae de-
 beo, ea mihi prius dicenda esse visa
 sunt, quae cum veritatem certissi-
 mam in se contineant, huiusmodi
 calumnias luce clariùs conspicien-
 das exhibere, easque tandem peni-
 tus valeant extinguere. Primum
 quidem in eo mihi nullo pacto ex-
 cusandi esse videtur aduersarij quòd
 propria ac priuata auctoritate,
 absque vlllo Superiorum, quorum
 id refert, consensu, talem tantum-
 que Archiepiscopum, quasi Hæ-
 reticorum partibus studeret, accu-
 sarint, ea solummodo ratione in-
 ducti, quod ipsorum iniustissimis
 in Clerum inuasionibus suffragari
 ac coniuere nollet, sed potiùs, vt
 bonum Pastorem decebat, in eas
 acerrimè inuheretur, sicut illius

scripta pro Curatorum defensione
testantur. Dum verò hunc librum
reprehendunt, non tam Armacha-
ni, quàm Innocentij sexti Pontifi-
cis maximi qui coràm illum recita-
ri voluit, nec non etiam Eminentis-
simorum Cardinalium, quibus il-
lum examinandi Prouincia deman-
data fuerat, nec quiquam de eo de-
terminarunt, doctrinam condem-
nare videntur. Qua quidem in re
quantum sibi huiusmodi homines
assumât atque arrogant facilè cuius
perspicere licet. Ego verò non infi-
cias eam, quin in Armachani quæ-
stionibus de Armenorum erroribus
opiniones quædam reperiantur, quæ
in vtramque partem agitari soleant,
nullum talem doctorem esse arbi-
tror, qui illum hæreseos crimine ar-
guere audeat. Vnus tantum Bellar-
minus illius scripta cautè ac pruden-

ter legenda esse admonet: id quod etiam de Augustino, Cypriano, Tertulliano, aliisque Patribus dici potest, quos tamen nemo vnquam hæreticos esse dixerit, quin statim impietatis reus existimetur, propterea quod illi sua scripta Ecclesiæ iudicio ac censuræ subiacere voluerūt, in quo nunc illos fidelissimus noster Armachanus est sequutus. Verum enim uerò vt manifestiùs rem totam cognoscāmus, quis tandem sanæ mentis hæreticum illum appellarit, quem tota Hybernia velut Sāctissimum suspicit ac veneratur, cuius Natalis dies in celeberrimo Dundalkiæ Oppido, in quo natus est, sūmo cum popularium omnium consensu ac lætitia celebratur, in cuius honorem phanum erexerunt sancto Richardo dicatum in quo fideles Deo Opt. Max. vota quotannis, aut si

minus id per hæreticorum iniuriam
liceat, in priuatis ædibus offerre con-
fueuerunt? Hæc autem omnia à mi-
raculis initium habuerunt, quæ plu-
rima sanctissimus ille Præsul edidit,
è quibus vnum aut alterum in me-
dium proponam, ne hæc à me teme-
rè dicta esse videantur. In eo ipso
Dundalkiæ oppido fons limpidis-
simus etiam hodie conspicitur, vul-
gò sancti Richardi fons dictus, quò
maxima hominum frequentia è tota
vicinia confluit, qui se, postquam sa-
luberrimas illas aquas hauserint, à
febris aliisque morbis quibus cru-
ciantur, liberatum iri confidunt.
Eamdem planè virtutem huius San-
ctissimi Præsulis annulo à Deo con-
cessam credunt: solo siquidem con-
tactu ægros pristinæ sanitati resti-
tuit, ac tanquam sacratissimæ reli-
quiæ in cuiusdam Catholici Dun-

dalkiæ ciuis domo vna cum pedo
 aliisque ornamentis Episcopalibus
 huiusce Sanctissimi viri asseruatur.
 Atque his rebus omnibus tanta inest
 certitudo, vt nemo eas in ipsa vrbe
 in dubium reuocare audeat, quin sta-
 tim populi animos in se concitet,
 adeò firma Præsulis Armachani om-
 nium mentibus inhæret atque infixæ
 est memoria. An verò vlla maior
 atque atrocior cùm Ecclesiasticis,
 tum secularibus afferri potest iniu-
 ria, quàm eos tacitè Idololâtras nun-
 cupare? Neque verò Hibernis tan-
 tum, verùm etiam Bonifacio nono
 Summo Pontifici hæc est illata con-
 tumelia, cuius de Richardo in San-
 ctorum numerum referendo etiam
 hoc tempore Bulla conspicitur, quæ
 in Vaticano asseruatur, cuius exem-
 plar Reuerendus P. V Vadinghus
 Ord. S. Fran. vir doctrina & pietate

in signis Roma in Miberniam ad Re-
uerendiss. Ossorienſem Episcopum
nuper tradidit transferendum. Me-
lius itaque ac tutius ſibi conſulerent
noſtri calumniatores, ſi ſibi ſilen-
tium imperarent, diſcerentque tan-
dem majori cum reuerentia, atque
honore de ſancto illo Præſule &
ſentire & loqui, qui non Ordinis ac
Religionis inſtituta, ſed effrænata
quorundā hominum viuendi, licen-
tiam eſt infectatus: id quod hoc
tempore per multos auctoritate,
virtute, pietate ac doctrina excellen-
tiſſimos viros factitari videmus:



DEFENSORIVM

Curatorum contra eos

qui priuilegiatos

se dicunt.



N nomine Patris, & Filij, & Spiritus sancti, Amen. Incipit propositio Richardi Archiepiscopi Armachani, Primatis Hyberniae, facta in consistorio coram domino Papa & dominis Cardinalibus ac Prelatis ad vtilitatem Cleri & populi Christiani super materia mendicantis ac priuilegiatorum contra fratres de ordinibus mendicantium quibuscumque, apud Aunionem octaua die mensis Nouembris, anno Domini millesimo tricesimo quinquagesimo septimo. Cuius quidem propositionis thema fuit hoc ; *Nolite in-*

A.

dicite secundum faciem: sed iustum iudicium iudicate. Ioan. 7. capit. Pater sanctissime, in principio mei sermonis protestor quòd non intendo aliquid asserere aut temerè affirmare, quòd fidei obuiet Christianæ aut doctrinæ Catholicæ. Quòd etiam non est intentionis meæ destructionem seu quassationem Ordinum mendicantium approbatorum ab Ecclesia aut à summis Pontificibus confirmatorum expetere, aut etiã suadere. Sed potiùs suadebo ipsos ordines debere reduci ad puritatem suæ institutionis primariæ, semper sanctitatis vestræ correctioni paratus. Et vt ad materiam meam statim descendam: ecce, Pater sanctissime, accedens Londonium pro meç Ecclesiæ Armachanæ quibusdam negotijs Doctores aliquos satis doctos super mendicitate & mendicatione Christi Domini Saluatoris nostri ex aduerso reperi disceptantes. Et sæpius inuitatus vt populo prædicarem, septem aut octo sermones ibi protuli in vulgari: & sub protestatione præscripta in publico nouem conclusiones expressi, propter quas, & quæ tunc dixi, fratres ad istam sanctam sedem, licet friuolè, appellarunt. Prima conclusio hæc erat, quòd Domi-

nus Iesus Christus in sua conuersatione humana semper pauper erat ; non quia propter se paupertatem dilexit aut uoluit. Secunda fuit : quod Dominus noster Iesus Christus nunquam spontaneè mendicauit. Tertia erat: quod Christus nunquam docuit spontaneè mendicare. Quarta conclusio erat, siue quartus articulus: quod Dominus noster Iesus Christus docuit non debere hominem spontaneè mendicare. Quinta conclusio erat siue quintus articulus: quod nullus potest prudenter & sanctè spontaneam mendicitatem super se assumere perpetuo obseruandam. Sexta conclusio: quod non est de regula Fratrum Minorum mendicitatem spontaneam obseruare. Septima conclusio erat de materia illa, quod Bulla domini Alexandri Papæ quarti quæ magistrorum libellum condemnat, nullam præmissarum conclusionum impugnat. Octaua conclusio & prima de priuilegiis materia erat ista, quod pro confessione parochianorum alicuius Ecclesiæ facienda cum exclusione loci alterius eligibilior est parochialis Ecclesia, quam fratrum oratorium siue ipsorum Ecclesia. Nona conclusio erat, & secunda

in ista materia, quòd ad confessionem parochianorum alicuius Ecclesiæ vni personæ singulariter faciendam eligibilior est persona ordinarij quàm fratris persona. Has conclusiones, Pater sanctissime, in publicis meis sermonibus, scripturis, & rationibus tanquam probabiles suasi, vt potui, & in præsentì, Deo duce, suadebo. Et etiam declarabo aliqua grauiora quæ inibi tunc non dixi, sicut fratribus ipsis ibi promissi, adijciam in præsentì, Sanctitati vestræ humiliter supplicans & deuotè, quòd conclusionibus ijs prætactis, & rationibus, quas ad eas suadendas adduxi & adducam, attentis, & fratrum collationibus exaduerso, si fratrum rationes fuerint fortiores, sim ego punitus: si verò econtra; ipsi fratres pro scandalis, detractionibus, & conuictijs publicè & occultè mihi per eos illatis, super qua materia malo tolerare quàm agere, legitimè puniantur: obseruato quoad omnia, quod primò assumpsi, *Nolite iudicare secundum faciem: sed iustum iudicium iudicate.*

Sed quia secundum legem Dei atque naturæ, vt in capitulo *Bonæ*, de postulatione, commune negotium priuato præferri debet: à priuilegiorum materia, quæ

totum Clerum & totum populum Christianum concernit, volo incipere. Et dico (vt mihi videtur) quòd si quærat, quis locus est eligibilior pro confessione à parochianis alicuius Ecclesiæ singulariter facienda: videtur mihi quòd sua Parochialis Ecclesia est locus eligibilior oratorio fratrum siue ipsorum Ecclesia: quia est pro conscientia parochiani confessi huiusmodi locus securior & plura vitans incommoda, quàm fratrum oratorium. Quòd Parochialis Ecclesia sit locus securior, vt singulariter, scilicet cum exclusione cuiuscumque loci alterius, ibi fiat confessio, & etiam vt sepultura inibi habeatur, quàm fratrum Ecclesia, suadet. Primo, quia est locus à Deo & lege eius præceptus: dicitur enim Deuteronom. cap. 12. *Hæc sunt præcepta atque iudicia quæ facere debetis.* Et citò post, *Ad locum quem elegerit Dominus Deus vester de cunctis tribubus vestris, vt ponat suum nomen ibi, & habitet in eo: venietis & offeretis in illo holocausta, & victimas vestras, decimas & primitias manuum vestrarum, & vota atque donaria primogenita bouum & ouium.* Et postea sequitur ibi prohibitivè hoc modo, *Cave ne offeras holocausta tua in omni loco quem videris: sed*

*in illo, quem elegit Dominus in una tribuum
tuarum, offeres hostias, & facies quaecunque
præcipio tibi. Hæc ibi. Vbi constat quod nō
tantum est præceptum, vt in loco electo à
Deo, (quem Ecclesiam Parochialem iux-
ta verba prædicta debemus intelligere)
cuncta, quæ Lex præcipit de Sacramentis,
facere debeat quisque: de quibus est con-
fessio facienda; sicut patet Leuit. 3. c. vbi
dicitur quod *quicumque per ignorantiam
peccauerit, offeret Sacerdoti, & ipse orabit
pro eo, & dimittetur ei:* sed etiam quod alia
loca quicunque, sunt à lege prohibita. Cer-
tum autem videtur, quod locus fratrum nō
est à Deo per legem suam ad hæc facienda
electus, sed tantum à summis Pontificibus
est concessus: sed iuxta verba præmissa est
de lege prohibitus. Cum ergo locus præce-
ptus sit certior loco de lege diuina prohi-
bito, ac solummodo permissio, aut conces-
so, sequi videtur, quod parochialis Eccle-
sia est locus certior siue securior ad con-
fessionem Parochianorum pandendam,
quàm oratorium fratrum siue eorum
Ecclesia. Item Parochianus non hæsitat,
nec suspicari habet, intelligendo de cur-
su communi, quod sua Parochialis Ec-
clesia supposita sit interdicto Ecclesia-*

stico : hoc autem verisimiliter poterit
suspiciari de fratrum Ecclesia: unde vi-
detur quod Ecclesia sua est locus sibi se-
curior. Suadetur minor per cœretalem
illam de sepulturis in sexto cap. *Aimarum*
periculis, ubi sub certo modo pena in-
terdicti tam Ecclesiæ quàm cœmeterij in-
fligitur quibuscunque religiosi, qui indu-
cunt aliquos ad vouendum, iurandum,
seu fide interposita, vel aliàs promitten-
dum, ut apud eorum Ecclesias eligat se-
pulturam, vel iam electam ulterius non
immutent. Et communiter affirmatur,
quod fratres ita inducunt homines.
Unde consequitur quod verisimiliter pa-
rochianus poterit suspicari, quod loca
eorum sunt supposita interdicto Ecclesia-
stico. Istud aliter confirmatur: quoniam
videtur quod nullus Parochianus sciens,
(ut scire tenetur) quod sua Parochialis
Ecclesia est locus à Deo ad Sacramenta
exercenda electus atque præceptus, &
locus fratrum à lege prohibitus: ibi (nisi
informatus aut suassus à fratribus) eligit se-
peliri: quoniam satis firmum videtur, quod
nullus Parochianus ad hoc faciendum est
à seculari aliquo taliter informatus, aut ita
inductus, vel, ut verius dicam, seductus.

Ex his videtur posse concludi, (sicut fieri potest in materia morali) quod Parochialis Ecclesia est pro confessione pandenda Parochianis suis locus securior loco fratrum. Dixi & dico secundo, quod Parochialis Ecclesia Parochianis ipsius est pro confessione pandenda, & etiam sepultura habenda locus utilior loco fratrum. Primum: quia est locus à Deo electus, ac per hoc Deo amplius acceptatus, quam fratrum Ecclesia, quæ à Deo non est expresse electa, sicut nec à sua Ecclesia: sed solum ad procurationem fratrum concessa. Unde videtur utilior, ex quo est acceptior Deo. Item in Parochiali Ecclesia Parochianus (ut debet) rite confessus, duplicis obedientiæ meritum sibi acquirit, scilicet meritum obedientiæ, qua paret mandato Dei de confessione pandenda, & meritum obedientiæ, qua obedit præcepto diuino de loco ad hoc à Deo electo seruando. Hoc secundo merito obedientiæ caret, ut videtur, quisque apud fratres confessus, cum nulla lex Parochiano præcipiat, aut etiam illi suadeat, ut apud fratres confiteatur, aut habeat sepulturam: ergo est Parochialis Ecclesia Parochianis pro istis exercendis locus utilior loco fratrum.

Item in Parochiali Ecclesia sunt vbique, aut quasi vbique, aut esse debent de iure diuino, & suæ Ecclesiæ, plures in decuplo communiter oratores, quàm in Ecclesijs fratrum sunt fratres: vnde debet quisque Parochianus verisimiliter æstimare, quod ibi per orationes plurium poterit ampliùs adiuuari, quàm in fratrum Ecclesijs. Dixi & dico tertio, quod confessio facta in Parochiali Ecclesia modo prædicto vitat plura incommoda, quàm confessio facta in fratrum Ecclesia, & similiter ibi habita sepultura: quoniam ex quo ibi sunt utilitas amplior, & maior securitas; econtra, si omitteretur, & fieret confessio singulariter, vt supra expressi, in fratrum Ecclesijs, tolleretur securitas, ac etiam tollerentur utilitates præmissæ. Et hæc sunt (nemo dubitat) graua multùm incommoda siue dispendia. Dixi & dico secundo, si quærat quæ persona est eligibilior pro confessione Parochianis singulariter facienda, scilicet an persona fratris, vel ordinarij sui persona, quod ordinarij persona eligibilior est censenda fratrum personis, quia securior & utilior; & quia confessio sibi facta singulariter vitat plura incommoda & dispendia, Dico primo, quod est persona securior, quia

est (vt in articulo præcedenti suasi) persona à Deo præcepta, & à sua Ecclesia de lege cõmuni, & fratris persona de lege prohibita: vnde consequitur quòd ordinarius est persona securior. Item persona ordinarij est Parochianis suis personis fratrum amplius obligata: vnde rationabiliter potest Parochianus securius de ea confidere, quia sollicitior erit ad prouidendum suæ salutis quam frater qui est sibi persona extranea: sicut persona medici corporalis est ægroto magis carnaliter securo, quæ est ægroto magis obligata. Item quia Parochianus de lege cõmuni siue de cursu non hæsitat, nec hæsitare habet de ordinarij sui persona, quòd eius potestas absoluendi suos subditos sit ligata: de fratrum verò personis habet verisimiliter suspicari, quòd propter excommunicationes varias est in eis potestas ligata. Nec est dubium quin securius sit homini confessionem pandere liberam potestatem habenti, quàm habenti potestatem ligatam: ergò persona ordinarij est certior siue securior. Probatur minor prædicta. Primum per cap. *Religiosi.* in Clementinis, de decimis, vbi dicitur quòd religiosi quicumque beneficia non habentes, qui noualium, aut alias decimas

Ecclesijs debitas ad eos ex aliqua causa legitima non spectantes appropriare sibi præsumpserint, aut exquisitis fraudibus siue coloribus vsurpare tentauerint, &c. sententiam excommunicationis incurrunt. Nec videtur ambiguum: quoniam de iure diuino legatorum & liberè donatorum decimæ sunt soluendæ; & hoc Ecclesijs & earum curatis. Quod etiam Innocentius dicit, & Hostiensis affirmat, Vnde consequitur, quòd quicumque fratres, qui de legatis eis, & de eis donatis decimas ab Ecclesijs subtrahunt, & eas sibi appropriant, sententiam excommunicationis incurrunt: cùm de illis nunquam decimas soluant, vt communiter affirmatur. Secundò probatur minor prædicta per cap. *Religiosi*, de priuilegijs in Clementinis, vbi omnes religiosi sunt excommunicati de facto, qui à sententijs latis per statuta prouincialia seu synodalia quosque absoluunt: à quibus sententijs, vt communiter affirmatur, ab Ecclesiæ Prælati & pœnitentiarijs eorundem, sæpè, imò communiter ligatos fratres confessiones audientes absoluunt. Ego enim in mea diocesi Armachana (vt puto) habeo duo millia subditorum, qui singulis annis

propter sententias excommunicationis lā-
 tas contra homicidas voluntarios, fures
 publicos, incendiarios & istis confimiles,
 sunt excommunicationis sententijs inuo-
 luti: de quibus [alius codex habet] vix ve-
 niunt ad me seu pœnitentiarios meos qua-
 tuordecim in anno; & recipiunt Sacra-
 menta omnestales vt ceteri, & absoluti
 dicuntur, nec per alios quàm per fratres.
 Non dubium: cùm nulli alij illos absol-
 uunt, absoluti creduntur. Vnde à Paro-
 chianis potest verisimiliter suspicari, quòd
 illi confessores sunt tali sententia inuoluti:
 ita quod potestas Sacerdotalis est in eis li-
 gata. Et ita minùs tutum est eis talibus
 confiteri, ex quo sine peccato mortali non
 possunt eos absolvere. Et si illud credunt
 ipsi confessi, consentiunt fratrum pecca-
 tis, si absolutionem accipiant. Ait enim
 Apostolus ad Romanos primo capit. *Qui
 talia agunt, digni sunt morte: non solum
 autem qui faciunt ea: sed etiam qui consen-
 sient facientibus.* Et secundo Paralipome-
 non, xix. cap. dicitur quòd Iehu Prophe-
 ta dicit ad Iosaphat regem Iuda, *Impio
 præbes auxilium, & his, qui oderunt Domi-
 num, amicitia iungeris: & idcirco iram qui-
 dem Domini inerebaris, &c.* Vnde confe-

quitur quòd securior est persona ordinarij, quàm fratrum personæ. Idem etiam suadetur per capitulum *Cupientes*, de pœnis, in Clementinis, vbi triplex est lata excommunicationis sententiâ. Prima est lata in omnes religiosos, qui aliqua, vt audientes à solutione decimarum Ecclesijs debitarum retrahant, in sermonibus suis, vel alibi proferre præsumunt: quod faciunt, vt fertur communiter, confessores de fratribus: affirmant enim in publico, quòd nec de eleemosynis panis, vini, ceruisiæ, aut aliarum rerum huiusmodi modicarum tenentur donantes, in decimando lucra mercationis ipsorum, aliquid decimare. Ego verò è contrario affirmavi, quòd de paruis sicut de magnis donarijs tenentur inter lucra sua mentionem facere, quia aliàs possent mercatores quicumque totum lucrum totius anni per talia parua dona ita distrahere, quòd de maximo lucro suo nihil deberent penitus decimare, totum per modica distribuendo pauperibus: & illusio fieret iuri communi. Sunt ergo fratres tales maioris excommunicationis sententijs inuoluti. Item per eandem decretalem, *Cupientes*, sunt omnes fratres ab officio prædicationis suspensi, & consequen-

ter excommunicati, qui infra certum terminum conscientiam eis confessis de decimis soluendis non faciunt: vbi & verisimiliter æstimatur, quod omnes confessores deputati de fratribus, vel quasi omnes, sunt ista sententia canonis inuoluti: quia, vt fertur communiter, & per eos qui eis confitentur potest probari, quod aliqui de hoc penitus nihil dicunt confessis: & quod illi, qui confessis eis quidquam loquuntur, proferunt nuda verba, non pro materia, sed pro forma, quod non est conscientiam facere, sed magis illudere. Vnde si ad sensum constituentis canonem conscientiam facerent, ipsos eis confessos de rebus quibuscumque decimandis, de modo & de tempore informarent. Et quia non faciunt, non video quin incidant in istam excommunicationis sententiam. Item per idem capitulum, *Cupientes* Omnes religiosi sunt excommunicati, qui aliquos ad vouendum, iurandum, vel fide media, seu aliàs promittendum inducunt, vt sepulturam apud eorum Ecclesias eligant, vel iam electam vlteriùs non immutent: quod tamen facere fratres affirmat clericorum & laicorum communis opinio. Et ad hoc vide-

tur ratio satis probabilis iam adducta ad confirmationem secundæ rationis primæ conclusionis articuli præcedentis.

Item quod persona ordinarij sit Parochiano suo securior aliter suadetur, scilicet quia de eius persona rationabiliter Parochianus potest iudicare, quod quoad pœnitentiam congruam & vtilem sibi imponendam pro suis peccatis est iudex sibi minùs suspectus seu æquior: quoniam quæstum subsidij temporalis per confessionis suæ auditionem in suo ordinario non habet supponere aut aliquammodo suspicari: cùm necessaria vitæ, de lege Dei & suæ Ecclesiæ, ordinarij ministerio sint annexa: de personis vero fratrum econtra: quoniam, vt in appellatione, quam contra me fecerunt in Anglia, continetur, ex sua fundatione ad mendicitatem & paupertatem arctissimam asserunt se astrictos, non obstante in eis facultate audiendi confessiones omnium sibi confiteri volentium: vnde quæstum releuationis mendicitatis in eis causam auditionis confessionis hominis extranei probabiliter Parochianus poterit suspicari, & rationabiliter in animo suo ita arguere: Cur iste mendicus hic meam confessionem sedendo audiret,

& à necessariis pro victu sibi adquirendis defisteret, nisi de me tale suffragium expectaret? Vnde cum egestas ad peccatum cuius mediatione indigentia succurratur, impellat: Iuxta illud Salomonis Prouerbiorum xxx. cap. *Mendicitatem & diuitias ne dederis mihi, sed tribue tantum victui meo necessaria, ne forte satiatus illicitarum ad nequandum te, & dicam, Quis est Dominus? & egestate compulsus furer, & perire nomen Dei mei:* Consequitur quod pro omni genere peccatorum eleemosynam applicandam, qua poterit eius mendicitas releuari, velit mihi imponere: & ita non ero spiritualiter bene sanatus. Saluator enim suis discipulis quærentibus, Quare non potuimus eiicere illum? de dæmonio hinc loquentes: respondit, *hoc genus non eiicitur nisi per orationem & ieiunium:* Matth. xvii. capit. Ex quo dicto colligitur, quod sicut cuicunque morbo corporali diuerso diuersa congruit medicina: sic spirituali morbo cuilibet est prouidenda propria medicina, qualem iste mendicus circa sua intentus, vt suspicor, mihi nullatenus infundabit. Confirmatur hæc ratio: quoniam satis apparet in facto quod isti fratres vbique per orbem post priuilegium de confessionibus au-

bus audiendis obtentum, monasteria pulcherrima & regalia palatia construxerunt. Cuius rei causa videtur præcipua illa confessiones audiendi facultas: quoniam antequàm illam facultatem haberent, nullatenus talia construere potuerunt. Item nunquam auditur quòd fratres ad refectionem Parochialis Ecclesiæ aut strætæ communis seu pontium reformandos defectus, tales eleemosynas largiendas confessis eis imponant: nec minores, ut eas prædicatoribus, aut prædicatores seu quique de aliis mendicantium ordinibus, ut minoribus largiantur, imponunt, cuncta sibi & suo ordini applicantes. Vnde verisimiliter poterit iudicari, quòd quæstus proprius est in causa, quare talis mendicus pro persona extranea est ita sollicitus, quòd tempus mendicationis negligit, illi extraneo totus intentus. Item feci ad hoc & facio in præsentem quintam rationem cuius conclusionem nolebam asserere. Dixi tamen in publico, & in præsentem idem dico, quòd rationem illam nesciebam dissolvere. Conclusio illius rationis est ista; Quòd quisque Parochianus confessus fratribus, ordinarijs suis neglectis, iuxta potestatem quam habent, post confessionem


huiusmodi remanet in peccato mortali, & à nullo peccato mortali absoluitur. Ad hanc conclusionem aliququaliter suadendam nitebat vnum principium suadere, quod etiam principium propter constitutionem Iohanninam, *Vas electionis*, volebam astruere, quoniam ibi damnantur de dictis magistri Io. de Poliacio tres subsequentes articuli. Primus est, quòd confessi fratribus habentibus licentiam generalem audiendi confessiones, tenentur eadem peccata, quæ confessi fuerunt, iterum confiteri proprio sacerdoti. Secundus articulus est, quòd stante statuto, *Omnis utriusque sexus*, edito in concilio generali, Romanus Pontifex non potest facere quòd Parochiani non teneantur confiteri omnia sua peccata semel in anno suo proprio Sacerdoti, quæ dicit Parochialem curatum: imò nec Deus posset hoc facere, quia, vt dicebat, hoc implicat contradictionem. Tertius articulus est, quòd Papa non potest dare generalem potestatem audiendi confessiones, imò nec Deus, quin confessus habenti generalem licentiam audiendi confessiones teneatur eadem peccata iterum confiteri suo proprio Sacerdoti, quem dicit (vt præmitti-

tur) Parochialem curatum. Et erat principium ad hoc probandum, quòd simul possunt stare & nullatenus repugnant, quòd quisque Parochianus fratribus sit confessus, & quòd idem Parochianus teneatur sub præcepto Ecclesiæ omnia sua peccata semel in anno suo Sacerdoti proprio siue ordinario confiteri. Primo istud suasi, quia non ampliùs repugnare videntur confiteri fratribus, & nihilominus obligari siue teneri semel in anno omnia sua peccata mortalia suo ordinario siue Sacerdoti proprio confiteri, intelligendo de confessione quantum ad id quod est iterabile in ea, quam sibi repugnant semel aut sæpiùs apud fratres offerre, & teneri siue obligari vt semel aut bis siue ter teneatur in sua Ecclesia Parochiali in anno offerre: cum vnus actus sit iterabilis meritorie sicut alter. Ista verò duo vltima in nullo sibi repugnant. Igitur nec duo prima mutuo se impugnant. Item nullus ambigit quin quæcunque duæ propositiones affirmatiuæ super simili actu iterabili à diuersis personis aut ab eadem persona pro diuersis locis, ac diuersis temporibus prolatae, valeant simul stare;

sicuti quòd iste Parochianus audiet vnam Missam vel plures apud fratres, & quod audiet vnam Missam vel plures apud Parochialem Ecclesiam, saltem semel in mense, & maximè si vterque actus sit meritorius & Deo acceptus, qualis actus non dubium extat confessio. Omnes autem Doctores in illo concordant, quòd actus confessionis est iterabilis meritoriè, quantum ad expressionem peccatorum & poenitentiam. Et nos omnes sæpe sic agimus, Deo, vt credimus, ita præstantes obsequium. Nec minùs est certum quin actus tales meritoriè possint cadere sub præcepto, quoniam sic fiunt magis meritorij, si obedienter fiunt, quàm sine præcepto, vt suprà expressi in principio articuli præcedentis. Possunt igitur confessio fratri & confessio eorundem peccatorum ordinario facienda cadere sub præcepto: ergo multò fortius potest vna confessio facienda sub præcepto venire, altera libera remanente. Item Dominus Martinus Papa quartus, qui fratribus minoribus facultatem audiendi confessiones concessit, in ipsius priuilegij fine sic dicit, *Volumus autem quod hi qui fratribus confitebuntur, eisdem suis Parochialibus Presbyteris confi-*

teri, (saltem semel in anno (prout generale Concilium statuit) nihilominus teneantur, quodque ijdem fratres eos ad hoc diligenter & efficaciter secundum datam eis à Domino gratiam exhortentur. Nullus ergo, & cætera. Hæc ibi. Vbi iste Dominus Papa mandat apertè, quòd non obstante confessione facta fratri, confitens teneatur iuxta concilij generalis statutum eadem peccata sua Presbytero Parochiali confiteri. Sed huic decreto videtur hæc constitutio Ioannina, vas electionis, iuxta sensum, quem fratres de ea concipiunt, obuiare, & populum eo modo informant in publico, se ipsos (vt videtur) & illos damando, si præmissum mandatum Domini Martini sit fixum, sicut firmum videtur esse iuxta rationes præmissas. Ideo Pater sanctissime, ne tantum dispendium continetur in populo Christiano, amore Crucifixi illa constitutio cum celeritate possibili declaretur. Mihi enim videtur quod ita potest intelligi, & sic eam intelligo quòd nullus confessus fratribus tenetur propter defectum potestatis absoluendi in fratribus eadem peccata confiteri suo proprio Sacerdoti: cuius contrarium magister Ioannes de Poliacò intellexisse videtur;

B iij



Item videtur valde mirabile qua fronte fratres audent astruere quod simul stare non possunt, vt quis sit confessus fratribus de suis criminibus, & quòd eadem teneatur suo ordinario siue suo Sacerdoti proprio confiteri: cùm econtra in sua regula (vt communiter affirmatur) habeant, quòd quicumque in ordine ipsorum professus seu habitum ipsorum assumens, in sua professione aut in suo ingressu, non obstante quacunque sua confessione priori, tenetur vni ipsorum omnia sua crimina confiteri. Cur enim negant de nobis posse seruari quod de se ipsis obseruant? videtur mirabile. Item Dominus Benedictus vndecimus in constitutione sua reuocatoria constitutionis Bonifacij, *Supercathedram*, quæ incipit (si bene recordor) *Inter cunctas*, fratribus mandat quòd ipsi hortentur eis confessos, quòd eadem sua peccata confiteantur suo proprio Sacerdoti. Ipse ergo sensit (vt videtur) quòd vna confessio obligationem ad alteram omnino non tollit, quoniam si insimul stare possunt, potest alterum præcipi altero libero remanente (vt mihi videtur) iuxta adducta superius. Item Sanctus Au-

gustinus in de vera & falsa pœnitentia, capit. nono; & Sanctus Thomas & Bonaventura, & alij Doctores & glossatores Catholici sæpè affirmant quod expedit eadem peccata sæpiùs confiteri. Cur igitur idem sub præcepto venire non possit propter meritum in populo cumulandum, non video. Sicut posset sanctè præcipi à prælato, quòd quilibet Parochianus audiret singulis diebus Dominicis duas Missas. Hoc igitur principio probabiliter sic suasio nimis dura videtur posse inferri conclusio, scilicet quòd quisque Parochianus confessus fratri, ordinarijs suis curatis omisis, per totum annum neglectis, spretis, siue contemptis, est contemptor siue transgressor mandati Ecclesiæ contenti in illa decretali, *Omnis utriusque sexus*, & per consequens redit à fratre cum peccato mortali. Et cùm Deus non remittat vnum peccatum mortale, nisi mortalia cuncta relaxet, infertur vltteriùs quòd taliter à fratre confessus, reuertitur cùm omnibus peccatis mortalibus cum quibus oneratus accessit ad fratrem. Et quid isto intolerabilius aut damnosius possit in Ecclesia Christi accidere? Verè, Pater sanctissime, istam rationem nesciui nec scio in

præsenti dissoluere. Vnde rogavi Londonijs ipsos in publico, vt me informarent verbo vel scripto qualiter possem præmissam rationem dissoluere. Sed illud hucusque non valui obtinere ab eis. Igitur mihi videtur, quòd ex præmissis possum inferre, quòd persona ordinarij est Parochiano securior pro confessione pandenda singulariter, scilicet vni personæ, quàm fratris persona. Super quo, Pater sanctissime, *Nolite indicare secundum faciem, sed iustum iudicium indicate.* Dico secundò & dixi, quòd persona ordinarij est Parochiano vtilior pro sua confessione pandenda, quàm fratris persona, quia est persona à lege Dei & suæ Ecclesiæ ordinata, atque de mandato Dei ad illud ministerium explendum adhibita: frater verò ex sola concessione siue licentia Summi Pontificis ad id obtinet facultatem. Nec videtur ambiguum, quoniam quisque obseruando siue sequendo præceptum vtilius agit, quàm præcepto neglecto, sequendo siue obseruando solam licentiam: cum sequendo solam licentiam, nullus ob hoc præmium mereatur: & quisque obseruando præceptum mereatur. Vnde consequitur quòd vtilius confiteri potest quisque

Parochianus (de cursu communi intelligo)ordinario suo,quàm cuiquā fratri.Non tamen nego quin raro in casu contrarium possit contingere, sicut cū ordinarius ex aliqua causa certa redditur suo Parochiano suspectus. Item hoc sequi videtur sicut in priori articulo, quia suo ordinario confitendo habet duplicis obedientiæ meritum, scilicet obedientiæ quoad legem confessionis, & etiam quoad legem personæ: & confitendo fratri, caret horum meritorum fœdere, cū non sit Parochianis præceptum neque consultum quòd fratribus sint confessi. Vnde confiteri ordinario videtur sibi vtilius. Item persona ordinarij est ampliùs suo Parochiano obligata, quàm fratris persona, & amore sancto, vt quisque de cursu communi debet supponere, ampliùs, vt tenetur ex cura, suo Parochiano magis affecta. Vnde videtur quòd sollicitior erit circa vtilem medicinam spiritualem sibi adhibendam, quàm frater, cū frater sit sibi extraneus. Igitur ex illo capite videtur confessio vtilior. Item quia iuxta conclusionem immediatè præmissam persona ordinarij est ad hoc persona securior: vnde consequitur quod est persona vtilior. Item Innocentius in

capitulo illo, *si animarum*, vnam causam ad istam conclusionem assignat, scilicet quia facilius ad curatum quam ad extraneum habetur accessus: concludens quòd vtilius pandenda est illi Parochiani cōfessio. Et hæc causa specialiter locum habet in casu infirmitatis de nocte, quando non potest haberi accessus ad fratrem, nec fratri ad infirmum patet accessus de nocte. Ita quòd tunc, non obstante confessione antea facta fratri, Parochianum oportebit iterum ordinario confiteri, vbi illi confessio multum esset expediens, quòd ordinarius suam vitam priorem agnosceret: quoniam sic posset sibi pœnitentiam magis aptam imponere, cum satis sit notum, quòd quantò quisque sapius remissionem accepit de peccatis, & quantò peccata antè remissa grauiora existunt; tantò redditur grauius sequens delictum. Qualiter ergo eo casu poterit ordinarius suo Parochiano aptam & congruam pœnitentiam, ignorans sua priora peccata, imponere, aut saltem tam congruam, si cuti si eius priorem vitam agnosceret, omnino non cerno. Vnde vtilius esset ita confessio propter casus huiusmodi ordinario confiteri, quam fratri. Item Innocen-

tius secundam causam adducit, scilicet quòd in confessione ordinario facta est erubescencia amplior, quàm cum confessio est fratri facta: quoniam quisque amplius erubescit pandere sua peccata illi, quem quotidie cernit præsentem, quàm vni extraneo, quem fortassis non videbit nisi semel in anno. Item multum est utile vxoratis, vt vnus suam & suæ vxoris confessionem audiat indiuisè, quia sic eorum confessor, tanquam medicus singularis duorum membrorum vnius corporis, utiliùs potest languidis in spiritu, sicut infirmis corporaliter, prouidere, quàm duo medici; quorum vnus vnum membrum duntaxat, & secundus medicus aliud membrum solummodò curare laborat: Vir verò & mulier vnum sunt corpus. Itaque ait Saluator, *Iam non sunt duo, sed vna caro.* Matth. xix. capit. Satis ex istis videtur quòd persona ordinarij est persona utilior pro sui Parochiani confessione illi pandenda, quàm fratris persona. Super quo, Pater Sanctissime, *Nolite iudicare secundum faciem: sed iustum iudiciũ iudicate.* Dico tertio, vt tunc dixi, quòd confessio facta ordinario singulariter, vt præscripsi, vi-

tat plura incommoda siue dispendia quàm facta fratris personæ : vbi incepti dilatare materiam suadendo , quòd ea priuilegia, quæ in capitulo , *Dadum* , exprimuntur fratribus esse concessa , & etiam alia, multiplicia afferunt & inducunt dispendia : & per consequens obseruantia iuris communis in illorum priuilegiorum materia multa vitaret incommoda.

Dico ergo quòd priuilegiorum horum obseruantia , non solùm abusus eorum à fratribus, afferunt multa incommoda confessis , curatis , clero , populo Christiano , & fratribus. Dico primò , quòd horum priuilegiorum abusus à fratribus plurima incommoda afferunt confessis eisdem , quoniam auferunt securitatem præ tactam in prima conclusione huius articuli. Item vtilitates præscriptas in secunda conclusione huius articuli , quarum ablatio infert confessis fratribus contraria eis incommoda , quæ debent quasi intolerabilia iudicari. Item iuxta verba Domini Innocentij quarti , vbi suprà, alia plurima dispendia inde proueniunt: Dicit enim hoc modo , *Attendentes quòd ex usurpatione huiusmodi non tantùm contemptas & indeuotio populi procedunt contra*

proprios sacerdotes, verum etiam erubescencia, quæ est maxima pars pœnitentiæ, tollitur; cum quis non proprio sacerdoti, quem habet continuum & præsentem, sed alieno & aliquando transeunti, ad quem difficilis & aliquando impossibilis est recursus, sua crimina confitetur. Ecce duo incommoda in confessis aut tria, scilicet contemptus proprii sacerdotis, & indeuotio, & sublatio erubescentiæ (quam maximam pœnitentiæ partem affirmat) quæ ex confessione facta fratribus proueniunt. Et sequitur immediatè, Quia damnabilis est etiam oblationum detentio & periculosa detractio decimarum, quæ non (ut quidam mendaciter asserunt) velut cærimonialia transeunt; sed ei, à quo omnia recipimus, in signum dominij reseruata, Parochialibus Ecclesijs persoluantur. Hæc ibi: vbi duo alia damna adiungit, scilicet detentionem oblationum quæ solent à confitentibus sæpe solui eis, qui eorum confessionem auscultant, & fratres eas sibi appropriant, cum de iure Parochialibus Ecclesijs debeantur: & est in fratribus damnabile, ut affirmat: & detractio decimarum quam periculosam affirmat in fratribus: quæ etiam duo sunt curatis damnosa, quia ea, quæ pro vi-

Et eis de lege Dei & suæ Ecclesiæ prouidentur, per fratres ratione huius priuilegij subtrahuntur. Dicitur enim Num. xviij. capitul. *Omnia quæ sanctificantur à filijs Israël, tibi tradidi, & filijs tuis pro officio sacerdotali legitima sempiterna. & ibidem, omnis oblatio, & sacrificium, & quidquid pro peccato atque delicto redditur mihi, & cedit in sancta sanctorum, tuum erit & filiorum tuorum.* Item per vsum horum priuilegiorum à fratribus prouenit ipsis curatis vnum aliud mirabile dispendium, scilicet quòd vultus suorum pecorum, quorum curam ab Episcopo suo recipiunt, non agnoscunt, quod in curam gerente carnalem de animalibus quibuscunque esset damnosum. Item est valde damnosum curatis à suis Parochianis contemni: & tamen contemptus eorum (vt suprà Innocentius affirmat) prodit in populis ex hoc quod Parochiani ipsorum fratribus confitentur. Item est aliud grauius damnum curatis, quòd occasione abusus priuilegiorum fratribus concessorum quoad tres quartas omnium funeralium & etiam omnium aliter prouenientium fratribus ex legatione siue donatione distinctè siue indistinctè ad vsum

quoscunque in caput. *Dudum*, concessas,
& quoad quartam concessam curatis &
ibi taxatam: quam quartam de multis le-
gatis, donatis atque oblatiis fratres non
solum curatis, sed infinitis cautelis adhi-
bitis, ut curati asserunt, ipsi fratres sibi ap-
propriant, diuersis quaestis coloribus,
quod inter eos & fratres quasi ubique in
populis Christianis sunt lites, contentio-
nes, & iurgia infinita: ita quod in locis
quam plurimis à verbis peruenitur ad ver-
bera, & in mentibus charitas procul abii-
citur. Quae etiam incommoda curatis ex
alterius priuilegij abusu proueniunt: scili-
cet quod cum fratres habent duos con-
seruatores, nolunt curatos aut alios ha-
bentes quaestiones cum ipsis coram pro-
pinquiore suo conseruatore facere ad iu-
diciū euocari, sed citari eos faciunt co-
ram magis ab eis remoto, ut propter vexa-
tionis timorem (ut dicitur) compellant eos
à causarum suarum prosecutione desiste-
re. Quod in mea prouincia saepius actum
extitit, ut aliqui in ista curia praesentes affir-
mant, & est super hoc fama communis. Haec
& alia multa incommoda ex usu, vel verius
ex abusu priuilegiorum fratribus concessorum
proueniunt in curatis. Item ex abusu priuilegio,

rum fratribus concessorum incommoda multa in clero proueniunt. Primo quòd occasione priuilegij super confessionibus audiendis iuuenes quasi omnes in studiis generalibus, & in domibus parentum suorum, in quibus quasi vbique fratres propter facultatem audiendi confessiones tanquam familiares existunt, fratribus confitentur: Qui iuuenes fratrum fraudibus, & munusculis datis allecti (quia homines prouecta ætatis circunuenire non possunt) eorum ordines ingrediuntur, nec postmodum permittuntur (vt fama laborat) quòd exeundi ab ordine habeant libertatem: sed cùm eis detinentur inuiti donec profiteantur in ordine: imò nec permittunt (vt dicitur) quòd cum patre aut matre loquantur, nisi sub fratrum custodia & timore. Super quo isto die in exitu mei hospitij vnus probus de Anglia, qui ob remedium obtinendum ad curiam istam accessit, mihi exposuit, quòd statim post Pascha proximum iam lapsum fratres apud studium Oxoniense eo modo sibi suum filium non habentem annos tredecim subtraxerunt, cùm quo illuc adueniens non poterat nisi ipso sub fratrum custodia existente habere colloquium.

Cur

Cur ergo, cū scriptura sacra præcipiat, *qui furatus fuerit hominē, & vendiderit eū, conuictus noxa morte moriatur*, Exod. xxi. capit. hanc pœnam non subeant, aut aliam pœnam legitimam? non mihi videtur iustum. Si enim secundū legem pro furto bouis aut ouis debet quisque puniri, multo potius pro grauiori furto, & proximo læso magis nociuo, ampliùs deberet quisque puniri: quale est furtum huiusmodi puerorum ante annos discretionis à custodia suorum parentum. Nec poterunt affirmare, quòd quia pueri sic surrepti ad Deo obsequendū deuotiùs adducuntur, ideo furari eos & circumuenire licet fraudibus, mendacijs & fictis promissis, quoniam hoc est contra decretū Apostoli affirmare: dicit enim, *& non (sicut blasphemamur, & sicut aiunt quidam nos dicere) faciamus mala, ut veniāt bona: quorum damnatio iusta est*: ad Romanos iij. capit. Et vtinam viderent intimiùs hoc dicentes libros beati Augustini de mendacio & contra mendacium, in quibus apertè declarat, quòd non est faciendum mendacium pro aliquo malo vitando, nec pro cōmodo procurando: etiam nec pro hominis anima aut vita saluanda: & pariter videtur de alijs generibus pec-

catorum. Et exprimit vnam inter alias pulcherrimam rationem. Si, inquit, *litteret aliquando ex tali causa proferre mendacium, tota Ecclesia doctrina periret: quoniam tunc predicans fidem in publico ex tali causa posset mentiri. Cur ergò in docendo fidem, si- cut & cetera, auditores in cordibus suis non ita possent arguere? Iste secundum suam doctrinam potest dicere licitè in multiplici casu mendacium. Nescio, nec scire nunc possum, an talis casus iam instet sibi: igitur fidem in docendo non debeo adhibere. Vnde concludit; quòd ad officium iusti hominis nunquam pertinet sponte proferre mendacium.*

Item hoc est nouæ legis præceptum, sicut patet Mar. i. x. cap. vbi quærenti à Domino, *Quid faciam vt vitam eternam percipiam?* taliter respondetur, *Præcepta nosti? Ne adultereris, Ne occidas, Ne fureris, Ne falsum testimonium dixeris, Ne fraudem feceris, Honora patrem & matrem, &c.* Non autem licet homini propter causam aliquam à seipso inuentam præceptum soluere, vt videtur, quia propter hoc Saul eiectus erat à regno: quia contra præceptionem diuinam de demolienda tota Amalecitarum substantia, animalia pinguiora pro offerendo Deo sacrificio referuabat: vbi à Samuele Pro-

Curatorum.

35

pheta est sibi responsum, *Melior est obedientia quam victima; & auscultare magis quam offerre adipem arietum: quoniam quasi peccatum ariolandi est repugnare, & quasi scelus idololatriæ nolle acquiescere: primo Regum, xv. capit. Item quia Oza extendit manum ad arcam Dei & tenuit eam: quoniam recalcitrauerunt boues & declinauerunt eam: Iratus indignatione Dominus contra eum percussit eum super temeritate sua & mortuus est: Secundo Regum, vi. cap.*

Item Propheta Domini de Iuda missus est in Bethel, qui quia contra præceptum Domini ne comederet aut biberet in loco illo, ibi comedit & bibit, & tamen suafus & inuiratus ab alio Propheta loci illius, qui audito ab eo diuino præcepto, dixit se esse Prophetam sibi similem, à leone est in redeundo occisus, sicut scribitur iij. Regum, xiiij. cap. Hæc & istis similia satis affirmant esse delictum mortale in fratribus pueros ita furari à suis parentibus: imò non solum peccare videntur mortaliter propter furtum, sed etiam propter circumventionem & fraudem, cum Dominus ipse in auctoritate prædicta ita affirmet esse præceptum, *Ne fraudem feceris*, sicut affirmat esse præ-

ptum, *Ne occidas*, aut etiam, *Ne fureris*. Item pariter affirmat ibi falsum testimonium esse prohibitum sicut præceptum: quod tamen (vt videtur) fratres exercent in pueris, cum eos suis circumuentionibus ita alliciunt. Vnde Paulus Apost. præcipit, *ne quis supergrediatur, neq; circūueniat in negotio fratrem suū, quoniam vindex est Dominus de his omnibus*: i. ad Theff. 3. c. Ex istis cōsequitur graue damnum in populo, quia à multis subtrahitur id quod amplius diligunt in hoc mundo. Item consequitur graue damnum in clero in hoc quod iam in studijs regni Angliæ propter talem subtractionem puerorum à suis parentibus, laici vbique retrahuntur, ne mittant filios suos ad studium: quia potius eligunt eos facere cultores agrorum eos habendo, quàm sic in studiis eos taliter amittere. Et sic, quod vbi in studio Oxoniensi, adhuc meo tempore, erant triginta millia studentium, non reperiuntur sex millia his diebus: & maior huius imminutionis causa siue occasio, præmissa puerorum circumuentio æstimatur. Et quid est isto damno grauius toti clero? Non video. Item est aliud damnum tam graue, quod tendit ad consumptionem seu euacuationem do-

Strinæ in secularibus cuiuslibet facultaris, scilicet quòd isti ordines mendicantium propter infinita lucra quæ mediantibus prædictis priuilegijs de sepulturis & confessionibus & alijs quæ acquirunt, tantùm multiplicati sunt in conuentibus & personis conuentuum, quod non reperitur in studiis communibus de facultate artium sacrae Theologiæ, & Iuris Canonici, aut etiam (vt fertur à pluribus) de facultate Medicinæ, aut Iuris ciuilibis (nisi rarò) aliquis utilis multùm liber uenalis: sed omnes emuntur à fratribus: ita vt in singulis conuentibus sit vna grandis ac nobilis libraria, & singuli fratres habentes itatum in studijs, quales sunt modò innumeri, nobilem habeant librariam. Vnde ego de meis subiectis rectoribus tres aut quatuor misi ad studium: & dictum est mihi quòd nec bibliam eis utilem, nec libros alios Theologiæ uenales eis congruos ibi poterant reperire, & ad suam patriam sunt reuersi, aut vnus eorum saltem iam redijt. Si ista non sit in clero grandis iactura, nulla poterit in ipso esse: cùm ad exitum talem (vt videtur) intendat, quòd clericus in Ecclesia nullus remaneat præter fratres: & sic peribit fides Ecclesiæ, nisi qua-

tenus residebit in fratribus : & ita (vt multis videtur) potiùs expediret quòd Prælati eis cederent , vt totam (ad quod anhelare videntur) haberent Ecclesiã , quàm quòd eam demoliantur hoc modo. Vnde non solùm admiror , sed stupeo , quali audacia tot homines supra omnes mortales in sapientia se publicè extollentes contra physicam rationem , & contra sacræ scripturæ doctrinã taliter se sine modo multiplicant. Dicit enim Aristoteles ij. libro de anima , *quòd omnium natura constantium determinata est ratio magnitudinis & augmenti.* Vnde consequitur , quòd legem naturæ non seruant , sed eam abijciūt , qui in magnitudine & augmento terminum sibi non statuunt. Item cùm Scriptura nos instruat , Sapientiæ xi. cap. *quòd Deus omnia in mensura , numero , & pondere disposuit :* cùm talis multiplicatio super mendicitate seu mendicatione (vt fratres asserunt) sit fundata : quæ nec personarum numerum certum potest statuere quibus prouideat : imò nec vni personæ de cætero poterit prouidere : nec pòdus (scilicet vt locũ fixũ mendicantes obtineant) possit præfigere : cùm verè mendici per singulos dies , aut quasi suum locum ,

egeſtate vrgente,compellantur exire: nec
menſuram perſonis poſſit ſtatuerẽ, ſcilicet
vt ſingulis diuinis officiis ſint in numero
certæ perſonæ; cū pari modo egeſtate
compulſi,minifteriis relictis, mēdicare ſæ-
piſſime oportebit: conſequitur quòd con-
tra modum omnipotentis ſapientiæ diſpo-
nēdi,iſti de mēdicatiū ordinib⁹ hoc mo-
do ſe multiplicant, per hoc clerū & popu-
lum importunè velut effrontes vbilibet
onerātes.Iam enim iſtis temporibus non
poterit magnus aut mediocris in clero &
populo aut vix cibū ſumere, vbi tales af-
fuerint mēdicantes, non more pauperum
petentes ad portas vel oſtia humiliter elee-
moſynam, vt Franciſcus in teſtamento
præcepit & docuit,mēdicando: ſed curias ſi-
ue domos ſine verecūdia penetrātes & in-
ibi hoſpitantes,nullatenus inuitati edunt &
bibunt, quæ apud eos reperiunt: ſecū nihi-
lominus aut grana aut ſimilam, aut pa-
nes, aut carnes, ſeu caſeos, etiamſi in do-
mo non fuerint niſi duo, ſecum extorquē-
do reportāt:nec quiſquam eis poterit de-
negare, niſi verecundiam naturalem abij-
ciat. Et eſt mirum quòd Domini Gre-
gorij Papæ ſententiam non formidant,
qui in quodam priuilegio. publicato præ-

proueniunt: quoniam ipsa priuilegia prædicationis & auditionis confessionum tam sanctè se exercere prætendunt, quod quisque eos verecundatur repellere. Item ista priuilegia & alia infra tangenda afferunt ipsis fratribus multa incommoda, quia videtur quòd inficiunt eos multis generibus peccatorum, peccato iniuriæ, peccato inobedientiæ, peccato auaritiæ, & peccato superbiæ. Videtur enim tam procuratio quàm obseruantia horum priuilegiorum omnium contentorum in capitulo, *Dudum*, de sepulturis, in clemētinis, & etiam aliorum, præmissis peccatis fratres inficere. Procuratio enim eorum videtur eos inficere, quoad curatos, peccato iniuriæ, quia facta est contra Ius, siue diuinum mandatum, quo dicitur, *Non concupisces domum proximi tui: non desiderabis uxorem eius: non ancillam, non bouem, non asinum, nec omnia quæ illius sunt*, Exodi xx. cap. Constat autem quòd hæc iura procurata à fratribus fuerant tempore procurationis iura curatorum: Igitur contra diuinum mandatum tunc fuerat ea concupiscere. Procuratio verò concupiscentiam habebat annexam & præuiam in quocunque. Item cùm non licebat tunc concupiscere

bouem aut asinum curatorū iuxta diuinū praeceptum, multò minùs licuit concupiscere ea, quæ curatis erant vttiliora, scilicet iura praemissa. Item illa procuratio fiebat contra praeceptum de dilectione proximi: *Diliges proximum tuum sicut teipsum*: quoniam quisque seipsum sic diligit, quòd nō let alterum indebitè concupiscere bona sua. Constat autem quòd illa iura curatorū tunc non debebantur fratribus: igitur erāt ab eis indebitè procurata: & sic contra mādatum Dei praemissum. Item pariter luadetur ad idem, per illud Matth. vij. cap. *Omnia quaecumque vultis vt faciant vobis homines, vos facite illis: hac est enim Lex & Prophetæ*: vbi constat quòd per facere tam agere quàm omittere debemus accipere, scilicet vt omitteremus aliis facere ea quæ nollemus, scilicet quæ nolle debemus nobis fieri. Et quis fratrum vellet aut secundum eos velle deberet, quòd ab eis monachi aut canonici regulares aut fratres alterius ordinis tollerent priuilegia, quæ iam habent? Non puto quòd aliquis. Igitur nec ipsi talia iniuriosa curatis illis facere debuerunt. Item, priuilegiorum procuratio peccato inobedientiæ fratres inficit: quoniam ipsa priuilegia regulas suæ professio-

nis impugnant. Primò quidem, quia in appellatione sua supponūt & suggerūt, quòd illi quatuor ordines ab Ecclesia sunt instituti atque fundati super mendicitatē atque arctissima paupertate. Videretur autem quòd habere ius prædicandi fidelibus non potest stare cum huiusmodi fundamento, si huic priuilegio siue iuri sit annexa potestas exigendi necessaria vitæ ab his quibus Euangelium fratres annunciant, sicut erat in Christi discipulis, quando ad illud ministeriū exercendū eos direxit, iuxta illud Lucæ x. c. iā præactū: *In quācunq; domū intraueritis, &c. Dignus est enim operarius mercede sua.* Mēdici verò rectētales (vt videtur) dici non possunt. Qualiter enim dici possit verè mendicus, non dico mendicans, habens ius liberum vitæ necessaria exigendi non video. Vnde nec inquisitores prauitatis hæreticæ, qui dicuntur abuti sapissime potestate eis concessa, vexātes sæpe diuersas personas litteratas & laicas, nolētes remedium quærere de iniuriis ipsis illatis per eosdem inquisitores aut ordinis sui fratres, ita vt timore verecundiæ, notationis seu vocationis super causa hæresis & finalis iniusti iudicij, quale dicuntur sæpius exercere, pecuniæ summas graues sapissime ab eis extorqueant: nec quis

pœnitentiarius aut lector habens de certo siue ex pacto necessaria vitę suę videtur dici verè mendicus. Et sic ista ministeria procurādo & etiā exercēdo suā professionem dissoluunt. Et ita videtur quòd tam procurando quàm volendo tale priuilegium ipsi procurantes suam regulam de mendicitate, non dico de mendicatione, quę actum solum significat, volebāt abii- cere. Et sic eam in cordibus suis abiecerūt, sicut in simili ait Saluator: *Qui viderit mulierem ad concupiscendum eā, iam mœchatus est in corde suo*, Matt. v. cap. Si verò fratres astruxerunt (& verè, vt mihi videtur, sicut inferiùs suadebo) quòd huic ministerio siue officio prædicandi, in ipsis non est annexa facultas exigendi vitæ necessaria ab his quibus Euangelium Christi annunciant; quoniam non sunt vocati fratres aut missi ad talem ministerium exercendum; sed nudam habent licentiam quę nec præcipit eis, nec eos hortatur, vt ministerium illud exercean: ex alio capite idem cōsequitur, scilicet ex priuilegiis sepulturæ & facultatis recipiendi oblata tunc Deo, & aliàs ibi Deo oblata, & ex priuilegio audiendi confessiones omnium sibi confiteri volentiū: quoniam de lege Dei confessi non appa-

rebunt vacui in conspectu Dei, scilicet ingredienti-
entes Ecclesiam Dei pro Sacramen-
tis habendis, sicut patet Exodi xxiiij. cap.
Inobedientiæ peccatum incurrunt : quia
contra doctrinam Apostoli, ad Romam. x.
cap. id exercent: cùm dicat, *Quomodo præ-
dicabunt nisi mittantur? sicut scriptum est.*
*Quàm speciosi pedes euangelizantium pa-
cem, euangelizantium bona!* & ad Hebræos
v. cap. *Nemo sumat sibi honorem: sed qui vo-
catur à Deo tanquam Aaron.* Et contra
Christi doctrinam, *Nolite vocari rabbi, nec
vocemini magistri: unus enim est magister
vester Christus,* Matth. xxiiij. cap. Sunt ergo
inobedientes qui in professione sua Euan-
gelium Christi seruare promittunt, & ta-
men contra legem suam in Euangelio
traditam priuilegium tale procurant. Item
de fratribus minoribus hoc specialius vi-
detur posse inferri: quoniam nemo ambi-
git, quin facilioris & laxioris obseruantie
ac minoris meriti sit in eis cum istis priui-
legiis super facultate prædicandi, confes-
siones audiendi, sepulturas habendi, &
tres quartas omnium inde prouenientium
sibi appropriandi, vitam transigere, quàm
uiuere sine illis, sicut à beato Francisco
fuerant instituti. Igitur illa priuilegia pro-

curando retro respexerunt; postquam miserunt manus ad aratrum, contra praeceptum & regulam sancti Francisci. Dicitur enim in eius regula isto modo, 2. cap. *Finito verò anno probationis accipiantur ad obedientiam promittentes istam vitam & regulam semper obseruare: & nullo modo licebit eis de ista religione exire iuxta mandatum domini Papa, quia secundum sanctum Euāgelium, Nemo mittens manum suam ad aratrum, & respiciens retro aptus est regno Dei.* Hæc ibi Qui igitur talia priuilegia procurarunt, quia retro, non dubium, respexerunt, peccatū inobedientiæ contraxerunt. Item, cū dicatur in principio eiusdem secundi capituli, *Si qui voluerint hanc vitam accipere, & venerint ad fratres nostros, mittant eos ad suos ministros prouinciales, quibus solummodò, & non aliis recipiendi fratres licentia concedatur: ministri verò diligenter eos examinent de fide catholica, & de Ecclesiasticis Sacramentis, & si hæc omnia credant, & uelint ea fideliter confiteri, & usque in finem fideliter obseruare, &c.* Finito verò anno probationis, &c. Fratres verò e contrario priuilegium procurarunt: quòd tam inferiores in ordine, quàm prouinciales ministri, possunt homines ad ordinē suum

recipere: imò ipsi fratres indifferenter hoc faciunt. Cùm ergò sic priuilegium procurandò volebant regulam in illa parte dissoluere seu laxare, consequitur quòd peccatum inobedientiæ commiserunt, aut si sine priuilegio ita agant, non minùs contra suam professionem inobedienter hoc agunt.

Item hoc idem consequitur propter illam clausulam regulæ, Ministri verò diligenter eos examinent, &c. Contra quam clausulam directè agunt quotidie, cùm quasi nullus ad eos accedat, nisi iuuenis circumuentus, qui nec nouit quòt aut qualia sunt Ecclesiæ sacramenta, nec scit fidem ab hæresibus separare. Et nihilominus vix reperitur fratrum locus notabilis, quin sit ibi puerorum infra decennium conuentus vnus aut saltem dimidijs. Quis potest ambigere quin istud in fratribus inobedienciæ sit peccatum, proueniens in ipsis ex priuilegijs præactis, quibus ita ditantur, & taliter honorantur, quòd pueri ad eorum vota facilliter inclinantur, & præcipuè, quia audiunt confessiones in domibus suis & in domibus parentum puerorum huiusmodi. Igitur procuratio priuilegiorum istorum abusus eorum peccato inobedientiæ inficit ipsos fratres.

Item cū in regula sancti Francisci dicatur, & in capitulo *Exiit*, de verborū significatione, libro sexto, etiam declaratur à fratribus obseruandū, quòd fratres nō prādicent in episcopatu alicuius episcopi, cū ab illo fuerit illis contradictum. Et sanctus Franciscus in testamento suo sic dicit, *Et si haberem tantam sapientiam, quantam Salomon habuit, & inuenirem pauperculos sacerdotes huius seculi in Parochiis, quibus morantur, nolo predicare ultra voluntatem ipsorum, & ipsos & omnes alios volo timere, amare, & honorare, sicut meos dominos, &c. Et domini mei sunt.* Hæc ibi. Qualem verò reuerentiam fratres sacerdotibus pauperculis exhibeant, abscondi non potest, nec poterit, cū sit nulla: sed irreuerentia ubilibet loco sui reperiri poterit subrogata. Et ipsi econtra priuilegium in capitulo, *Dudum*, contentum procurarunt sibi concedi: & sic procurando in voluntate sua peccatum inobedientiæ habuerunt: quia legē illam eis prius impositam tollere voluerūt. Dicit enim beatus Augustinus super illo versiculo Psalmi 118. *Legem pone mihi Domine:* hoc modo, *Qui timore pænæ, nō amore iustitiæ opera legis facit, profectò inuitus facit: quod autem inuitus facit, si fieri posset, vellet*

vellet utique non iuberi; ac per hoc legis, quam vellet non esse, non est amicus, sed potius inimicus, nec mundatur opere, qui immundus est voluntate. Hæc Augustinus. Constat autem quòd procurans, ut fratres non obtenta licentia Episcopi in sua diocesi possent prædicare & confessiones audire, volebat regulam illi contrariam omnino non esse: & sic extunc eam non amore iustitiæ, sed solùm timore pœnæ seruauerunt, & volebant eis illam iussam non esse, & ita non illius legis prioris amici, sed inimici tunc erant, & secundùm Augustinum immundi voluntate. Item, isti procurantes priuilegia, quæ suam regulam seu professionem impugnant, non possunt (ut videtur) fideliter eo casu proferre illam clausulam Orationis Dominicæ, *Fiat voluntas tua, sicut in celo & in terra*, Matth. vi. cap. cùm tamen ad id, ex professione Euangelij teneantur. Sic enim Sanctus Franciscus suam regulam inchoat, *Regula & vita Fratrum Minorum hæc est, scilicet Domini nostri Iesu Christi Euangelium obseruare*; cùm nullis sit dubium, quin voluntas Dei, scilicet eius præceptum siue consilium sit, quòd fratres suam regulam ab eis professam in finem obser-

uent: cū hoc etiā præcipiatur in regula, 2. c.
et illud procurātes in corde suo ecōtra pro-
curāt, vt obseruātia relaxetur. Vnde cōse-
quitur quòd procurantes peccato inobe-
dientiæ quoad Deum, & quoad suā regulā
sunt infecti. Item ex alio capite videtur
hoc ; quoniam nec confessiones audire,
nec prædicationis officium exercere po-
terunt isti fratres, sicut nec alij, nisi ad
sacros ordines promoti sint, ad quos cū
peccato inobedientiæ (vt videtur) pro-
mouentur : cū sit lex communis Ec-
clesiæ, quòd nullus promoueatur ad or-
dinem sacrum, nisi habeat titulum suf-
ficientem ad vestitum habendum & vi-
ctum, qualem titulum quia fratres non
habent, cū sint (vt dicunt) verè men-
dici, contra hanc legem (vt videtur)
omnes & singuli promouentur : & sic
non tantū inobedientiæ, sed etiam
ambitionis, tam sublimem statum pro-
curando sibi concedi, peccatum incur-
runt. Item cū regula Sancti Francisci
præcipiat eodem capitulo, de prædica-
tionibus, quòd nullus fratrum populo
penitus audeat prædicare, nisi à gene-
rali ministro huius fraternitatis fuerit exa-
minatus & approbatus, & ab eo prædi-

cationis officium fuerit sibi concessum, & contrà est priuilegium procuratum, vt scilicet ministri prouinciales possint id facere. Fratres hoc procurantes iterum contra suam regulam procurabant, peccatum per consequens inobedientiæ committendo. Item Sanctus Franciscus in testamento suo sic præcepit, Præcipio firmiter per obedienciam fratribus vniuersis, quòd vbicumque sint, non audeant petere aliquam litteram in curia Romana per se, vel per interpositam personam, neque pro Ecclesia, neque pro aliquo loco, neque sub specie prædicationis, neque pro persecutione suorù corporum. Hæc ibi. Et fratres econtra per se ipsos ista priuilegia, & etiam per litteras procurabant, quoniam in ipsis priuilegiis continetur, vestris precibus inclinati. Et sic videtur, quòd illa procuratio ipsos procurantes inobedientiæ peccato infecit. Sed forsitan fratres hîc dicerent, quòd Dominus Papa Gregorius nonus, sicut dicitur in decretali Domini Nicolai tertij, Exiit qui seminat, declarauit fratres non teneri ad mandatum Francisci in illo testamento contentum. Et respondetur eisdem fratribus, quòd Dominus Nicolaus non asserit quòd Gregorius nonus taliter declarauerit,

sed dicit, sicut asseritur. Vnde videtur quòd fratres super hoc nullam declaratoriam litteram habuerunt: quoniam verisimile est, si quam litteram habuissent, quòd illam exhibuissent coram Domino Nicolao. Et tunc (vt videtur) non dixisset , vt asseritur : sed vt in eorum litteris vidimus contineri. Item, esto quòd Dominus Gregorius taliter declarauerit , non aliud intendebat, quàm id quod suæ rationes concludunt. Dicit enim dominus Nicolaus in prædicta decretali , Exiit , isto modo loquens de ipso domino Gregorio nono ; qui , sicut asseritur , attendens periculum animarum , & difficultates quas propter hoc possent incurrere , dubietatem de ipsorum cordibus amouens dixit, fratres ipsos ad ipsius mandati obseruantiam non teneri : quòd sine consensu fratrum , & maximè ministrorum quos vniuersos tangebatur, obligare nequiuisset, nec successorem suum quomodolibet obligauisset, cum non habeat in parem par imperium. Nos autem circa præsentem articulum nihil duximus innouandum. Hæc ibi. Vbi per id quod dominus Gregorius dixit, videtur quòd dominus Gregorius , si quid fecit, non aliud in hoc egit, quàm decretum

aut declarationem, quod fratres ad illud
mandatum Sancti Francisci non fuerant
obligati, intelligendo, quatenus erat man-
datum ipsius: quoniam nil amplius probant
rationes ipsius, scilicet quod non fuerant
evocati ad hoc omnes, quorum interfuit, &
quod par in parem non habet imperium.
Cum qua declaratione videtur stare, quod
fratres illud testamentum nihilominus ser-
uare tenebantur, & in presenti tenentur, si
auctoritate diuina per Franciscum illud
traditum erat eis, quoniam ad mandatum
Dei non oportuit vocare ministros, nec
successor Francisci Deo mandanti par fuit;
sic quod rationes illæ non obstant; quo-
niam de mandato Dei & auctoritate eius,
intimatis fratribus per Franciscum, fra-
tres tunc tenebantur, & in presenti te-
nentur illud testamentum seruare. Quod
autem sic fuerit, ex eodem testamento in
fine videtur, vbi sic dicitur, *Et non dicant
fratres, Hec est alia regula, quia est recorda-
tio, admonitio, & exhortatio, & meum testa-
mentum, quod ego frater Franciscus paru-
lus facio vobis fratribus meis benedictis pro-
pter hoc, ut regulam, quam Domino pro-
misimus, melius catholice obseruemus, &
generales ministri, & omnes alij mini-*

stri, & custodes per obedientiam teneantur in istis verbis non addere vel minuire, & semper hoc scriptum habeant secum iuxta regulam; & in omnibus capitulis, qua faciunt, quando legunt regulam, legant & ista verba, Et omnibus fratribus meis clericis & laicis precipio per obedientiam, ut non mittant glossas in regula, nec in istis verbis, dicendo, Ita voluit intelligi: sed sicut mihi dedit Dominus purè & simpliciter dicere, & scribere regulam, & verba ista ita simpliciter & sine glossa intelligatis, & cum sancta intentione obseruetis usque in finem. Hæc ibi. Ex quibus videtur quòd fratres possunt vnum eligere de duobus, aut institutorem ordinis sui Franciscum mendacium affirmasse, & ita esse damnatum, vel verum esse quod dixit, quòd scilicet suum testamentum non est alia regula, sed recordatio prius data: & ita sicut tenentur priorem regulam, sic & hoc testamentum tenentur seruare. Item cum Franciscus affirmet, quòd propter hoc ipse testamentum hoc fecit fratribus suis benedictis, ut regulam quam Deo promiserunt, meliùs catholicè obseruarent: aut aliud fecit mendacium, &

iterum dicent illum damnatum, aut testamentum suum seruando, suam regulam magis catholicè obseruarent:& per consequens sine obseruantia testamenti illius minùs catholicè suam regulam obseruant:& ita fuerunt in procurando declarationē contrariam respicientes retro,& in via regni Dei retrogradi & inepti, & sic inobediētiæ peccato infecti. Item cū ipse per obediētiā fratribus suis præceperit, quòd non adderent nec minuerent,& quòd istud testamentum semper iuxta regulam suam secum haberent, &c. quæ sequuntur: aut impiè in negotio tanti periculi præcepit, & astruere deberent propter hoc peccatum ipsum esse damnatum, aut iustè & sanctè ita præcepit. Et habent ostendere cur alleuiando tantæ sanctitatis pondus non respuerunt retro, sic se regno Dei faciendo ineptos. Item cū in his verbis Franciscus affirmet, quòd Dominus dedit sibi simpliciter & purè hanc regulam, & hæc verba dicere & scribere: aut propter tantum mendacium in exitu huius vitæ dicent eum dānatū, aut verè Dominus dixit sibi, vt ita diceret fratribus suis:& sic ipse diuinū mādatū in hoc fratribus suis dixit; & per consequēs nō obstante quòd illud testamentum

ratione mandati sancti Francisci non teneantur fratres seruare, nihilominus quia est mandatum Dei eis per sanctum Franciscum suum institutorem expressum, istud seruare tenentur. Eligant fratres quod uoluerint ex duobus, & puto quod eligent affirmare quod sanctè sine tantorum mendaciorum peccatis decessit : & sequitur quod fratres procurando litteras apostolicas contra mandatum Dei & suæ regulæ, se peccato inobedientiæ infecerunt. Loquor contra Fratres Minores diffusius super isto, quia ipsi Londonis inchoarunt negotium, occasionem aliis ordinibus ministrantes : & quia ipsi præ cæteris de perfectione Euangelica disputantes eam spontaneæ mendicitati ascribunt, in tantum, quod vnus de ipso ordine prædicando in festo omnium Sanctorum, vt mihi fuit reportatum, descriptis quatuor gradibus paupertatis, quartum perfectionis maioris, imò summæ perfectionis Euangelicæ affirmabat, scilicet nihil in mundo habere proprium aut commune, sed mendicare cum Christo : quod dictum vestrum statum, sicut & omnium nostrum, qui sumus inferiores, Pater Sanctissime, scandalizat. Et ob hoc super hoc, sicut super

aliis supratactis, *Nolite iudicare secundum faciem: sed iustum iudicium iudicate.* Videtur enim valde mirabile: imò veriùs loquendo verisimile non videtur, quòd per mille annos, & ferè ducentos nullus ordo erat in Christi Ecclesia militante, quam Ioannes Apostolus appellat Hierusalem versus finem Apocalipsis, xxi. cap. *Et ego Ioannes vidi ciuitatem sanctam Hierusalem nouam descendentem de cælo à Deo, paratam sicut sponsam ornatam viro suo; qui perfectionem euangelicam obseruauit: sed quòd Franciscus ad hoc primò ordinem adinuenit.* Si enim Ecclesia militans in verbis Ioannis (si pro quia) Hierusalem appellatur, cùm affirmet eam de cælo descendere: satis constat quòd tempore illo Ecclesia militans, quia de cœlesti triumphante descendens sui institutoris Christi perfectionem habebat, tanquam sponsa Christo sponso suo ornata, non erat ita deformis, vt apice summæ perfectionis careret, tunc & tot annis sequentibus. Quis tolerabiliter possit audire quòd Franciscus in fide nouitius, meliùs atque vtiliùs viam humanæ perfectionis instituerit, quàm Deus omnipotens, omnibonus, omniscapiens fecerat in hominis institutio-

ne primaria : quem tamen ita Deus instituit, quòd eo formato statim posuit in paradiso, vt operaretur & custodiret illum, initio sacrae Scripturae tradente, vbi operationem corporalem, sufficientiam ac possessionem bonorum immobilium, & eorū, quæ pro suo vsu, custodiam, mendicitati (vt mihi videtur) docuit præferendas: quoniam eum in paradiso posuit vt operaretur. Et alia scriptura concordat, *quia homo nascitur ad laborem, vt avis ad volatum*, Iob quinto. Et vt illum paradisum, scilicet tanquam suum, custodiret, in quo bonorum mobilium & immobilium affluentiam obtineret. Sed de isto infra loquar diffusius. Videtur igitur ex præmissis, quòd fratres procurando ista priuilegia se ipsos peccato inobedientiae iniecerunt. Item in procurando ista priuilegia fratres videntur peccatum auaritiæ incurrisse. Primò, quia non procurarunt sibi priuilegia alia super aliis articulis sacerdotalis officij, scilicet vt possent pueros baptizare, vt possent in subsidium curatorum in die Paschæ Parochianis Sacramentum Eucharistiæ ministrare, aut extremæ Vnctionis eis Sacramentum conferre: vbi esset tantum meritum pietatis, quantum

in istis aut ampliùs: sed super his solis priuilegia huiusmodi, omissis cæteris, procurabant, quibus directè vel indirectè commoda temporalia annectuntur; mirabiliores cunctis mercatoribus, & etiam artificibus in hoc effecti quoad lucrum, adiuncta sua professione quam fingunt super sua mendicitate seruanda. Non enim puto quòd erat à mundi origine via facilior siue calidior ad opes facilè acquirendas, quàm per præmissa priuilegia, mendicitatis sanctæ obligatione verè seu fictè adiunctâ. Item cùm constet quod non obstâte quòd fratres haberent potestatem liberam recipiendi ad sepulturam in locis ipsorum, nihilominus remanere poterat in suo robore ius commune, scilicet quòd omnes oblationes & omnia funeralia deberentur Ecclesiis, & ipsorum curatis. Quòd igitur vnum cum altero à fratribus fuerit procuratum, parenter videtur innuere, quòd illius procurationis auaritia causa erat. Est enim regula Aristotelis, primo Posteriorũ, Ad cognoscendũ alicuius passionis seu effectus subiectũ seu causã præcipuã, inquiretur, quæ est causa, qua immediatè posita ponitur ipse effectus, & qua percepta perimitur. Quæ regula satis affirmat, quòd commo-

dum temporale fuit in procuratione horum priuilegiolorum causa præcipua : cum non sine illa fiebat hæc procuratio , & ea sola fuerant procurata , quæ ista commoda obtinebant. Cuius rei satis patens est signum, quòd non more Thobiæ ad sepeliendum rapiunt corpora pauperum defunctorum : sed instar vulturum vltra mare ad quingenta miliaria sua alimenta odorando sentientium, ea quærunt : sicut dicit **Auerroes** commentator, secundo de anima, si bene recolo, cap. de odore. Hoc enim signum satis affirmat quòd fratres istud sepulturæ cum aliis annexis oblationibus priuilegium propter alimentum præcipuè, non propter misericordiæ exercendæ meritum , procurarunt. Item de priuilegio audiendi confessiones omnium indistinctè aliud probabiliter (vt videtur) suspicari non poterit, cum quisque sanctus præter ipsos audire confessiones horrescat : quoniam nimis est cuique peccata sua agnoscere , etsi aliena non, discat. Vnde nec monachi albi aut nigri , nec regulares, nec seculares canonici officium tale desiderant aut alij viri sancti. Nec dubium si ex deuotione sanctâ talis procuratio procederet , quòd in aliquibus aliis vi-

ris deuotis ; non in solis sanctis fratribus aliquoties appareret. Vnde probabiliter potest inferri, quod auaritia tanquam causa præcipua in tali procuratione mentem procurantis infecit. Item ad hoc, cum regula sancti Francisci præcipiat isto modo, Præcipio firmiter fratribus vniuersis, ne habeant suspecta consortia vel consilia mulierum : neque ingrediantur monasteria monacharum præter illos, quibus à sede Apostolica concessa fuerit licentia specialis ; aut fiant compatres virorum aut mulierum, ne hac occasione inter fratres vel de fratribus scandalum oriatur: fratres econtrario procurarunt, videlicet vt audire possent consilia secretissima mulierum, reginarum, & aliarum omnium indistinctè, etiam capite inclinato ad caput multum obedienter, non insequentes vestigia sancti Iob, qui dicit, *Pepigi fædus cum oculis meis, ne cogitarem de virgine: ita vt per tale consortium iam cum pulcherrimis dominabus philosophentur in cameris.* Vnde per orbem scandala, quæ nolo exprimere, de fratribus sunt exorta, 'patenter (vt multis videtur) per abusum huius priuilegij, imò per abusum suæ regulæ, à priuilegio occasione sumpta, inobe-

dientia peccato seipfos inficientibus. Item quòd horum priuilegiorum procuratio peccato superbia mentes procurantium infecerit, multipliciter suadetur. Primo, quia in decretali *Exiui de paradiso*, de verborum significatione, in Clementinis, affirmatur quòd sanctus Franciscus suos fratres in paupertate summa & humilitate fundare volebat. Et constat quòd procurare honoris Ecclesiastici statum sublimem, humilitatem impugnat, & ambitionis peccatum habet annexum: ergo &c. Probatur minor assumpta per auctoritates iam tactas, & per illud Saluatoris filijs Zebedæi responsum, *Nescitis quid petatis*, ipsis per matrem suam petentibus quòd *unus eorum sederet ad dexteram eius in regno suo, & alius ad sinistram*. Super quo dicit Chrysostomus in Opere imperfecto, *O error salutaris qui totius mundi soluit errorem. Si enim Apostoli non errassent: unde nos cognoscere poteramus quia non omne, quòd videtur bonum, desiderare bonum est. Nunc autem scimus quia aliud est opus bonum: aliud primatus honoris; & citò post, Nam desiderium primatus ex iactantia nas-*

titur cordis : qui autem est humilis corde , nunquam desiderat superior apparere. Et infra , *Secularem quidem primatum desiderare etsi ratio non est , vel causa est ; etsi iustum non est , vel utile : primatum autem Ecclesiasticum concupiscere neque ratio est , neque causa ; quia neque iustum est neque utile.* Hæc ibi. Et multa addit similia quibus nititur suadere quòd nunquam sine ambitione desideratur primatus in Ecclesia. Constat autem quòd habere statum prædicandi & confessiones audiendi est in Ecclesia status honoris siue primatus. Inficit se ergò peccato superbiæ , qui illum procurat. Item confirmatur hoc aliter. Cùm enim Apostolus dicat : *Quomodo prædicabunt nisi mittantur ? sicut scriptum est , Quàm speciosi pedes evangelizantium pacem , evangelizantium bona ?* Rom. x. cap. Nec ipsi sunt missi à Deo ad illud officium per aliquid quod ego viderim hucusque : sed videtur quòd ex præsumptione propria ad officium illud ascendunt. Caueant ne aliunde quàm per Christum ostium , vt latrones intrent , & ab eo iudicentur vt fures : iuxta dicta ipsius Ioannis x. cap. Amen.

amen dico vobis, Qui non intrat per ostium in ouile ouium, sed aliunde ascendit, ille fur est & latro. Et consequenter affirmat, Ego sum ostium: & sic videntur esse de eis, aut eis similes, de quibus dicitur propheticè Hieremiæ xxii. Non mittebam Prophetas, & ipsi currebant: non loquebar ad eos, & ipsi prophetabant. Vnde citò adiungitur, Ecce ego ad Prophetas, dicit Dominus, qui furantur verba mea unusquisque à proximo suo. Si enim non sunt missi à Christo, ipsi furantur verba curatorum & superiorum suorum, quibus solis de iure communi officium prædicandi dicitur conuenire. Item quòd obseruantia priuilegiorum istorum inficiat obseruantes modo præmissò, etiam suadet, quoniam nec præcipitur fratribus, nec ad eorum professionem seu regulam pertinet prædicationis officium exercere. Vnde liberum eis videtur prædicare in publico, aut confessiones audire. Cùm ergò officium tale volunt admittere, peccare mortaliter videntur. Primò, quia noscunt aut scire deberent quòd priuilegia ipsa erant procurata mediantibus peccatis mortalibus supratàctis, & pro vsu ipsorum. Cùm ergò illis vtuntur, gratificant procuratio-
nem

nem iniquam: sicut quis manducans de rapina aut furto obtento pro usu ipsius, gratificaret manducando ipsam rapinam aut furtum: & possidens beneficium ad eius commodum simoniacè procuratum communicaret cum procurante in simoniæ peccato, & illud gratum haberet, & esset sub illo decreto Apostoli ad Rom. primo cap. *Qui talia agunt a igni sunt morte: non solum autem*, &c. vt supra posui. Nec excusari per concessionem siue licentiam domini Papæ poterunt, vt videtur; quoniā dominus Papa in sua concessione obstantiam illam non posuit, nec eum eam ponere decuisset, scilicet, *Cōcedimus ista fratribus, non obstante conscientia eorum peruersa: sed solas instantias iurium humanorum videtur intendere relaxare*: sicuti si homicidæ, aut simoniaco, aut habenti corporalem defectum latentem, qui eum redderet inhabilem, concederet facultatem plura beneficia curata retinendi; non propter hoc potest inferri quod licitè siue iustè illa poterit retinere, sed iustè secundum quid, scilicet quantum ad hoc quod non impugnaret illius legis obstantiam: & sic, si beneficia retineret, non obstante dispensatione, peccaret mortaliter. Sic enim mihi

obstante titulo acquisito per dominum
summum Pontificem restituere indirectè,
licet non directè, arctari videntur: quo-
niam dominus Papa illam culpam grati-
ficationis præactam in concedendo priui-
legium non relaxat: imò nec potuit rela-
xare fratribus ipsis non verè pœnitentibus
aut contritis. Et quamdiu illud peccatum
manet in fratribus, non possunt (vt vide-
tur) veraciter pœnitere, nisi iura subtra-
cta rectoribus, quantum in eis est, re-
stituunt. Vnde videtur quòd fratres, quan-
diu non restituunt illa iura, quamvis etiam
propter concessionem domini Papæ fa-
ctam fratribus non debeantur de lege hu-
mana curatis, nō possūt veraciter pœnitere.
Quis enim verè pœniteat de alicuius rei
acquisitione iniqua, & nihilominus de eius
retentione lætetur? Nemo, vt videtur pro-
babiliter iudicandū. Fratres igitur ipsa pri-
uilegia obseruantes, sunt peccatis præactis
mortalibus inuoluti siue infecti. Itē de ista
licentia in casu cōsimili tractat beatus Ber-
nardus diffusè in secūda epistola ad Adam
monachū. Et est casus quòd ille monachus
post professionē suā in monasterio suo fa-
ctam quod perpetuā moram ibidem, sicut
habent de more, vt dicitur, ad aliud mo-

nasterium cum suo abbate accessit : vbi moratus est de licentia sui abbatis & eius mandato, petita etiam super hoc summi Pontificis licentia & obtēta: quem Bernardus apertè redarguens nititur ratione multiplici affirmare, quòd nec sine peccato, etiam de iussu sui abbatis, poterat hoc facere, nec de licentia summi Pontificis, cuius licentiam petere non debebat. Ad suadendum primum supponit vnum principium, quod etiam Aristoteles tertio. Ethicorum describit & ponit, scilicet quòd sunt aliqua bona simpliciter bona, quæ fieri malè non possunt, & aliqua mala simpliciter, quæ fieri bene non possunt. Et inter ista extrema sunt media, quæ bene fieri possunt & malè. Exempla primi sunt secundum eum, charitas, fides, & spes. Exempla secundi furtum, homicidium, incestus, & istis similia. Exempla tertij gradus sunt lectio, ieiunium, & istis similia, quæ etiam bene & malè possunt fieri iuxta conditiones annexas, in quibus solis, vt sibi videtur, obedientia locum habet. Hoc posito: inquit in quo gradu sit hoc factum, in quo paruit iussui sui abbatis; & affirmat quòd fuit in secundo, scilicet in gradu malorum simpliciter: ex hoc (vt sibi vide-

tur) verè concludens, quòd non potuit bene fieri, & ob hoc in hoc facto iussui sui abbatis parere non debuit, sed planè resistere, quia in tali opere de se malo, scilicet in dissolutione promissi, abbati debebat obistere. Item ponit pro regula quòd duobus præcipientibus contraria, potiùs maiori est parendum. Cùm igitur Deus præcipiat vota seruare, & obedientiam sibi debere seruari: si abbas suus Deo inferior præceperit illud dissoluere, debebat Deo potiùs obedire, mandato sui abbatis contempto. Item sanctus Bernardus allegat illud Saluatoris Matth. xviii, cap. *Qui scandalizauerit unum de pusillis istis qui in me credunt, expedit ei, vt suspendatur mola asinaria in collo eius, & demergatur in profundum maris. Va mundo à scandalis: necesse est enim vt veniant scandala: veruntamen va homini illi, per quem scandalum venit.* Atque adiungit quòd iste Adam monachus suum monasterium deferendo, non solùm scandalizauit vnum Christi pusillum, sed multos. Ex hoc apertè (vt sibi videtur) concludens, quòd ipse vix illud Saluatoris incurrit sua abbati parendo in casu præmisso. Vtinam igitur fratres attenderent qualiter istorum

priuilegiorum abusu ab eis non solùm scandalizantur pauci pusilli, sed pusilli & magni per totam Christi Ecclesiam : & ex illo coram Deo sanctè concludetur quid merentur. Et multa alia ibi adduxit. Item, quantùm ad licentiam Summi Pontificis, dicit apertè quòd affert mali compendium, quia non excusat factum sequens de se malum : & eius petitio fuit mala : quoniam, vt dicit, velle habere ad malum licentiam, semper est malum. Item quantùm ad Dominum Papam concedentem licentiam, ipsa sic dicit, Quis malum esse neget assensum præbere malo? Quod tamen fecisse summum Pontificem nequaquam crediderim, nisi aut circumuentum mendacio, aut importunitate victum. Hæc est sancti Bernardi sententia. Videant ipsi fratres an non ita sit contra istam licentiam impetratam per eos, sicuti contra Adæ monachi licentiam procuratam, & cum sancto Bernardo concludant, quòd peccatum procurationis licentiæ cum inobedientia & solutione suæ regulæ subsecuta; affert eis mali compendium, sicut ipse Bernardus affirmat in simili. Item ex quo quisque frater, cùm prædicationis officium, aut audiendæ confes-

sionis exercet, posset id respuere sine peccato; consequitur (vt videtur) quòd ipse illud officium tunc contra suam professionē gratis assumit : & ita sicut in procuratione priuilegiorum parum superiùs est suatum, quòd procurantes peccauerunt mortaliter contra diuina præcepta ibi expressa : sic iste peccat mortaliter contra eadem diuina mandata liberè vtendo licentia impiè procurata, & inficitur peccatis iniuriæ, inobedientiæ, auaritiæ, atque superbiæ, vt videtur; cùm ex eisdem causis iniquis ipse vtatur licentia procurata, ex quibus aliud procurauit, scilicet propter ditationem & honorem. Vtinam adulterium huius vfus licentiæ causa tertia non existat, licet super hoc in clero & in populo sit communis fama. De ista priuilegiorum materia & eorum abusu & contrarietate ad professionem fratrum; & quoad duas conclusiones per me suasas superiùs, ista mihi sufficiant in præsentì. Alia plura, si oportebit, adiiciā, & non ambigo, quin, si nollem illud facere, alij non omitterent. Super istis omnibus per me modò petitis atque expressis, Pater Sanctissime, *Nolite iudicare secundum faciem: sed iustum iudicium iudicate*, per vestram Sâctitatē, aut per ali-

quos meos dominos Cardinales, suspenso
usu priuilegiorum præactam per me ma-
teriam contingentium in quacumque sui
parte, lite pendente: & prædicta con-
stitutio declaretur, si id fuerit visum iu-
stum.

Prima conclusio erat, quòd Dominus Ie-
sus Christus in conuersatione sua humana
semper pauper erat, non quia propter se
paupertatē dilexit aut voluit. Verùm quia
quoad paupertatem, quam Dominus no-
ster sustinuit, mihi aduersantes & ego non
fuimus contrarij, sed quoad modificationē
adiectam, non quia propter se paupertatem
dilexit aut voluit, illam particulam suade-
bo. Primò, quia esse pauperem est esse mi-
serum siue in miseria: nemo verò propter
se diligit miseriam: ergo nullus propter se
diligit paupertatem. Item secundum do-
ctrinam Aristotelis primo Ethicorum: Ni-
hil est propter se diligibile, nisi quod subla-
to omni commodo subsequente gratuite
captaretur: paupertas verò, et si propter eius
tolerantiam homines mereantur, tamen si
nihil commodi propter eius tolerantiā se-
queretur, nec à Deo, nec ab homine, nec
à diabolo captaretur: igitur paupertas à
Christo nunquam propter se est dilecta

Item nullus effectus peccati est propter se diligibilis: sicut nec ipsum peccatū est propter se diligibile, etiam si corrupto animo diligatur: paupertas verò est effectus peccati: ergò, &c. Probatur minor, quoniam si primi parentes nostri innocentiam tenuissent, nunquam de nostra progenie pauper aliquis extitisset. Item nulla priuatio boni est propter se diligibilis, cum omnis habitus bonus sit propter se diligibilis: & iuxta regulam Philosophi tertio Topicorum, si propositum de proposito, & oppositum de opposito; ita quòd si habitus est bonus, priuatio eius est mala, & si priuatio est bona, habitus eius est malus: Ditatio verò, qui est habitus, bona est & Deo amabilis, cum ipse summè sit diues: ergò paupertas, quæ ditationem priuat, est mala: non est ergò propter se diligenda paupertas. Et videtur mihi nimis puerile ad istud probandum insistere, cum nemo (ut puto) nisi propter defectum in Philosophia aut in Logica diceret oppositum.

Secunda conclusio erat, quòd Dominus noster Iesus Christus nunquam spontaneè mendicauit. Quam sic primò suasi. Si ipse spontaneè mendicasset, contra diuinum mandatum egisset, *Non concupisces domum*

*proximi tui: non desiderabis uxorem eius, non seruum, non ancillam, non bouem, non asinum, nec omnia quæ illius sunt, Exodi xx. cap. quoniam qui spontaneè mendicat, petit & per consequens concupiscit rem proximi sui: igitur qui spontaneè mendicat, facit contra diuinum præceptum: quod de Christo nemo auderet astruere. Item si Christus spontaneè mendicasset, aliud mandatum diuinum soluisset, scilicet, *Omnino indigens & mendicus non erit inter vos. Deuter. xv. cap. quoniam non solùm solueret legem regiam præcipientem, quòd in ciuitate nõ sit quispiam inermis, qui permetteret alios esse inermes, cum posset aliis de armis succurrere. Sed & ille, qui cum posset remanere armatus, arma sua sponte in flumine demergeret. Sic ille sacerdos in Ecclesiæ legem delinqueret, qua Sacerdotibus est præceptum, vt offerant dona & sacrificia pro peccatis, qui ad hoc sponte se redderet impotentem siue inhabilem. Sed nemo (vt æstimo) auderet de Salvatore asserere quòd fecerit contra diuinum mandatum: nunquam ergò spontaneè mendicauit, gratis se faciens mendicum. Nec fingere quis potest quòd præmissum præce-**

ptum est carimoniale, cum sit verè morale
& arctius in lege noua, quàm in lege anti-
qua expressum : cum Saluator præcipiat
Lucæ xi. cap. *Quod superest date eleemo-
synam : & ecce omnia munda sunt vobis.* Vbi
quidquid est vltra sufficientiam præcipitur
dari, vt nullus mendicus aut omnino egens
in plebe remaneat : & non seruanti com-
minatur pœna æterna, Matthæi xxv. isto
modo, *Esuriui, & non dedisti mihi man-
ducare, &c. Ite maledicti in ignem eter-
num, qui paratus est diabolo & angelis
eius.* Vnde clarescit, quòd arctius Chri-
sticolæ obligantur ad non permittendum
inter eos mendicos, quàm homines sub le-
ge antiqua. Item Christus imperatorix le-
gi erat subiectus, quoniam & soluit tribu-
tum Cæsari, sicut legitur Matthæi xvij.
cap. Vbi sic dicitur, *Et cum venissent Ca-
pharnaum, accesserunt qui didrachma ac-
cipiebant, ad Petrum, & dixerunt ei: Magi-
ster vester non soluit didrachma? Ait: Etiam.
Et cum intrasset in domum, præuenit eum
Iesus, dicens: Quid tibi videtur Simon?
Reges terra à quibus accipiunt tributum
vel censum? a filiis suis, an ab alienis?
Et ille dixit, ab alienis. Dixit illi Iesus:
Ergò liberi sunt filij. Vt autem non scan-*

dalizemus eos, vade ad mare, & mitte ha-
mum: & eum piscem, qui primus ascendcrit,
tolle: & aperto ore eius, inuenies staterem: illū
sumens, da eis pro me, & te. Hæc ibi. Et de-
 creuit tributum illi esse soluendum, cū
 quærentibus ab eo, *an liceret censum dare*
Cæsari, obtulerunt ei denarium, cuius super-
scriptio Cæsaris erat: & ait illis, Reddite ergo
quæ sunt Cæsaris, Cæsari, & quæ sunt Dei, Deo,
 Matthei. xxij. cap. Nec fuisset conueniens
 (vt videtur) quòd ipse tanquam legem co-
 munem decreuisset esse seruandam, quam
 subire nolebat. Voluit igitur tali legi esse
 subiectus. Sicut erat subiectus Ioseph fa-
 bro, tantò magis (vt videtur) voluit esse
 subiectus legi Imperatoriæ, quia fuerat na-
 turalis: quæ præcipiebat vt mendicantes va-
 lidi non remanerent in ciuitatibus: & quā-
 tò magis nec mendicantes spontaneè in
 ciuitatibus debuerant remanere? Item si
 Christus spontaneè mendicasset, legem de
 dilectione proximi mendicando soluisset;
 quoniam qui verè diligit proximum suū,
 sicut seipsum, non vexat eum indebitè; si-
 cut nec vellet seipsum à proximo vexari
 indebitè: Petere verò à proximo quod suū
 est, non egendo, est ipsum vexare indebitè:
 Christus ergò nunquam sic egit. Item cū

Scriptura dicat, Proximo suo pauper odiosus erit, Prouerbiorum xiiij. cap. quantò magis mendicus proximo redditur odiosus? Si ergo Christus spontaneè mendicasset, sponte se reddidisset proximo suo odiosum: quod non videtur, nisi alia rationabilis caussa subesset. Item si Christus spontaneè mendicasset, offendiculum euangelio suo posuisset, quod ipse miraculis confirmauit, quoniam audientes eius doctrinam, & videntes eius miracula rationabiliter (vt videtur) potuissent dicere, illa potiùs esse illusiones, & magica quàm vera miracula, eùm sit verisimile, quòd quilibet sibi potiùs ac priùs succurrere deberet quàm alteri. Quomodò ergò pasceret ista quatuor aut quinque millia hominum faciendo miraculum, qui sibi non poterat procurare victum: sicut aliàs illudebant ei in cruce pendenti, ita dicentes. *Alios saluos fecit: seipsum non potest saluum facere. Si Rex Israël est, descendat nunc de cruce, & credimus ei,* Matthæi xxvij. cap. Item si Christus spontaneè mendicasset, legem suam propriam (quam dicit esse legem & Prophetas) soluisset; *Omnia quacunque vultis vt faciant vobis homines, vos facite illis: hæc est enim lex & propheta,* Matthæi vij. cap. quoniam nec

ipse aliis velle debebat vt sine proximi indigentia inquietarentur ab eo: quod tamen facit quisque sponte, scilicet non egendo, mendicans. Item Paulus Apostolus I. ad Timoth. vj. cap. condemnat eos, qui quæstū æstimant pietatem: quidquid verò Paulus condemnat, Christus per Paulum condemnat, qui euangelium suum accepit per reuelationē ipsius, vt ipse Paulus affirmat ad Galatas primo capit. Igitur si Christus spontaneè mendicauit, cū spontaneè mendicare sit quæstum expetere, vel veriùs procurare, Christus exercuit per seipsū quod condemnauit per Paulum, & erat sibi contrarius, quod nefas est dicere: ergò Christus nunquam spontaneè mendicauit. Item si Christus spontaneè mendicauit, Christus factio fecit mendacium; quoniam ita quis factio contra mentem agendo, sicut verbo, mentitur: qui verò non egendo, sed spontaneè postulando eleemosynam, affirmaret verbo se esse egenum siue mendicum, mentiretur in verbo. Igitur qui ita petit eleemosynam non egendo, factio mentitur, quod nemo dicet de Christo. Item si Christus spontaneè mendicauit, verè fuit hypocrita, apparens mendicus, non verè mendicus existens: Christus verò nūquam

fuit verè mendicus, quoniam nullus est verè mendicus, quamuis mendicet, sed fictus, qui sibi potest sufficere: qui verò mendicat spontaneè, est sibi sufficiens; aliàs non spontaneè, sed impellente indigentia mendicaret: Christus ergò ex quo non erat hypocrita, nunquam fictè aut spontaneè mendicauit. Item si Christus spontaneè mendicauit, cur Petrus Apostolus matrem sancti Clementis discipuli sui, quam ad laborandum manibus æstimabat fuisse robustā, quia eā inter mendicantes reperit, acriter increpauit: sicut fecisse legitur in vita sancti Clementis? Ex quo in hoc secuta est Christum; qui Christū dicūt spontaneè mēdicasse, habent ostendere, quod, vt videtur, non possunt. Nunquam ergò Christus spontaneè mēdicauit. Item si Christus spontaneè mendicauit, Clemens Petri successor multum errauit, qui mēdicatam in cūctis conuersis ad fidem pro viribus excludere laborauit; ex hoc specialiter ab Ecclesia cōmendatus: cū mendicitas ipsorum perfectionem secundum istam philosophiam auxisset. Item si Christus spontaneè mēdicauit, cur Clemens Iacobo Hierosolymitano Episcopo in epistola sibi directā, vt ponitur in Decretis xij. quæstione i. cap. Dī-

lectissimis; Doctrinis & exemplis Apostolorum obedire præcepit, si mendicare ad perfectionem vitæ pertineat, & inter Apostolos & discipulos (vt ibi præmittitur) nullus erat egens. Sic dicentes habent ostendere. Item si Christus summus Sacerdos existens spontaneè mendicauit, Ecclesia sancta scienter errauit, cum statuit nullum debere sine sufficienti titulo ad sacros ordines promoueri, cum caput Ecclesiæ suo exemplo docuerit mendicandum. Item si Christus spontaneè mendicauit, scandalum intulit ordini clericali, cum iuxta canonicas sanctiones Episcopus, aut clericus mendicans inferat ordini clericali opprobrium. Item si Christus spontaneè mendicasset, reddidisset seipsum de peccato suspectum: quoniam sibi verecundiam intulisset; cum non aliunde præcipuè dicatur spontanea mendicatio meritum mendicanti acquirere, nisi quia est actus humilis atque difficilis propter annexam erubescentiam naturalem: erubescencia verò siue verecundia non cadit in hominem studiosum: sicut affirmat Aristoteles quarto Ethicorum in fine: non ergò erat in Christo: & per consequens nec spontaneè mendicauit. Item si Christus spontaneè mendica-

uit;

uit, mendicare spontaneè ad perfectionem vitæ pertinuit, ineptè igitur dedit Dominus legem antiquam, statuens vt sacerdotes, in quibus debebat esse summa vitæ perfectio, possessiones haberent & decimas, si eis fuisset perfectius medicare. Itē totus mūdus sub lege naturæ errasset, statuens sacer, dotibus de publicis horreis certa cibaria, sicut legitur in fine Genesis, si eis fuisset amplioris meriti medicare. Itē si Christus spontaneè mendicauit, tunc mendicitas ad perfectionē euāgelij pertineret; & Ecclesia Dei errauit sciēter, dotationē Ecclesiarū admit- tens; & sic perfectionē suorū prælatorū imminuens, quod dicere nefas mihi videtur: licet nescio quæ sōnia ferāt cōtrariū. Item si sic mendicatio siue mēdicitas ad perfectionē vitæ pertineret christianæ, vt à fratribus mendicātibus affirmatur, cur nec Christus, nec Spiritus sanctus in Scripturis sacris super hoc alicubi nos instruxit? Videtur nimis mirabile, nec verisimiliter credi potest: & puto quòd erit mirabilis qui à principio sacrae Scripturæ vsque in finem vnū ad hoc verbum notabile poterit inuenire, quod ad illum sensum sit dictum.

Itē cū Christus discipulis suis promiserit,

F

Cum autem venerit ille Spiritus veritatis, docebit vos omnem veritatem, Ioan. xvj. cap. aut Spiritus Sanctus sui officij erat oblitus, quando venit ad Apostolos in die Pentecostes, non docens hanc veritatem mendicitatis Apostolos; cum de hoc penitus in eorum actibus nihil appareat: aut ipsi posteris inuidentes veritatem eis edoctam à Spiritu Sancto eis tradere noluerunt: quorum neutrum prouidus homo affirmabit: non ergò pertinuit spontanea mendicatio siue mendicitas ad tradendam per Apostolos veritatem. Item quid dicetur de Melchisedech, qui erat sacerdos Dei altissimi, & rex Salem, quem supra Abraham Paulus extollit, ad Hebræos vij. cap. Quante sine mendicatione spontanea tantus erat? Cur ipse, secundum cuius ordinem Christus erat sacerdos, non vt Christus spontaneè mēdicauit ordinē suum tradens? Habent contrarium affirmantes ostendere. Item, cum Propheta dicat propheticè, *Non vidi iustum derelictum, nec semen eius querens panem*: cur econtra Christo, qui erat iustissimus, ascribitur contra sermonem propheticum, quòd panem mendicando quæsiuit? Rationabile non videtur. Item, si Christus spontaneè mēdicauit, cur

mittens discipulos ad euangelium prædicandum non id eis præcepit : sed directè contrarium ; scilicet vt de mercede laboris sui manducarent & biberent, ita dicens. *In quancunque domum intraueritis, in eadem domo manete edentes & bibentes quæ apud illos sunt : dignus est enim operarius mercede sua*, Luce x. cap. Item si Christus spontaneè mendicauit, nunquam laborem ad victum acquirendum mendicationi præposuit : quoniam si econtra fecisset, & tamen laborem aliquoties prætulisset, nullus ex eius operibus didicisset, nunquid eligibilius esset, videlicet victum sine mendicatione manuum labore perquirere, an labore postposito medicare. Quòd autem Christus victum laborando sibi acquisiuit, per hoc videtur probabile, quod à vulgo vocatus est nō solum filius fabri, sed faber : quoniam ex hac appellatione vulgari videtur, quòd pro victu suo cum Ioseph patre eius putatio opus fabrile exercuit. Pro ista conclusione ad nunc ista sufficiant, donec per aduersantes fortiora adducenda ista impugnent.

Tertia conclusio huius materiæ fuit, quòd Christus nunquam docuit spontaneè mendicare. Hæc taliter suadetur: *Ceri-*

stus cæpit facere & docere, Act. i. cap. Si igitur Christus mēdicare spontaneè docuisset: cū iuxta præcedentem conclusionē nunquam spontaneè mendicauit, fuisset sibi cōtrarius (vt videtur) in opere & sermone, scilicet docens & non faciens: quod verisimile non videtur. Itē si Christus nunquam spontaneè mendicauit, & alios docuit mendicare: reddidisset se de sua doctrina suspectum: sicut in argumento 6. conclusionis prioris. Item potuisset offendiculum euangelio suis Apostolis, sicut deducitur in 6. argumento ibidem. Item sic docendo, legem imperatoriam iustam soluere docuisset: sicut ibi in 3. argumento. Item si docuisset spontaneè mendicandū, docuisset contra leges superiūs allegatas & rationes quasi omnes ad præcedentem conclusionem adductas, quæ ita istam sicut illam affirmant. Item, si Christus docuisset spontaneè mendicandū, tūc Petrus particeps huius doctrinæ minūs prudenter egisset in allegando causas meritorias præmij sibi reddendi, illā tam sublimem secūdum istos causam merendi omittens: cū dicit, sicut legitur Mat. xix. cap. *Ecce nos reliquimus omnia, & secuti sumus te*: non addens, & mendicauimus spontaneè propter te: quod quia nō fecit, cōsequi satis videtur, quod il-

la cōditio ad statū perfectionis nō pertinet.

Quarta conclusio fuit quòd dominus noster Iesus Christus docuit nō debere homines spontaneè mendicare: sicut scribitur Lucæ xiiij. cap. Cū facis conuiuium, voca pauperes debiles, claudos & cēcos, & beatus eris: quia non habent vnde retribuere tibi possint. Igitur non debent vocari ad mendicorum conuiuium pauperes fortes siue robusti: quia possunt retribuere, saltē suo labore: sicut nec diuites debiles, claudi, aut cæci debent ad tale conuiuium vocari, quia habent vnde retribuere possunt. Non cerno cur surdos, mancos, aut mutos non nominat inter vocādos, nisi quia ipsi, si nec sint debiles nec claudi, nec cæci, possunt mendicando transire de loco in locū; quod facere nequeunt debiles claudi, & cæci. Sed domini fratres istam expositionē ponunt inter errores. Itē Paulus Apostolus tanquā decretū affirmat, *Qui non vult operari, non manducet*, loquens de hominibus, qui aliūde victū de certo non habent, 2. ad Thess. iij. cap. Et sequitur pœna, quam præcipit nō parenti suis dictis infligi, *Quòd si quis non obedierit verbo nostro per epistolam: hunc notate, & ne cōmisceamini cum illo, vt confundatur.* Nec dubium quòd non præci-

peret tam grauem pœnam negligenti laborare, nisi valde graue in tali casu delictũ cõmitteretur. Præmittit enim ibi de seipso hoc modo, *Ipsi enim scitis quemadmodum oporteat imitari nos; quoriam non inquieti fuimus inter vos: neque gratis panem manducauimus ab aliquo, sed in labore & in fatigatione, nocte & die operantes, ne quem vestrũ grauaremus. Non quasi non habuerimus potestatem: sed ut nosmetipsos formam daremus vobis ad imitandum nos. Nam & cùm essemus apud vos, hoc denuntiabamus vobis, ut qui non vult operari, non manducet: vbi fatis appareret quod à fortiori volebat arguere, scilicet ex quò ipse, qui potestatem habuit sumendi carnalia ab his, quibus tanquam verus Apostolus seminabat spiritualia, ne quemquam grauaret, sed potius nocte & die in fatigatione erat, atque labore pro victu: tantò magis alij potestatem huiusmodi non habentes laborare deberent, non inquietando alios men licare. Et vti nam hi homines, qui laboritium mendicationi postponunt, attenderent librũ beati Augustini de opere monachorum, vbi hanc quæstionem pertractans per totum librũ vsque prope finem conatur ostendere quòd labor debet oti*

contēplationis præferri, cuius in præfenti rationes omitto, sed aliàs eis vtar. Item ex quo sacra Scriptura pigrum hominem reprehēdit hoc modo, *Vsq̃uequò piger dormis? &c. paululum conferes manus, ut dormias: & veniet tibi quasi viator egestas, & pauperes quasi vir armatus.* Prouerbiorum vi. & xx. cap. *Propter frigus piger arare noluit: mēdicabit ergo æstate, & non dabitur illi.* Et mulierem fortem, cuius digiti apprehenderunt fusum, cōmendat, Prouerb. xxj. cap. Constat quod per hoc dissuadetur mendicationis otium labore neglecto. Item S. Franciscus in suo testamento sic dicit: *Et ego manibus meis laborabam, & volo laborare: & omnes alij fratres firmiter volo, quod laborent de laboritio, quod pertinet ad honestatem: & qui nesciunt, discant, non propter cupiditatem recipiendi mercedem laboris: sed propter exemplum boni operis, & ad repellendum otium: & quando non datur nobis pretium laboris, recurramus ad mēsam Domini petendo eleemosynas ostiatim.* Hæc ibi. Et in regula sua sic dicit, *Fratres illi, quibus gratiam Dominus dedit laborandi, laborēt fideliter & deuotè.* Vnde est valde mirandum qua fronte fratres audeant aut spontaneā mendicationem exercere, aut mē-

dicationem labori ecōtrario suo institutori
 præferre. Et eò ampliùs est mirandū quòd
 homo ad laborem nascitur, vt dicitur Iob
 v. cap. & mendicare est contrā legē institu-
 tionis nostræ primariæ, qua seruata nullus
 fuisset vnquam mendicus siue mendicans.
 Item Christus in hoc non mendicare spō-
 tanèè docuisse videtur, quòd ipse in sua per-
 sona vti potiùs miraculo voluit, quàm vo-
 luit mendicare: scilicet cū misit Petrum
 ad mare, vt staterem in ore piscis inuentū
 reciperet, & exactoribus didragmatis pro
 se & pro Petro Petrus exolueret; cū ta-
 men eo casu tam honoratus in populo sta-
 terem mendicandofacilè impetrasset. Item
 alia facta eius idē videntur ostendere: quo-
 niā potiùs vsus fuisse videtur illa lege di-
 uina: *Dignus est operarius mercede sua*, Lu-
 cæ x. cap. ac Mat. x. *Dignus est operarius ci-
 bo suo*: sicut discipulis suis indixit, quando
 a sinā, cui insedit, sibi iussit adduci: & quan-
 do apertè Zachæo præcepit, *Zachæe festi-
 nans descende, quia hodie in domo tua opor-
 tet me manere*. Vbi tanquam ad hoc pote-
 statem habēs apertissimè imperauit, *Festi-
 nans descende*. Sic quando erat in templo,
 & circumspectis omnibus, cū iam vespè-
 ra esset hora, exiuit in Bethaniā cum duobus

decim, sicut legitur Mar. xi. potius illo iure
 uti voluit, quam ab aliquibus mendicare.
 Prius enim in Bethania euangelium nun-
 ciabat. Aut si potestate hac usus non fuerat,
 sed declinabat ad amicos: tunc saltem ma-
 luit amicos suos onerare; quam ab aliquo
 mendicare: sic suis operibus nobis osten-
 dens, quod non, nisi impulsu egestatis, de-
 bemus ab aliquo mendicare. Itē hoc aper-
 tē pręcepisse videtur discipulis suis eos mit-
 tens, *Nolite transire de domo in domum*, Lu-
 cę x. cap. quod tamen de cursu communi
 oportet facere mendicantes, scriptura ni-
 hilominus alia affirmante, *Vita nequam ha-
 spitari de domo in domum*. Ecclesiast. xxix.
 cap. Sacra Scriptura alibi talem mendicita-
 tem pariter reprobante, hoc modo, *Pes fa-
 tui facilis in domo proximi*, Ecclesiast. xxi.
 cap. & Ecclesiast. xl. cap. *Fili mi tempore
 vite tue ne indigeas: melius est enim mori
 quam indigere. Vir respiciēs in mensam alie-
 nam, non est vita eius in cogitatione victus;
 alit enim animā suam cibis alienis. Vir autē
 disciplinatus & eruditus custodiet se in ore
 imprudētis candulcabitur inopia: & in vētre
 eius ardebit ignis. Hęc ibi. Itē iuueni, ut es-
 set perfectus, ita cōsultuit, ut vēderet omnia
 sua, & daret pauperibus, & sequeretur eum;*

vbi sequelam, non dubium, in modo viuendi debemus accipere. Cum igitur secunda conclusio firmavit quòd Christus nunquam spontaneè mendicauit: consequitur quòd sine spontanea mendicatione docuit iuuenem debere ipsum sequendo esse perfectum: & sic saltem perfectos docuit non debere spontaneè mendicare. Ex his probabiliter potest inferri, quod Dominus noster Iesus Christus docuit hominem non debere spontaneè mendicare.

Quinta conclusio huius materie mendicitatis erat, quòd nullus potest prudenter & sanctè spontaneam mendicatem super se assumere perpetuò obseruandam, Ista sequitur planè ex aliis suprà suis, quoniam ex quo talis mendicitas vel mendicatio est dissuasa à Christo, à suis Apostolis & discipulis, & ab Ecclesia ac sacris scripturis, ac etiam reprobata: consequitur quòd non potest prudenter & sanctè assumi hoc modo: quamuis secundum æmulationem Dei possit assumi; sicut Marcus imprudenter, etsi zelo bono, pollicem sibi præcidit. Item sic mendicatem assumens se in tentationem inducit contra doctrinam Oratio-

nis Dominicæ Matthæi vj. cap. *Et ne nos inducas in tentationem.* Quâ enim conscientia potest quis petere à Deo, ne Deus inducat eum, seu permittat induci in tentationem, qui se spontaneè in tentationem inducit? Quæ enim est maior tentationis occasio, quàm mendicitatem assumere? Cùm Salomon aper-
tè dicat & pronunciet: *Mendicitatem & divitias ne dederis mihi: sed victui meo tantum tribue necessaria, ne forte satiatus illiciar ad negandum te, & dicam, Quis est Dominus? & egestate compulsus furer & periurem nomen Dei mei,* Proverbiorum xxx. cap. vbi patenter ostendit quòd mendicus ad furtum & periurium nominis Dei sui facile impulsu egestatis vrgetur. Vnde Ecclesiastici xxvij. cap. dicitur, *Propter inopiam multi deliquerunt.* Constat ergò quòd qui mendicitatem super se sponte assumit, occasionem grauem & facilem tentationis assumit.

Item mendicitatem assumens ad officium sacerdotale, imò ad omnes ordines sacros (vt videtur) se reddit inhabilem, cùm sine titulo sufficienti de victu & vestitu secundum leges Ecclesiæ

statum talem habere non possit : quod non videtur providè esse factum, sed potius imprudenter. Item taliter mendicitatem assumens se arctare videtur ad Dei leges prædictas in conclusione secunda de Christi mendicitate soluendas ; scilicet, *Non concupisces domum proximi tui*, &c. *Et, Omnino egens & mendicus non erit inter vos.* ; *Et, Omnia quacunque vultis*, &c. Et ferè rationes omnes trium conclusionum præcedentium hanc conclusionem ut illas, affirmant. Vnde non video, ut in sermonibus, de quibus in propositionis istius principio mentionem iam feci, qualiter ista opinio de observantia mendicitatis spontaneæ fuerit introducta : nisi aut ignorando scripturas, aut ut fingendo eam esse Christi vitæ conformem, per ipsam quæstus amplior haberetur.

Vnde sexta conclusio materiæ huius erat, quod non est de regula Fratrum Minorum mendicitatem spontaneam observare, sicut oculatâ fide poterit suaderi per hoc, quod in regula, & in testamento Sanctus Franciscus suis fratribus indistinctè mendicationi præfert laborem. Item rationes conclusionum præ-

cedentium istam probant , vt illas , principio hoc adiecto , quòd regula ipsa est sancta: quod principium asseritur & probatur in cap. *Exiit*, supradictò.

Septima conclusio huius materiæ erat, quòd bulla domini Alexandri quarti, quæ libellum magistrorum condemnat, nullam præmissarum conclusionum impugnat. Hoc taliter suadetur, quia dominus Ioannes vicesimus secundus in constitutione sua, *Quia quorundam*, dicit expressè quòd dominus Nicolaus tertius illam bullam & omnes litteras prædicti Alexandri quarti, quantum ad omnes articulos, quos sua declaratio continet, reuocauit. Constat autem quòd paupertatem Fratrum Minorum, quàm arcta esse debeat, Nicolaus tertius declarauit: quam fratres mendicitatem intelligunt. Item constat quòd dominus Nicolaus de fratrum labore declarat, & etiam de prædicatione non facienda in episcopatu alicuius episcopi, vbi fratribus fuerit contradicendum: ergo quoad istos articulos bulla domini Alexandri est à Nicolao cassata: nec in ipsa bulla recordor aliud quicquam esse, quod aliquam præmissarum conclusionum infirmet. Dicerem multò plura obiiciendo

contra mea propria dicta; & respondendo præmissa, quæ dixi, ampliùs solidarem: sed Sanctitatem vestram & dominorum meorum reuerentiam satis vexauit. Vnde concludo & humiliter ac deuotè depono, quòd super his sicut super prima materia per me tacta iuxta petitionem, quam feci, *Nolite iudicare secundum faciem: sed iustum iudicium iudicate.*



EX CODICE M. S. BIBLIOTHECAE S. VICTORIS PARISIENSIS.



Quoniam in propositione nuper facta coram Domino nostro Papa, & reuerendissimo cœtu Dominorum meorum Cardinalium super materia priuilegiorum fratribus de ordinibus mendicantium concessorum, & mendicitatis, super qua iidem fratres se fundatos affirmant, rationibus per me factis obiicere intendebam, & ad enucleationem totius materiæ eisdem obiectionibus respondere. Quod tamen tunc propter temporis breuitatem perficere non valebam, in sermone per me facto ad clerum in domo audientiæ publicæ in festo S. Thomæ Cantuariensis martyris gloriosi obmissa suppleui. Et facta protestatione in publico, quod in illis materiis, ex quo totum negotium reuerendissimis Dominis meis quatuor Dominis Cardinalibus diffinire erat concessum, nihil volui temerè aut aliter affirmare, sed tantum opinabiliter obiicere, ac etiam res.

pondere, & æquas rationes adducere ; non solum diffinitionem, sed etiam affirmationem quamcunque ab eisdem Dominis meis reuerendissimis atque doctissimis expectando.

Contra articulum seu conclusionem, quod *Christus*, obiicitur per illud Psalm. xxxix. *Ego verò mendicus sum & pauper*; quod in persona Christi liberaliter dictum asseritur : quoniam glossa Magistri sententiarum super illo verbo hoc dicit, cuius ista sunt verba ; *Ego verò mendicus sum & pauper*, hoc dicit *Christus* de se ex forma serui, nequis gloriam prædictæ latitiae sibi arroget. Illi ita dicant; *Ego autem*, tui dicebant, *Euge, euge*: de me hoc dico scilicet, quod pauper sum (seruus; quod homo mendicus est qui ab alio petit, & pauper qui sibi non sufficit : sed Dominus sollicitus est mei, id est, curam habet mei: vel ita, *Ego autem*, ut de membris agatur, quasi dicat ; Hoc dicant de te, *Semper magnificetur Dominus*, &c. De se autem hoc dicant, *Ego autem sum mendicus & pauper*, id est, non est quod in me laudetur : ex me egenus sum & pauper, ut publicanus qui non audebat oculos ad cælum leuare, cum quo dico, propitius esto mihi.

mibi peccatori: Non sum diues, quia non superbus, ut Phariseus, qui dicebat, non sum sicut ceteri hominum, sed Dominus sollicitus est mei. Adiutor meus, &c. Hic orat totum corpus Christi, unus mendicus cum Christo, & unus pauper; hæc glossa, ubi Magister sententiarum, qui hanc glossam dicitur edidisse, affirmare videtur hoc dictum esse de Christo. Sed non videtur hoc dictum esse de Christo; & non videtur hoc dictum eius veritatem habere: sed potius. Dauid liberaliter illud dixerit de Ecclesia pro se & membris ipsius a Deo remedium expectare super eius miseriis, sicut ipsius Psalmi verba prætendunt. Non etiam Christus Christum taliter expectauit, ut diceret; *Expectans expectaui Dominum, & intendit mihi: exaudivit preces meas, & eduxit me de lacu miseriae, & de luto facis.* Alia litera habet, & de luto limi, quam B. Augustinus super illo loco exponit hoc modo; *Quid est lacus miseriae? profunditas iniquitatis ex carnalibus concupiscentiis: hoc est enim & de luto limi unde te eduxit de profundo quodam.* Hæc Augustinus. Ex quibus apparet, quod Christus ibi de se non loquitur, cum Christus omni iniquitate caruerit. Ne

Magister in hoc dicto vti videtur recta grammatica, dicendo, quòd pauper est qui sibi non sufficit: cùm pauper dicatur quasi paruus, eò quòd parum potest, aut parum parat quoad diuitias huius mundi, qualis erat Tobias, qui dixit, *Fili, pauperem quidem vitam gerimus.* Tob. iv. Et tamen sibi suffecit, vt vixerit honestè. Potest enim secundùm grammaticam paupertas esse honesta, licet egestas semper sit turpis, vnde non grammaticaliter pauperis nomen exposuit, siue descripsit. Item si intelligerentur de Christo, non de mendicitate corporalis cibi, sed de mendicitate spiritualis alimenti, scilicet, lætitiæ consolantis, qua indiguit, & qualem fratres sui habebant, de quibus immediatè præmisit; *Exultent & lætentur super te omnes quærentes te, & dicant semper, magnificetur Dominus, &c.* deberent intelligi: quia in protectione illius pro mendicitatis remedio confidebat, adiiciens, *Adiutor, & protector meus tu es, Deus meus ne tardaueris.* Protectio enim ab insultantibus affert lætitiā, quamuis non expellat esuriem. Item alia translatio habet loco mendici egenum, quam literam exponit B. Augustinus

hoc modo; *Ego autem, cui, scilicet, dicebant, euge euge, egenus & pauper sum, non est quod in me laudetur, discindat ille saccum meum, & cooperiat me stola sua: vivo ergo iam non ego, vivit verò in me Christus. Si vivit in te Christus, & totum quod boni habes Christi est, totum quod habebis Christi est. Tu per te ipsam, quid es? Ego egenus & pauper. Ego autem non dives, quia non sum superbus. Dives erat ille qui dicebat; Gratias tibi ago, Domine, quia non sum sicut ceteri homines, velut etiam hic publicanus: Publicanus autem erat pauper qui dicebat, Domine, propitius esto mihi peccatori. Hæc Augustinus. Videte, an ista Christo conveniant. Et cum dicat egenum, illud exponendo, non sum dives, scilicet, pro inope, siue indigente, non arctam mendicitatem ac egestatem, sed inopiam vel indigentiam, quæ tanquam synonyma accipiuntur sæpius in scripturis, & in dictis sanctorum, ut infra versus finem dicetur, Christo ascribere. Item glossator, qui sub disiunctione illud exponit de Christo aut eius Ecclesia, versiculum immediate sequentem ad Christum aptare*

non potest, scilicet, *Adiutor meus, & protector meus tu es, Deus meus ne tardaveris*, de sola Ecclesia illum versum exponit, cum tamen appareat, quod de eodem debeat exponi, cum præcedens versiculus querelam contineat, & sequens postulationem seu expressionem remedij super miseria intimata: vnde videtur quod non potest aptè de Christo intelligi, sed de illo, de quo suam miseriam exprimente & remedium postulante ibi præmittitur, *quonia circumdederunt me mala, quorum non est numerus: comprehenderunt me iniquitates meae, & non potui ut viderem, multiplicata sunt super capillos capitis mei, & cor meum dereliquit me. Complaceat tibi, Domine, ut eruas me, Domine ad adiuuandum me respice*. Et videtur vna sententia repetita, *Et verò mendicus sum & pauper, &c.* quoniam in eadem persona continuari videtur sententia vsque in finem: quæ priora Christo innocenti conuenire non potuerunt, qui nec iniquitates habebat, nec visu carebat, nec cor gessit eum deferens portitorem, quæ omnia sanctæ matri Ecclesiæ pro se, aut pro suis membris conueniunt: & sic super illo loco Augustinus exponit vt dixi. Item esto quod illud esset dictum de

Christi persona, adhuc non ex illo consequitur, quòd sit dictum pro eius persona, cum sæpè scriptura loquitur, & eius, pro suis, sicut ille idem glossator exponit in multis Psalmis similibus, & B. Augustinus exponit illud Psalmi cvij. *Mendicum & compunctum corde mortificare* : sic dicens, *plane compunctum corde, sed in membris suis*, cui dicto præmittit; *mendicum autem quomodo intelligam? nisi fortè quia dixit Samaritane, Da mihi bibere. Et in cruce ait, Sitio. Sed quid sequitur, quomodo accipiat in ipso capite nostro, id est, sui corporis saluatore, quem Iudas persequutus est, non inuenio.* Vnde post pauca; *Persequutus est hominem inopem & mendicum, sed in membris suis.* Sicque B. Augustinus nesciens inuenire quando Christus mendicauit, quia fortè ab istis fratribus non erat edoctus, id de Christo pro suis membris exponit, sicut ipse loquitur, dicendo, *Qui vos audit me audit: & qui vos spernit me spernit*, Lucæ x. Et ibi; *Saule, Saule, quid me persequeris?* Act. ix. Et Matt. xxv. describens formam finaliis iudicii, *Esuriui, & non dedistis mihi manducare, &c.* Et sequitur, *Quandiu uni ex minimis meis fecistis, mihi fecistis.* Ex quo etiam dicto videtur quod nunquam eleemosynas

mendicando accepit: quoniam tunc vt verisimiliter poterit æstimari, nullatenus tacuisset in reddendo mercedē, quin potiùs expressisset, *mibi, in persona mea, & meis minimis sic fecistis*: quod quia nō fecit, verisimile videtur quòd eleemosynas medicādo à nullo accepit. Itē cū in alio Psalmo dicitur; *Adiuuit pauperem de inopia*, pro eodem pauperē & inopē synonymè q̄ iasi accipiens, quia sunt propinqua in sensu, cut non possit hīc accipi mendicus pro paupere inope aut egeno, non video. Item, cū iste glossator, scilicet Magister sententiarum illud exponat de Christo, & alter de suis membris, nemo potest concludere quod alteram expositionem affirmat: vnde in isto pro corporali mendicitate Christi nullus color est, serie Psalmi attentè discussa, cū litera manifestè alium sensum prætendat, nec aliquis sanctus doctor, quem vidi, ita exponat, sed aliter, nec glossa, vt constat, illam expositionem affirmat, sententiam adiiciens. Item, etsi probari posset ex isto, hoc dicto, aut aliis, quod Dominus noster Iesus indigentiae naturalis impulsu aliquotiens mendicauit, non ex eo poterit mendicitas siue mendicatio approbari: nec infirmatur conclusio negatiua, scilicet, quod

Christus nunquam spontaneè mendicauit. Illud etiam quod in Psalmo cxiij. de Domino dictum videtur, præmissio de Iuda proditore secundum expositionem Petri Apostoli Act. i. *Fiant dies eius pauci, & Episcopatum eius accipiat alter, & consequenter pro eo quod non est recordatus facere misericordiam, & persecutus est hominem inopem & mendicum, & compunctum corde mortificare.* Sic accipiendo videtur, quod mendicus ponitur pro egeno seu inope, quod statim subiungitur, *Libera me, quia egenus & pauper ego sum, & cor meum conturbatum est contra me,* ubi videtur eadem sententia repetita. Item, mihi videtur illud debere intelligi de spiritali mendicitate, & mendico consilij, quoniam super mendicitate & paupertate spiritalis cibarij petit remediũ, non super aliqua corporali; quoniã primò narratur causa mēdicatatis in Psalmi principio isto modo, *Locuti sunt aduersum me lingua dolosa, & sermonibus odij circundederunt me, & expugnaverunt me gratis: pro eo ut me diligeret detrahebāt mihi, ego autē orabā. Et posuerūt aduersū me mala pro bonis, & odiū pro dilectione mea: Sic recapitulauit consequēter cū dicit, Hoc opus eorum qui detrahebūt mihi apud Dominū, & qui;*

Defensorium

loquuntur mala aduersus animam meam.
Et contra has causas petit remedium isto modo; *Et tu Domine fac mecum propter nomen tuum, quia suavis est misericordia tua: libera me quia egenus & pauper sum ego &c.* vbi egenum nominat, & non mendicum: & de indigentia corporalis cibi nulla fit mentio, vt etiam in gratiarum actione pro liberatione accepta cum in fine subiungit; *Confitebor Domino nimis in ore meo, & in medio multorum laudabo eum, qui astitit à dextris pauperis, vt saluam faceret à persequentibus animam meam.* Vbi de sola liberatione à persequentibus animam suam gratias agere Deo promittit. Sed quod omnino videtur illa mendicitas de spiritali alimento debere intelligi. Item obicitur, quod Christus à Samaritana muliere mendicando bibere postulabat, cum dicit, *da mihi bibere*, vt legitur Ioan. iij. Et ad hoc taliter respondetur, quod aliud est simpliciter petere, aliud mendicare. Potest enim aptè intelligi quod illud non egit, vt tãquam eleemosynam mulieris aquam acciperet, sed vt quadam sermocinatione seriosa & vtili mulierem ad fidem adduceret, vnde B. Augustinus super illo verbo quod sequitur, *Respondit Iesus, & dixit ei,*

Si scires donum Dei, & quis est qui dixit tibi, da mihi bibere, tu forsitan petiisses ab eo, & dedisset tibi aquam viu, Dicit hoc modo; Hinc autem ostendit non se talem aquam petiisse, qualem ipsa intellexerat. Sed quia ipse sitiebat fidem eius, eidem sitienti spiritum sanctum dare cupiebat. Hanc enim recte intelligimus aquam viuam, quod est donum Dei, sicut ipse ait; Si scires donum Dei. Et ibi pramittit; Ille autem qui bibere querebat, fide ipsius mulicris sitiebat. Et Chrysostomus ibi sic dicit; Sed qualiter Christus quasiuit ab ea bibere lege non concedente? Si autem quis dixerit, quia ore sciebat eam non daturam, imò propter hoc neque petere oportebat. Et igitur dicendum, quod ideò petiit, quia indifferens erat de reliquo tales obseruationes praterire. Hæc ille. Vbi iste sanctus affirmare videtur, quod sciebat eam non daturam: & hoc constat ex litera supratacta, & ex mulieris responsione; Dixit ei mulier, Domine, neque in quo haurias habes, & puteus altus est. Vnde Christus superuacue medicasset nihil ab ea recepturus: nec decuit quod Christus ieiunus bibisset hora quasi sexta presentibus absentibus discipulis eius, qui ut emerent cibos ierant in ciuitatem cibaria in proximo allaturi. Item se-

cundum istum sanctum Iesus petebat bibere, vt ostenderet se non curare vltius tales obseruatias præterire: & addit Chrysostomus; *Admirabantur quidem superbundantem Christi mansuetudinē & humilitatem: quoniā ita perspicuus existens sustinuit loqui cum tāta humilitate mulieri inopi & Samaritana.* Ipsa etiam vocauit eum Dominū dicens, *Domine, neque in quo haurias habes;* Si ergo mendicasse dicatur, dicendi sunt contra grammaticam Domini Imperatores, Reges ac Principes mendicare potius potum quā cibū, vt videtur ex textu. Cū consequenter dicatur discipulis cum cibis emptis reuersis: *Interea rogabant eum discipuli dicentes, Rabbi manduca. Ille autem dixit eis, Ego cibum habeo manducare, quem vos nescitis. Dicebant ergo discipuli ad inuicem, Nunquid aliquis attulit ei manducare? Dicit eis Iesus, Meus cibus est, vt faciam voluntatē eius qui misit me, vt perficiam opus eius.* Sicut legitur respōdisse matri suæ, & Ioseph; *An nesciebatis quia in his quæ patris mei sunt oportet me esse?* Luc. cap. ii. Sicut enim opus patris sui erat cibus sibi, sic æqualiter erat potus, vnde non amplius videtur eguisse potum quā cibo, quo tunc iuxta hæc dicta non

eguit, sicut non eguit quadraginta diebus
suae tentationis à diabolo, *sed postea esuriit*,
iuxta Euangelium Matth. cap. iv. Vnde ex
serie literæ, & sententia concordi sanctorum
istorum satis apparet, quod Christus
ab illa muliere Samaritana mendicando,
bibere non petiuit, sicut non mendican-
do dixit Zachæo: *Zachæe festinans descen-
de: quia hodie in domo tua oportet me ma-
nere*: Luc cap. xix. Cùm verbum, *oportet*,
sensu mendicationis non habeat, nec ver-
ba, *festinans descende*, id sustineant: nec
Zachæus mendicantem Dominum ap-
pellasset, ut sequitur: *Stans autem Za-
chæus dixit ad Dominum* (ut secundum
aliam lectionem) *ad Iesum, Ecce dimi-
dium bonorum meorum do pauperibus*: Nec
dubium quin Zachæus tam sanctus effe-
ctus Christo, aut suis discipulis, si erant
mendicantes ab eo, illud bonorum
suorum dimidium eis potius quàm aliis
egenis dedisset: sed id eum fecisse, non
sustinent verba sequentia: *Ait Iesus ad
eum, quia hodie salus huic domui facta
est*. Cùm enim Dominus tunc præstitit ei
salutem, si temporalia tot & tanta ab
eo sumpsisset, suo Euangelio offendi-
culum præbuisset. Item qualiter credi

potest, quod tunc Christus mendicauit aliquid à Zachæo, ex quo ab eo nihil omnino petiuit, sed solum expressit, quod oportuit eum in eius domo illo die manere, quod verbum propter necessitatem salutis Zachæi & domus suæ, sicut sequens littera patenter ostendit, est dictum, *Quia hodie salus huic domui facta est.* Item, cum Christus tunc reuerentiæ magnæ habitus erat in populo, quod cum viderent omnes, *murmurabant dicentes, quod ad hominem peccatorem diuertisset,* non potest esse verisimile quod ea temporaliter mendicabat, cum omnes fuerint ad ipsum inuitandum promptissimi. Vnde illa verba propter potestatem diuinam dixisse videtur, aut ex potestate, quam habuit, sumendi carnalia ab his, quibus spiritualia seminabat, sicut pullo asinæ eadem potestate vsus fuisse videtur, de quo facto legitur *Marcii cap. xi. quoniam discipuli eius, qui eius præcepto pullum soluebant; quibusdam dicentibus, quid facitis soluentes pullum? præcepto dixerunt illis, quia Domino necessarius est, & dimiserunt eis;* quæ verba aperte prætendunt, quod auctoritate legitima illud egerunt: alias tamen hac potestate vti noluit, cum in templo

existens, *circumspēctis omnibus cū iam vespertina esset hora exiit in Bethaniam cum duodecim*, sicut legitur Mar. cap. xi. quia vidēs minus beneuolos ad sibi & suis necessaria ministrandum, voluit ad libera-
lio- res, qui id gratanter agerent, declina-
re, vt offendiculum tolleret Euangelio re-
sistendi. Nec obstat illud, quod Dominus ipse ait, Lucæ cap. ix. sibi dicenti, Magi-
ster sequar te quocunque ieris: vulpes fo-
ueas habent, & volucres cœli nidos: filius autem hominis non habet vbi caput reclinet, cū nihil ibi de mendicitate dicatur. Sunt enim plurimi in Ecclesia Dei Recto-
res, & Vicarij, qui non habent vbi caput reclinant in terra, & tamen non sunt mē-
dici, de decimis & oblationibus eis debitis à suis subditis vitam honestam agentes, à quibus subditis possent, his non sufficien-
tibus, necessaria suæ vitæ exigere, quod Christus, si voluisset, potuerat, scilicet, summus sacerdos secūdum Melchisedech tunc existens, cui, tanquam sacerdoti, A-
braham regressus de cæde regum decimas diuisit de omnibus, sicut dicit Apostolus ad Hebræos, cap. viii. & dicitur originali-
ter Genes. cap. xiiii. Non solū decimas, sed etiam cuncta sibi necessaria potuit à

populo, cui prædicabat exigere; vnde non propter carentiam proprij hospitij potest inferri, quod erat mendicus, sicut de istis non potest, imò apertè è contra: Cùm nemo sit vere mendicus qui sibi sufficientia liberè à sibi subditis vel subiectis potest exigere atque recipere. Ex hoc quod iste cupidus voluit sequi Christum tanquam summū sacerdotem populo prædicantē, vt sequela sua tēporaliter ditaretur, vt Chrysost. Beda, & Glossa exponunt, cōsequitur quòd Christus non erat mendicus, nec illi se ad eius sequelā taliter ingerenti mēdicus apparuit. Itē ex quo Christus per triēnium cum tamen fere dimidio solummodo prædicaturus assiduè remansit in terra per vias & castella prædicans verbum Dei, nullibi notabilem moram agens, hæreditariam fortè domum non habens, nulli hæreditatem talem volens dimittere, cur superuacue proprium capitis reclinatorium, scilicet domum habuisset, ratio non sibi videtur: quoniam minus prouidè domum emisset non moraturus in ipsa, & exemplum cupiditatis nihilominus aliis reliquisset, cuius exemplo Apostoli sui edocti possessiones immobiles à conuersis oblatas vendi potius voluerunt, quia non

fuerant in illis moraturi. Item est valde mirabile de isto genere hominū nouiter introducto, quod ipsi præ cæteris talia reclinatoria vbique, vbi possunt, ædificant, habent, & possident, de Christo propter perfectionem vitæ contrarium affirmantes; & nihilominus ipsis Christise in perfectione asserunt sectatores, quia aut verbo sunt mendaces, aut opere: si enim rectè id docent, in contrario opere sunt mendaces; aut si rectè sic agunt, mendaciter & deceptorie docent id è contrario faciendum: & nihilominus sic agendo suā perfectionem impugnant de arctissima paupertate, quæ, vt mundus agnoscit, cum talibus Palatiis regalibus in eis stare nō potest, sicut nec in aliis, vt illud Matt. cap. x. *Nolite possidere aurum, neque argētum, neque pecuniā in zonis vestris, nō peram in via, neque duas tunicas, calceamenta, neque virgam; dignus est enim operarius cibo suo, &c.* Vbi Marcus cap. vi. repetit isto modo, *Et præcepit eis, nequid tollerēt in via.* Et Lucas, *Nolite portare sacculum, neque perā, neque calceamēta, & neminē per viā salutaueritis: in quamcunque domum intraueritis primū dicite, Pax huic domui, &c.* In eadem autem domo manete edentes & bibentes quæ apud eos sunt; dignus est enim operarius mer-

cede sua. Lucae cap. x. quod ad mendicitatem non pertinet: quoniam ex quo Marcus repetit, *Et praecepit, ne quid tollerent in via, &c.* satis ostendit, quod hoc praeceptum non fuerat absolutum, sed tempore viae tantum, & sic exponit Dominus Ioannes xxii. in libello, *Quoniam vir reprobet.* Item non fuit praeceptum absolutum, sed tantum pro tempore viae; quoniam Marcus dicit, *in via.* Et supponere debemus quod Matthaeus aliter non intellexit, ex quo unam Christi doctrinam describit. Non enim sequitur, talia non habeatis in via: Igitur, talia non habeatis alibi. Itē frustra praecepisset, quod talia non haberent in via, nisi talia habuissent, à quibus in via poterant abstinere, & per consequens, & plures tunicas, & aurum, & argentum, & alia eo modo pro via prohibita ad deferendum ipsi habebant, aut de suo poterant habere, & non ex hoc probantur mendici. Item cum Matthaeus pro causa prohibitionis, siue delationis in via, siue possessionis eorum, adiecit; *Dignus est enim operarius cibi suo*, apparet quod prohibitio non fuerat absoluta, sed tantum quo ad dilationes talium rerum, quas alij, quibus euangelizare debeant, eis debuerint ministrare,

ministrare, quod non arguit eos fuisse mendicos, aut mendicare debere; sed potiùs ab aliis tales sumptus accipere; unde Dominus Ioan. xxij. vbi suprà, affirmat iuxta dictum S. Augustini, quod tunc fuit eis data potestas exigendi vitæ necessaria ab his quibus prædicare debebant, unde hac potestate præditi non fuerunt verè mendici neque egeni: Et si mercedem à non afferentibus petiuisent, dici non debuerant mendicare, cùm mendicare sit petere sibi dari gratiâ: *merces verò non imputatur secundùm gratiam, sed secundùm debitum*, vt dicit Apostolus ad Rom. iv. alioquin etiam Imperatores, Reges, & Principes, cùm exigunt debitum eis censum, mendicant, quod dicere est nimis absurdum. Illud verò Lucæ cap. xiv. in fine, *Omnis ex vobis qui non renunciat omnibus quæ possidet, non potest meus esse discipulus*, nihil pro mendicitate penitus operatur: Beda enim exponit istud, *Distat sanè inter renunciare omnibus, & relinquere omnia. Paucorum enim perfectiorumque est relinquere omnia, curas mundi postponere, solis desideriis æternis inhiare. Cunctorum autem fidelium est renunciare, omnibus, hoc est,*

sic tenere quæ mundi sunt, ut tamen per ea non teneantur in mundo, habere rem temporalem in usu, æternam in desiderio, sic terrena gerere, ut tamen tota mente ad cælestia tendant. Hæc Beda, & est glossa ordinaria ubi affirmat, istam renunciationem esse in cunctis fidelibus, non tamen omnibus est acceptata mendicitas. Et si quisquā dixerit; Igitur relinquere mendicitatem importat, & hæc potest nihil penitus retinere; hæc responsio est expressa, quoniam relinquere omnia est omnium temporalium curam obsequiis diuinis postponere, quod dicit glossa, *Relinquere est tantummodo perfectorum, qui omnia temporalia postponunt, & solis æternis inhiant.* Vnde intelligendum videtur iuxta sensum, æternis inhiare, scilicet, os cordis ad æterna semper habere apertum, quod perfectorum est: & multo amplioris perfectionis existit, quàm renunciare simpliciter, scilicet, quàm sic ea abicere ut ad æterna mente intendere non obmittat, quia hoc efficit quisque iustus: nemo enim esset in via salutis, quin ita temporalibus cunctis renunciaret, scilicet, ut Dei amorem præferat his rebus terrenis, hoc est, *sic*

tenere quæ mundi sunt , ut per ea non teneatur in mundo , iuxta verba Bedæ prætaçta. Item illud Matth. cap. xix. Luc xviii. & Marci x. est sententia similis ; Dictum iuueni , Si vis perfectus esse , vade & vende omnia quæ habes, & da pauperibus , & veni , & sequere me , non probat, nec arguit, quod Christus illi mendicare , seu mendicitatem consuluit : priuò , quoniam sic probans, aut arguens petit principium, scilicet, supponit illud quod probare deberet : quoniam si Christus non erat mendicus, acquiescendo Christi consilio ipsum sequendo , scilicet , eum imitando in vita, ut Sancti exponunt, ille iuuenis non debuit esse mendicus, sicut nec Christus tunc erat: Igitur ex venditione bonorum suorum, & datione pauperibus, & Christi sequela non potest inferri quod debuit esse mendicus, nisi supponendo quod Christus erat mendicus, sic quod in argumentatione ex isto Christi consilio petitur seu supponitur principium, quod probari debet, & sic probatio omnino est nulla. Item sicut nec Apostoli, nudi sed, vestiti honestè omnibus suis relictis sequuti sunt Christum, sic nec iste aliter sequi debebat , & sic Christus

actum turpem , opprobriosum , & scandalosum exercere publicè docuisset, quod nefas astruendum videtur ? Qui autem habet competentem vestitum , non videtur verè mendicus , cùm pro cibo vestes vendere valeat , aut mutare. Et istud poterit confirmari , quoniam distributis suis bonis pauperibus donec pro vno solo sufficientia remaneret : illud remanens poterat iuuenis obseruato Christi consilio pro suis vsibus retinere , cùm esset pauper vt ceteri , immò videtur ad hoc de lege caritatis fuisse arctatus , quæ incipit à seipsa , & ipse exposuisset se ipsum vitæ discrimini , & fuisset sui ipsius forsitan homicida , si nullus alter sibi succurrere voluisset , & Deum tentasset, expectando miraculosum vitæ suæ succursum ; dum humanum suffragium abfuisset , contra Scripturam dicentem , *Non tentabis Dominum Deum tuum*, Deuter. cap. vi. Et Christus diabolo illud allegauit , sicut legitur Matth. cap. iv. Item , cùm Christus tunc pauper erat, & pariter sui Apostoli & discipuli , iuuenis dando Christo , & suis discipulis omnia bona sua impleisset Christi consilium, & nihilominus de eisdem bonis vixisset

cum Christo à nullo tunc aliquid mendicando : sic enim de facto Lucas refert Euangelij sui cap. viij. scilicet , quòd Magdalena , Iohanna , & alia mulieres sequebantur Christum ministrantes ei de facultatibus suis : non ergo apparet ex Christi consilio quòd iuuenis ille deberet esse mendicus. Et ista sententia personâ Petri , & aliorum discipulorum Christi , qui in datione istius consilij præsentes erant clarissimè confirmatur , quoniam de ipsis scribitur Actuum cap. iv. *Neque enim quisquam egens erat inter illos : quotquot enim possessores agrorum, aut domorum erant , vendentes afferebant pretia eorum qua vendebant , & ponebant ante pedes Apostolorum. Diuidebatur autem singulis prout cuique opus erat.* Vbi apparet , quòd conuersi ad Christi sequelam , non dubium per Christi discipulos informati , vendiderunt omnia iuxta præfatum Christi consilium , & pretium totum Apostolis contulerunt , nullatenus officiando seipso mendicos , quoniam neque quisquam egens erat inter illos , vt scribitur. Ecce Christi consilium facto recenti Apostolorum expositum mendicitatem excludens. Item, Ex

quo iuuenis erat, cui datum fuerat Christi consiliū, fuisse videtur robustus in corpore ad laborē; nullus autem talis est verè mendicus, sed fictus, cum nullus talis sit verè egenus, cum posset sibi sufficere ex labore. Non ergo propter Christi consiliū urgebatur esse mendicus: non enim mendicant aues cœli, acquirere sibi vitam suo volatu valentes: igitur nec homines sunt verè mendici qui labore possent sibi acquirere vitam, cum in hoc eos æquiparando scriptum pronunciet; *Homo ad laborē nascitur, & avis ad volatum*, Iob c. v. Quod autē affirmat Apostolus 2 ad Cor. c. viii. *Scitis enim gratiam Domini nostri Iesu Christi, quoniam propter vos egenus factus est, cum esset diues, ut illius inopia vos diuites essetis*, nihil penitus pro mendicitatis actu aut habitu operatur iuxta sensum terminorum istorum: quoniam litera ipsa tollit hunc sensum, ut illius inopia vos diuites essetis, ubi pro egestate prætenso repetit ibi inopiam, scilicet, opibus denudatum esse, qualis Christus fuit, nunquam mendicus, unde glossa ibi sic dicit; *Nota quod non ait, pauper factus est cum diues fuisset, sed cum diues esset: paupertatem enim assumpsit, & diuitias non amisit: intus diues, fo-*

ris pauper; latens Deus in diuitiis, apparens homo in paupertate: hæc glossa. Vbi glossa de paupere & paupertate exponit, non de vero egeno, siue mendico: vnde mirum est quod isti trahant ad suum votum scripturam taliter repugnantem, apertè adulterando verba scripturæ. Item esto quòd Dominus & Saluator aliquoties mendicabat, cùm id iuxta ostensa in propositione superius non nisi naturali nature impulsu egisset, id in nullo operatur pro istorum fratrum mendicitate spontanea quam exercent ex voto, vt fingunt: quoniam ex hoc affirmari non poterit, quod mendicitas siue mendicatio prudenter & sanctè obseruanda posset assumi: quia pari ratione possemus astruere, quod esse in conuiuiis posset sanctè in talis ordinis professione assumi, Christum in actu huiusmodi imitando, aut quod ex equitare super pullū asinæ per medium ciuitatis maioris de regno, aut habere loculos, aut periculū mortis effugere, aut quadraginta dierum ieiunium obseruare, & actus quisque consimilis, quia Christus tales & consimiles pluries actus exercuit, sanctè posset ex professione obseruandus assumi, quod, vt puto, minùs prouidè esset dictū. Si quis verò cōtēderet,

Paulum Apostolum à Corinthiis, & Romanis mendicasse saltem collectas in sanctos pauperes in Hierusalem, debet attendere, quod Paulus auctoritate sua ordinavit illas collectas, eas imponendo tanquam pastor providus propter spiritualia illis impensa, & quod inuitet honestius ad eas liberè faciendas, salubriter exhortando, cum dicat; *Scio enim promptum animum vestrum, & placuit autem eis, & debitores sunt eorum*: & immediatè ante illa verba: *Scitis enim gratiam Domini nostri, &c.* II. ad Corinth. cap. VIII. præmittit: *Non quasi impetrans dico*, Glossa, *Sed hoc non dico impetrans, ne sitis transgressores*: nihil penitus in hoc pro se aut pro aliis mendicando. Vnde de hoc scribit ad Corinthios isto modo; *De collectis autem quæ fiunt in sanctos, sicut ordinavi Ecclesiis Galatiæ, ita & vos facite. Per unam Sabbati, unusquisque vestrum apud se reponat, recondens quod sibi placuerit, ut non, cum venero, collectæ tunc fiant*, I. ad Corinth. cap. XVI. Attendunt verba, *sicut ordinavi, ita & vos facite, reponat, recondens*, & non fidè mendicitatem ascribant Apostolo. Item Epist. II. cap. IX. sic scribit eisdem; *Nam de ministerio quod fit in sanctos ex abundanti est*

199
mihī scribere vobis : Scio enim promptū animū vestrum , pro quo de vobis gloriōr apud Macedones. Vbi donationem huiusmodi collectarum in pauperes sanctos in Hierusalem ministerium eorum appellat , satis ostendens hoc facere quoquomodo ex ministerio tenebatur , quod ad Romanos scribit expressiū istō modo ; Probauerunt autem Macedonia , & Achaia collectionem facere in pauperes sanctorum , qui sunt in Hierusalem. Placuit eis , & debitores sunt eorum. Nam si spiritualium eorum participes facti sunt Gentiles debent etiam in carnalibus ministrare illis , ad Rom. cap. xv. vbi iterum nominat ministerium , & probat collationem dari debere , licet quantitatem non taxet , sed eam committit liberæ voluntati. Vnde II. ad Corinth. post verba præmissa superiūs sic adiunxit , Necessarium ergo existimaui rogare fratres , vt præueniant ad vos , & præparent repromissam benedictionem hanc paratam esse sic quasi benedictionem , non quasi auaritiam. Hoc autem dico , qui parcè seminat , parcè & metet ; & qui seminat in benedictionibus , de benedictionibus & metet. Vnusquisque prout destinauit in corde suo , non ex tristitia , aut ex necessitate : hilarem enim datorem diligit

Deus. Sicut enim in lege ad fabricam tabernaculi singuli tenebantur offerre, vt legitur Exodi cap. xxxv. sed non nisi sicut illis placuerat : Ita etiam fuisse videtur de istis collectis sicut de prima prætacta, scilicet, quod fuerunt ab Apostolo ordinatæ : immo glossa ibi ; expressè : *Præcipit Apostolus omnem plebem dominico die cōuenire ad Ecclesiam, & illuc deferre quod unusquisque ad opus sanctorū dare voluerit.* Non ergo mendicando Paulus Apostolus has collectas obtinuit, sed potius vt doctor gentiū ordinando, atque etiam exhortādo, nec est talis exhortatio ad eleemosynā cōferendam mendicatio appellanda. Adhuc contra præmissa videtur dictū S. Bern. vt dicitur homelia super Lucam cap. ii. *Cū factus esset Iesus annorum duodecim, Quid dicam, Deus meus ? An vt te per omnia nostra confirmares paupertati, & omnes in te humane miserie calamitates susciperes, quasi vnus è turba pauperum stipem per ostia mendicabas ?* Hæc Bernardus : pro cuius dicto, & aliorum dictis similibus potest probabiliter annotari, quod quadrupliciter sancti loquuntur, aliquando excitatiuè, aliquando expositiuè, aliquando assertiuè, sed transcursiuè, inad-

uertenter, & aliquando assertiuè, ac probatiuè seu diffinitiuè. Cùm verò quisque sanctus excitatiuè loquitur, scilicet ad deuotionem, seipsum aut alios excitando, non videtur in eius dicto veritas exigenda, sed tantùm vtilitas, dum tamen loquatur sine fidei impugnatione: quia non intendit quod dicitur discutere, siue asserere, sed ædificare, quale fuit hoc dictum sancti Bernardi, vt multis videtur, sicut in meditatione de compassione beatæ Mariæ Virginis gloriosæ dicit; *Quis dabit capiti meo aquam, & oculis meis imbrem, donec seruo suo Dominus appareat*, non intendens verum esse quod tanta aqua egeret, aut oculis suis imbre, sed vt in se ipso lachrymas prouocaret, & alij attendentes deuotionem ipsius pariter prouocarentur ad lachrymas; sicut è contra *S. Iob aperuit os suum, & maledixit diei suo, & loquutus est; Percat dies illa, in qua natus sum*, ostendendo vehementiam doloris sui: quoniam immediatè ibi præmittitur; *videbant enim dolorem esse vehementem*, Iob. cap. ii. non aliquid affirmando. Vnde tale dictum sancti Bernardi, aut sancti alterius non habet auctoritatem,

quoniam neque asseritur, neque affirmatur ab ipso: & ob hoc ad aliquid probandum frustra & ineptè adducitur. Item cùm aliquis doctor sanctus, vt quiuis expositor, aliquam scripturam exponit, expositiōnem non asserit nisi velit, sed asserit sensum, quem exprimit esse intellectum scribentis, aut illum sensum in eius dicto probabiliter posse intelligi, vnde expositio sola nunquam probari poterit esse assertio dicti expositi, aut etiam expositionis illius. Multi enim sicut Eultratiū super Ethica Aristotelis, & Ægidius super librum Physicorum ipsius, dicta eius exponunt secundum sensum eius, quem exprimunt alium non reprobando, ibi præcipuè vbi quis duas expositiones seu plures adducit, vnde pro hoc eleganter loquitur Augustinus primo libro suo super Genesin ad literam; *Librum Geneseos multipliciter quantum potui enucleavi, protulique sententias de verbis ad exercitationem nostram obscure positis, non aliquid unum temerè affirmans cum præiudicio alterius expositionis fortasse melioris, vt pro modulo suo eligat quisque quod capere possit; vbi autem intelligere non potest, scriptura Dei det honorem, sibi timorem.* Hæc ibi. Vnde ad probandum aliquid esse

verum, sola expositio sancti alicuius Doctoris videtur fragile argumentum; quamvis ipse catholicus, non quia expositor, veritatem scripturæ defendere teneatur: quia in exponendo, non pro defensione scripturæ, sed pro expressione intentionis scribentis intendit discutere veritatem: unde dixi, quod glossa magistri super illo versiculo Psalmi; *Ego verò mendicus & pauper*; ex quo duas expositiones expressit, non debet glossæ, aut exponenti, tamquam eius auctoritas, seu ab eo assertum ascribi: & ob hoc ad probandum Christum fuisse mendicum non est satis solidè adductum. Item, cum aliquis assertivè, sed transcurrendo, seu inaduertendo, non illud discutere inibi intendendo, aliquid asserit aut affirmat, in hoc, si fortè errauerit, poterit excusari, eo quòd illud inquisitivè, non assertivè dixerit, sicut beatus Augustinus respondet Pelagio libro Retractionum suarum, quo ad hoc, quod dicit libro tertio de Libero arbitrio: *Quis peccat in eo quod nullo modo caueri potest?* quoniam de peccato originali non intendebat tunc loqui, & ponitur lib. ii. Sententiarum dist. xxviii. Non est fixa probatio, sed intellecta ex tali dicto concludendo,

qualia videntur omnia assertiuè dicta à sanctis de mendicitate, siue mendicatione Domini Saluatoris : quia nusquam adhuc legi in scripturis alicuius antiquorum doctorum vbi super ipsa quæstione indagatio solida siue inquisitio erat facta, sed super statuum comparatione, quoad imperfectum & perfectum: & super mendicitate quæstiones, disputationes, & declarationes sunt recenter per mendicantium, sed Palatia construendum, non per verè mendicantium ordines introductæ. Item cum aliquis doctor quantumcunque egregius inquirens veritatem super quauis materia affirmando atque probando conclusionem aliquam asserit vel affirmat, cum reuerentia accipiendum est dictum eius, donec certis documentis constare possit illud esse contrarium veritati. Nec æstimo censendum auctenticum, quia doctor aliquis eximius illud dicit, sed quia ratione fulcitur. Vnde dicit beatus Augustinus in epistola xiv. ad Hieronymum, & ponitur in decreto distinctione ix. hoc modo ; *Ego solis eis scripturarum libris, qui iam Canonici appellantur, didici hunc timorem honoremque deferre, ut*

nullum eorū auctorem scribendo errasse firmissimè credam. Ac si aliquid in eis inuenero literis, quod videatur contrarium veritati, nihil aliud, quam vel mendosum esse codicem, vel interpretem non assequeutū esse quod dictū est, vel me minimè intellexisse non ambigā. Alios autem ita lego, ut quantalibet sanctitate, doctrinaque prepolleant, nō idēd verum puto, quia ipsi ita senserunt: sed quia mihi, vel per illos auctores Canonicos, vel probabili ratione, quod à vero non abhorreat, persuadere potuerūt. Hoc ibi. Cui simile dicit beatus Augustinus lib. xi. contra Faustū hoc modo; *De his enim libris dici potest aliquid eos habere non consonum fortasse occultiori, & ad dignoscendum difficiliori veritati: quod aut si remanserit, aut in posterioribus correctum sit, qui non precipiendi authoritate, sed proficiendi exercitatione scribuntur à nobis. Inter hoc enim sumus; quibus idem Apostolus dicit; Etsi quid aliter sapitis, id quoque vobis Deus reuelabit. Quod genus literarum non cum credendi necessitate, sed cum iudicandi libertate legendū est. Cui tamē ne intercluderetur locus & adimeretur posteris ad quæstiones difficiles tractādas atque versandas linguae ac styli saluberrimus labor, distincta est à poste-*

reriorum libris, excellentia canonica authoritatis veteris & noui Testamenti, quæ Apostolorum confirmata temporibus per successiones Episcoporum, & propagationes Ecclesiarum, tanquam sede quadam sublimiter constituta est, cui seruiat omnis fidelis & pius intellectus. Ibi si quid velut absurdum mouerit, non licet dicere, Author huius libri non tenuit veritatem: sed aut codex mendosus est, aut interpres errauit, aut tu non intelligis. In opusculis autem posteriorum, quæ libris innumerabilibus continentur, sed nullo modo illi sacratissima canonicarum Scripturarum excellentia coquantur, etiam in quibuscunque eorum inuenitur eadem veritas, longè tamen est impar autoritas. Itaque in eis, si qua forte propterea dissonare putantur à vero, quia non ut dicta sunt intelliguntur, tamen liberum ibi habet lector auditorve iudicium, quo vel approbet quod placuerit, vel improbet quod offenderit. Et ideo cuncta eiusmodi nisi vel certa ratione, vel ex illa canonica autoritate defendantur, ut demonstretur, siue omnino ita esse, siue fieri potuisse, quod vel disputatum ibi est, vel narratum: si cui displicuerit, aut credere noluerit, non reprehenditur. Item dicitur lxxxii. distinctione in principio & est de Concilio Carthaginensi hoc

si hoc modo ; Generaliter etiam pauperibus, & iis qui suis manibus laborare non possunt, Episcopus necessaria provideat. Vbi dicit glossa ; Pauper enim, qui laborare potest si se immiscet elemosynæ Imperatoris, reagitur in servitutem. Et statim ex Concilio Aurelianensi immediate sequitur ; Episcopus pauperibus vel infirmis, qui debilitate faciente suis manibus laborare non possunt, victum & vestimentum, in quantum sibi possibile fuerit, largiatur. Vbi glossa super illa verba, non possunt, sic dicit ; Ei qui potest, non debet Ecclesia providere. Vt v. quæst. v. c. Non omnis. Et dicit glossa super Matthæum ; Siquidem iustus feceris, si iniuste petentem correxeris, quam si ei dederis. Ex quibus sequi videtur, Si Christus spontaneè mendicavit, robustus in corpore ad laborem, reddidisset sponte seipsum legis executoribus, iuste quoad eos secundum legis exigentiam, puniendum & corripiendum, aut, vt glossa asserit, corrigendum, quod non videtur de Christo, quoad aliquem eius actum, dicendum. Item ex quo iuxta præmissa dicta sanctorum doctorum, & glossas, sæpè in sacris Scripturis mendicus, inops, egenus, & pauper, propter propinquitatem in

sensu, synonymè accipiuntur, sic rationaliter dici potest, quod sancti doctores hæc omnia taliter acceperunt: & sic ex nullo dicto alicuius sancti Doctoris, aut gloriæ dicentis Christum fuisse mendicum, aut etiam mendicasse, siue egenum fuisse, aliquid amplius potest concludi, quàm quod Christus erat inops, & pauper, aut indigens, nisi fortasse ex eius rationibus, & circumstantiis sui dicti expresse appareat, quod voluerit affirmare Christum fuisse corporaliter verè mendicum, aut corporaliter eleemosynam petiuisse, quod à S. Bernardo nō memini me legisse, qui sic excitatiuè, non assertiuè loquutus fuisse videtur. In quo dicto, si assertiuè loquutus fuisset, iuxta dictum prædictum Augustini eo maioris, non est sibi credendum, nisi quatenus dictū suum aliquo documento authentico poterit confirmari, quod posse fieri non mihi videtur. Si quis præmissa diligenter aduertat, videtur quod in dictis sanctorum pauca aut nulla solida pro Christi seu alicuius alterius spontanea mendicitate reperiet. Item si Christus spontaneè mendicasset, alios sic suo opere docuisset. Cùm ergo multum grauis sollicitudo sit mendicitati annexa, sicut

probari poterit clara luce per decem mil-
lia militum depignota, consequitur, quod
Christus ad conditionem & statum solli-
citudinis suis actibus incitavit contra suam
propriam doctrinā; *Nolite solliciti esse ani-
ma vestra, dicentes, quid manducabimus,
aut quid bibemus, aut quo operiemur?* Mat.
cap. vi. Super qua materia loquitur pul-
chrè Chrysostomus super cap. vi. ad He-
bræos in ultimo morali; *Oportet ergo, &c.*
sic dicens; *Non cogitas quanta sit ven-
tris necessitas? Non propter ipsum facis om-
nia? Non propterea negligis spiritualia?*
*Non propositum est cælum & regnum cæ-
lorum? Tu autem illius timens tyrannidem*
omnia sustines, & illum non despicias; hæc
est impudentia. Item sequitur, quod Chri-
stus suo facto docuit homines, se ipsos in
tentationem ducere, contra doctrinam
suam in oratione Dominica: vnde Chry-
sostomus dicit super capite iiii. ad He-
bræos in illo morali: *Ne ergo turbemur,*
&c. hoc modo: Deum ergo oremus, ne
intremus in tentationem. Sin autem in-
traverimus, eas forti animo feramus.
Nam illud quidem est virorum sapien-
tum & moderatorum se in pericula non
temere eiicere. Hoc autem fortium &

Philosophorum. Neque ergo nos temerè proijciamus; est enim audacia & temeritatis. Neque si ducamur, nos rebus vocantibus cedamus: est enim timiditatis. Sed si vocet quidem prædicatio, non recusemus. Et paulò post; Ne prouoces tentationes si ex voto tibi procedat pietas. Cur supernacanea attrahis pericula, quæ lucri nihil afferunt? Hæc dico, volens vos seruare leges Christi, qui iubet orare ne intretis intimationem, & iubet accepta cruce eum sequi. Hæc quidem non sunt contraria, sed valde congruunt ac conueniunt. Nam tu quidem rûm tamquam miles fortis te pararis & instruxeris, esto assidue in armis, sobrius, vigilans, hostem semper expectans: bella autem non prouoces. Hoc enim non est militis, sed seditionis. Hæc ibi. Item si mendicare ad perfectionem vitæ pertineat, tunc, vt videtur, expedit, vt fratres substractis eleemosynis magis egeant, vt magis perfecti sint, saltem quandiu habent vestes, ornamenta Ecclesiæ, pannos aureos, & calices, libros, nummos, Ecclesias sumptuosas, Palatia regia, & loca habitationis, aut hortos, quæ vendere liberè possunt, si velint. Sic enim quidam doctor in Theologia cuidam fratri mendicanti, sed bene vestito, re-

spondit ; *Absit ut tuam perfectionem imminuam, quam in paupertate arētissima affirmas consistere.* Itē iuxta grammaticam egestas in hoc differt à paupertate, quod paupertas potest esse honesta, sed egestas semper est turpis. Et constat quod omnis mendicitas est egestas: ergo mendicitas semper est turpis: vnde dicit Chrysost. super cap. vi. ad Hebr. in ultimo morali, *Oportet ergo, ut suprà; Quid est turpius & magis indecorum quam mendicare? Satius est mori quam mendicare.* Si ergo Christus aliquoties mendicavit, Christus aliquando exercuit actū turpem, quod non videtur à Christianis dicendum, quamuis passionem sibi turpem ingestam spontè toleravit siue sustinuit. Item Christus docuit omnia debere esse communia, suadendo ut nullus possideret superflua, iuxta illud Lucæ cap. xi. *Quod superest date elemosynam, & ecce omnia munda sunt vobis.* Et illud Matthæ cap. vi. *Nolite thesaurizare vobis thesauros in terra.* Et illud Lucæ cap. xvi. *Facite vobis amicos de māmōna iniquitatis.* Et ita quantum congruè fieri debuit, voluit, & opere laboravit reducere nostram naturam ad statum suæ institutionis primariæ, in quo nunquam aliquis men-

dicasset. Nunquam ergo elegit spontaneè mendicare: quoniam sic doctrina & opere contraria docuisset, quod non congruit affirmare. Item mendicitas est tollerabilis, & de numero tollerabilium iuxta illud Iacobi cap. v. *Beatificamus eos qui sustinuerunt. Sufferentiam Iob audistis, & finem Domini vidistis: quoniam Dominus misericors est & miserator.* Non est ergo de genere amabilium propter se, sed potius de genere odibilium: pulchrè enim de hoc dicit B. Augustinus, lib. x. Confessionum suarum cap. xxviii. *Nunquid non tētatio est vita humana super terram? Quis velit molestias & difficultates pati: Tolerare iubet eas, non amare. Nemo quod tolerat amat, etsi tolerare amet. Quamuis enim se gaudeat tolerare, mauult tamen non esse quod toleret.* Hæc Augustinus. At è contra quidquid spontè & prudenter eligitur, propter se est eligenti amabile. Nunquam ergo Christus spontè mendicitatem elegit, & per consequens nunquam mendicitatem spontè exercuit. Item cùm Christus loculos habuit, & pecuniam, qua egenis poterat subuenire iuxta illud Ioannis cap. xiii. *Et post bucellam tunc intrauit in illum Satanās: & dixit illi Iesus; quod fa-*

cis faccitius. Hoc autem nemo sciuit discumbentium ad quid dixerit ei. Quidam enim putabant, quia loculos habebat Iudas, quod dixisset ei Iesus; Eme ea, quæ opus sunt nobis ad diem festum: aut egenis ut aliquid daret: Christus doctrinæ suæ suis operibus fuisset contrarius, si dicto aut facto alios mendicare docuisset. Itē fratres imponentes sanctis successoribus Apostolorum & discipulorum Christi, qui in abundantia temporalia bona habebant, saltem suo arbitrio dispensanda, scilicet Gregorio, Ambrosio, Augustino, Basilio, Chrysostomo, Bern. & cæteris, quod ipsi talē mendicitatē spontaneam, aut mendicationem Christo, tanquam aliquid ad statum perfectionis Evangelicæ pertinens, ascripserunt, ipsos de sua doctrina redarguunt, & eos affirmant hypocritas, veluti Phariseos, & etiam negligentes, ut videtur, aut inuidos in docendo, ex quo ipsi talem mendicitatem aut mendicationem nec opere tenuerunt, nec obseruandam ab aliis in suis litteris suaserunt: legant quæso si sciant ubi eorum aliquis spontē se asserit mendicasse, aut alteri mendicare suasset, nisi fortē sanctum Augustinum obtendant, qui in toto libro suo de opere Mona-

chorum conatur affirmare contrarium. Item cum non possint conuinci Christum exercuisse actum huiusmodi nisi ex scripturis Canonicis, aut irrefragabili ratione, quod nullus doctorum, cuius dicta adducunt in istis per istos adductis, aut alibi in suis scriptis, inuenitur egisse. Sed Augustinus in libro præfacto egit contrarium, non tantum videtur temerarium, sed nimium verecundum, quod Christus talem actum exercuit, talia nuda dicta literis Canonicis non vestita pro probatione adducere: cum ad conclusionem contrariam sint tot rationes, & tot testimonia scripturæ, quibus testimonius solis, non dictis simplicibus siue nudis secundum dicta B. Augustini tacta superius, & incorporata in decretis Ecclesiæ, sit fides a prudentibus adhibenda. Et si quis dixerit, quod quia mendicare erubescientiam naturalem habet annexam, quæ est passio ad tolerandum difficilis, magni meriti atque humilitatis extremæ esse videtur: & ob hoc conetur inferre, quod à Christo potuit & debuit exerceri propter humilitatis exemplum, & ab aliis per consequens sponte prudenter & sanctè obseruanda assumi.

E contra etiam videntur, quod ratione cō-
simili affirmari poterit improbè à maiori,
quod Christus nudus incessit, vt quondam
Gymnosophistæ: quod Christus seipsum
vsque ad effusionem sanguinis quotidie se
flagellat, vt quædam secta conficta atque
peruerfa, non est diu, exercuit: quod Chri-
stus lanceolis aut cultris more sacerdotum
Bahal, vt legitur iv. Reg. cap. xviii. seipsū
incidit: quod Christus propter castitatem
seruandam seipsum castrauit: quod Chri-
stus oculos sibi eruit, aut alia eius membra
præscidit, vt Marcus legitur minùs pruden-
ter egisse: Item quod multa alia egit in na-
turalia istis similia. Cùm ista sint difficilio-
ris tolerantia, quàm spontanèe mendicare,
& humilitatem maiorem quoad opus ostē-
dant. Et quod fratres consequenter possent
sibi sanctè & prudenter assumere perpetuò
obseruanda, quod nefas est dicere, cùm ni-
hil prohibitū aut dissuasum à sacris literis,
qualia hæc existunt, ab aliquo poterit pru-
denter & sanctè assumi spontanèe obser-
uandum. Quæ verò à sacris literis non sunt
aliqua literè reprobata, aut sunt approbata,
præcepta, siue concessa, poterunt sanctè
obseruanda in casu assumi. Si verò quis di-
xerit, quod mendicitatem spontanèe ob-

seruantes sunt ab Ecclesia approbati; & in sanctorum catalogo numerati, sicut S. Alexius, & S. Franciscus, ex hoc volens inferre, quod eorum mendicitas fuit sancta, & ad vitæ perfectionem pertinuit: inferat simili ratione quod ditatio ad vitæ perfectionem pertinuit, quia sancta mater Ecclesia iuste & sanctè Reges plures & diuites approbavit, & quod quicquid in vita egerunt illi mendici siue bonum, siue malum, propter ipsarum personarum canonizationem, ab Ecclesia approbatur, quod quia nō possunt de istis, de mendicitate minus solidè inferre conantur. Item esto, quod Franciscus, & Alexius homines laici & indocti excusabiles saltem à peccato mortali super ignorantiâ scripturarum reprobantium mendicitatem spontaneam, quia mendicantes siue mendicos propter Dei amorem se spontè fecerunt, fuerunt ab Ecclesia approbati. In hoc debent intelligi approbati, propter meritum, quod, in sic volendo dura sustinere propter Deum, habebant, non propter improvidam voluntatem mentiendi: iuxta Apostolum ad Romanos ca. x. *Testimonium enim perhibeo illis, quod amulatione Dei habent, sed non secundum scientiam. Sicut obstetrices Ægyptiorum, & Raab me-*

retrix approbatæ & remuneratæ erant à Deo propter piam voluntatem qua pueros & nuncios Domini saluare volebant, non propter improuidam voluntatem menticendi, seu propter mendaciâ quæ dixerunt. E• sicut Marcus Euangelista, iuxta præacta, duas habuit voluntates; vnâ reprehensibilem, qua voluit sibi policem præscindere; & aliam Deo gratam, qua propter Dei dilectionem voluit Deo placere: quas voluntates si quis distinctè attendat, mendicitatē spontaneam propter canonizationem seu approbationem personæ mendicantis esse meritoriam, non concludet. Hæc præmissa, & ea, quæ hîc iam & etiam in propositione de mendicitate adhibui, eo fine expressi, vt nec clerus, nee populus decipiatur, vltiùs æstimando hos fratres imitari Christum, vt ipsi confingunt, in mendicatione spontanea, quam Christus nunquam exercuit. Item ad alium finem, scilicet, vt per diffinitiuam sententiam reuerendissimorum meorum Dominorum Cardinalium, quibus totum negotium est commissum, mendicitate huiusmodi reprobata, si eis placuerit, tanta priuilegia procurata à fratribus, & eis concessa ipsius mendicitatis spontaneæ sanctitate circūuentiue prætēsa, reuocentur

atque cassentur. Et ipsi fratres ad sanctum statum suæ institutionis reuocentur, quod nobiscum gratiam in præsentî, & gloriam in futuro præstare dignetur Omnipotens, Trinus, & Vnus, qui est benedictus in sæcula sæculorum, Amen.

IN nomine Domini Amen; Anno natiuitatis eiusdem millesimo tercentesimo quinquagesimo septimo indictione decima die Martis decima quarta mēsis Nouembris Pontificatus sanctissimi in Christo Patris & Domini nostri Innocentij Papæ VI. anno quinto, in præsentia nostrum, notariorum, & testium, ac partium subscriptarum, Reuerendi Patres & Domini Guillelmus Episcopus Tusculanus, Petrus S. Martini in Montibus, & Helias S. Stephani in Cælio monte titulorum presbyteri Cardinales in palatio Apostolico, in loco videlicet, vbi Consistorium fieri consuetum est, de mandato pro tribunali sedentes, dixerunt, quod die Mercurij proximè transacta, scilicet, octaua dicti mēsis Nouembris, per Reuerendum Patrem Dominum Richardum Archiepiscopum Armachanum Hybernix Primatem, nonnul-

lis propositis in publico Consistorio coram
præfato Domino nostro Papa & sacro Col-
legio Reuerendorum Patrum & Dom no-
rum, Dominorum Cardinalium, contra
fratrem Ioannem de Ardene Priorem fra-
trum ordinis Hereimitarum, S. Augustini
Londonientium, & Priorem fratrum Car-
melitarum, ordinum mendicantium Lon-
domensium se procuratorem prætenden-
tem, & contra alios religiosos mendicantes
vbique constitutos, & huiusmodi proposi-
tis diligenter intellectis per præfatum Do-
minum Papam, & Dominos Cardinales;
idem Dominus Papa hodie in camera sua
existens causas ipsas motas & mouendas
inter dictas partes eis ac Reuerendo Patri &
Domino Domino Francisco tituli S. Mar-
ci Presbytero Cardinali, tunc absenti, vel
tribus ex eis viux vocis oraculo commisit,
iuxta & secundum tenorem cuiusdam
Cedula nobis notariis per ipsos Reueren-
dos Patres Dominos Cardinales tradita,
& paulò ante coram eis, & de mandato eo-
rum, præsentibus dictis partibus, videlicet,
eodem Domino Richardo Archiepiscopo
pro se & sibi adhærentibus, & sibi adhære-
re volentibus, & fratre Guillemo Militis
ordinis Prædicatorum sacra Theologia

professore prioris & fratrum Prædicatorū,
fratre Iacobo de Montepolitiano Ordinis
Minorum Gardiani & Fratrum Minorum,
Fratre Bernardo de Cathalonia Ordinis
Heremitarum S. Augustini prioris & Fra-
trum Heremitarum S. Augustini, ac fratre
Aluaro Tenbre Ordinis Carmelitarum
Prioris, & fratrum Carmelitarum Mendi-
cantium Londoniensium, ut dicunt, pro-
curatoribus, & etiam procuratores dicto-
rum ordinum Mendicantium se esse dicen-
tibus, intelligibiliter & alta voce de verbo
ad verbum lectæ, & etiam simili modo eis-
dem Dominis Cardinalibus cōmisit om-
nem potestatem, quam ipse Dominus Pa-
pa habebat, in supradicto negotio, cuius ce-
dulæ tenor inferiùs describetur, commit-
tentes & mandantes nobis Carlino, & Pe-
tro Notariis publicis infra scriptis quatenus
commissionem huiusmodi, & omnia, quæ
sequetur ex ea, per nos, vel alium, seu alios,
in actis scriberemus, & registraremus, fide-
liter, cū opus esset redigeremus in publi-
ca documenta, & partibus ipsis copiam
cū directā esset, traderemus. Tenor
verò dictæ cedulæ talis est.

Significat Sanctitati vestræ deuotus eiusdem Richardus Archiepiscopus Ardmachanus Hybernæ Primas, quod quamuis de paupertate Domini Saluatoris, & mendicitate ac imperfectione status voluntariè mendicorum seu mendicantium, necnon de erroribus seu defectibus forum pœnitentialem, potestatem, seu indulta prætenfa fratribus mendicantibus audiendi confessiones, corpora defunctorum in suis locis & cimiteriis sepeliendi, prædicandi, & alia exercendi, quæ in Clementina de sepulturis cap. *Dudum*, plenius describuntur, concessa, & concessiones huiusmodi eis factas, ac alia ibidem expressa tangentiibus, cæteraque priuilegia eorundem cōcernētibus, veraciter prædicasset, ac populum Christianū catholicè docuisset, fueritque & sit Catholicæ fidei verus cultor, quidam tamē F. Ioannes de Ardene Prior fratrum ordinis Heremitarum S. Augustini Londoniensem, Prioris & fratrum Prædicatorum, Gardiani & fratrum Minorum, fratrum dicti Ordinis Heremitarum, S. Augustini, Prioris ac etiam fratrum Carmelitarum ordinum mendicantiū Londoniensium procuratorē se prætēdens, falsò asserēs

ipſum Richardum Archiepiſcopum in præmiſſis erroneè publicè prædicàſſe ac dixiſſe contra canonicas ſanctiões à prædicatione huiuſmodi & doctrinà, ac contra eas, & eum Reuerèdum Archiepiſcopum, ac ſedem Apoſtolicam, ſanctitatèmq; veſtrà, procuratoriis quibus ſupra nominibus, pro ſe & ſibi ac eis adhærentibus, ſicut dicit, appellauit, ſed friuolè, cuius appellationis prætenſæ tenorem habere dignemini ſpecialiter pro expreſſis, ipſumque Richardum Archiepiſcopum quam plurimū & nequiter diffamauit, & iniuriatus eſt eidem temerè & de facto in dicti Archiepiſcopi, ſanctæ matris Eccleſiæ, fideique Catholicæ vituperium, præiudiciū non modicum, atque magnum periculum animarum: vnde ſupplicat eidem Sanctitati veſtræ, quatenus cauſam, ſeu cauſas appellationis prædictæ & negotij principalis, ac negotiorum principalium, necnon iniuriarum & alias, quam ſeu quas pars dicti Richardi Archiepiſcopi, & ſibi adhærentium & adhærere volētium etiam in futurum contra partem dictorum procuratorum priorum gardiari, & fratrum ſeu conuentuum eorum, fautorūque ſuorum, & eiſdem adhærentium ſeu adhærere volentium, & omnium quorum
inter eſt,

interest, seu intererit, etiam diuissim, super
præmissis & eorum occasione, mouere in-
tendit, ac etiam omnes causas & singulas
super indebita & sacrilegia apprehensio-
ne, allectione fraudulenta, consuratione,
& violenta detentione diuersorum pue-
rorum adolescentium, etiam sine ipso-
rum¹ parentum consensu attractorum,
& infra annum probationis de dictis ordi-
nibus recedere volentium, nec non etiam
super abusionibus priuilegiorum eisdem
fratribus mendicantibus generaliter in-
dultorum, & aliis grauaminibus per fratres
dictorum quatuor ordinum mendicantium
vbiilibet constitutos sibi & suis adhærenti-
bus seu adhærere volentibus diuersimodè
illatis, prout in materia propositionis suæ
per eundem Richardum factæ coram Sã-
ctitate vestra contra fratres prædictos mē-
dicantes plenius continetur, ac etiam om-
nes eas consimiles dictos fratres & præfa-
tæ propositionis materiam quouismodo
concernentes, alicui seu aliquibus de reue-
rendis Patribus Dominis Cardinalibus
committere dignemini audiendas simpli-
citer & de plano sine strepitu & figura
iudicij, sineque debito terminandas,
cum incidentibus, emergentibus, depen-

dentibus, & connexis, & cum potestate citandi prædictos in Curia, & extra eam, etiam ad partes, quotiens opus erit, & etiam cum potestate speciali pronuncian- di, decernendi, & declarandi potesta- tem & indulta prætentapædicta confes- siones audiendi, & corpora defuncto- rum in suis locis & cimiteriis sepeliendi, prædicandi, & prædicta alia exercendi, in periculum animarum eorundem fra- trum, ac Ordinariorum, Curatorum, & Ecclesiarum parrochialium, Parrochia- norum, cleri, & populi præiudicium, li- cèt sancta intentione summorum Pon- tificum emanasse ac seruari, & ea, nec non constitutionem, ac literas etiam A- postolicas super his editas, si & quæcun- que sint, & quibuscunque adiectionibus seu clausulis munitæ existant, quæ om- nia dignemini habere sufficienter & spe- cialiter ex certa scientia pro expressis, re- uocandi, cassandi, & annullandi fore, pronuncianti, & cum potestate etiam ante omnia interdicendi Prioribus, Gar- diano, & fratribus omnibus & singulis dictorum quatuor Ordinum mendican- tium vsum & exercitium priuilegiorum, & constitutionem quorumcunque, præmis-

sa seu eorum aliqua concernentium, etiam dictæ Constitutionis Clementinæ, & inhibendi eisdem Prioribus, Gardiano, Conuentibus, & fratribus, ne priuilegiis seu Constitutionibus huiusmodi, facultate seu potestate aliqua sibi concessa vrantur quouis modo, lite huiusmodi indecisa pendente, & interdictum & inhibitionem huiusmodi in Curia & extra eam in singulis prouinciis & locis, vbi & quotiens expedire videbitur, publicandi, nec non constitutionem extrauagantem felicitis recordationis Domini Ioannis Papæ xxii. quæ incipit, *Vas electionis*, declarandi, seu eandem, si eisdem Dominis Cardinalibus expedire videbitur, tollendi, præmissis, & constitutionibus quibuscunque, & causæ huiusmodi non fuerint forsan ad Romanam Curiam legitimè deuolutæ, seu de sui natura tractandæ vel finiendæ in ea, non obstantibus, cùm causæ huiusmodi de maioribus debeant reputari.

*Sequitur Libellus , in hac causa per
prafatum Dominum Archiepisco-
pum Ardmachanum contra prafa-
tos Mendicantes indiciatiter obla-
tus.*

COram vobis Reuerendissimis in
Christo Patribus ac Dominis pro-
ponit Procurator & procuratorio
nomine Reuerendi in Christo Patris Do-
mini Richardi Archiepiscopi Ardmacha-
ni Hybernix Primatis, pro ipsius, suorum-
que subditorum, ac suæ vniuersalis Eccle-
siæ, salutisque publicæ animarum interesse,
defensione, veneratione, commodo, & ho-
nore, ac pro omnibus & singulis, quos tan-
git ac tangere poterit communiter vel di-
uisim, & aliàs ad omnem effectum quo &
parti & intentioni suæ melius prodesse po-
terit, cōtra Magistros, Vicarios, Custodes,
Gardianos, Priores, Ministros, Conuentus,
fratres, personas, & ordines Prædicatorum,
Minorum, Augustinienfium, & Carmelita-
rum, & omnes alios & singulos quorum
interest, & intererit, & quos tangit & tan-

gere poterit quomodolibet, & personas pro eis vel eorum aliquibus legitimè interuenientes, & diuifim.

Et dicit, quod licet prædicti ordines & eorum fratres, & infuper quibusdam iuribus, etiam ante ipforum ordinum institutiones, & ad matrices Ecclesias & parochiales, earum Prælatos, Curatos, Rectores, & Ministros de iure communi & institutionis Ecclesiasticæ spectantibus, & maximè super Confessionibus audiendis, pœnitentiis iniungendis, absolutionibus impendendis, sepulturis habendis seu eligendis, ac sermonibus & prædicationibus faciendis, & aliis prædictis officiis exercendis, etiam per concessiones, constitutiones, & priuilegia prætenfa Romanorum & summorum Pontificum priuilegiati fuisse & esse dicantur, prout in concessionibus, constitutionibus, & priuilegiis huiusmodi, ad quorum continentias & tenores, quo ad hæc, se refert, dicitur contineri: Attamen Magistri, Vicarij, Gardiani, Custodes, Priores, Ministri, & alij fratres dictorum ordinum & locorū ac Conuentuum eorūdem, suis terminis, concessionibus, constitutionibus, & priuilegiis non contenti, sed eis etiam notoriè abutendo, & matricibus &

catholicis Ecclesiis, etiam parrochialibus per vniuersum orbem longè latèque constitutis, ac earum prælatis, rectoribus, curatis, & ministris, aliisque personis Ecclesiasticis, tam secularibus quàm regularibus, graues & enormes iacturas inferendo, ac eas & eos vituperando & deprimendo, ipsisque ac eorum tam verbo quàm facto in exaltationem propriam etiam publicè detrahendo, ac eorum iura vsurpando, & aliàs indebitè nequiter & temerè versando, varios & innumeros abusus, abusiones & excessus in diuersis locis commiserunt, committere præsumpserunt & præsumunt, & maximè de & super inferiùs declarandis,

Dicit siquidem & proponit, quòd fratres Ordinum prædictorum, tã maiores, quàm minores, & cuiuslibet eorum, à multis annis præteritis, & per ipsos annos & menses singulos eorundem, in singulis ciuitatibus, diocesibus, & parrochiis totius Christianitatis, ad quos pro prædictis vel eorum aliquibus exercendis temporaliter habuerūt & habebant recursum, dum & quotiens & prout casus emerferunt & emergebāt, excesserunt & excedebant, abusi fuerant & abutebantur, & abutuntur, & excedunt nimis & temerè, & præsertim in & super infra scriptis.

Et videlicet , quod quamuis in eorum sermonibus & prædicationibus, & alibi debuissent & deberent abstinere à proponendo , proferendo & dicendo aliqua , quæ audientes à solutione decimarum & iurium Ecclesiis debitorum retrahere vel aliorum animorum corrumpere seu mouere possent seu haberent , ac verbo aut opere audientes huiusmodi ad prædictorum solutionem informare excitari aut exhortari debuissent & deberent; ipsi tamen religiosi totum oppositum facere , ac in Ecclesiis parochialibus etiam non vocati & sine licentia Curatorum & beneplacito, & etiam illis & pluribus horum & locis, quibus Prælati, Ecclesiastici , quibus id de iure communi competere dignoscitur , prædicare vel facere prædicari coram se noluerunt & nolebant, & frequenter in locis propinquis huiusmodi Ecclesiis indetractionem & opprobrium Prælatorum, Curatorum , & ut ab eorum prædicationibus & officiis subditos & parochianos abstraherent , & ad suos sermones attraherent , parochianosque eorum & totum populum contra eorum Prælatos & Curatos commouerunt & indies commouent causâ quæstus, & ad ostentationem potius quàm pro salute animarum,

& aliàs in casibus eisdem fratribus non permissis ad prædicandum clero & populo temeritate propria ac licentia super hoc non obtenta etiam non petita, & etiam contra voluntatem & inhibitionem Prælatorum, & Curatorum Ecclesiasticorum, & aliàs temerè prorumpere, ac Prælatos & Curatos ipsos sic & in aliis suis officiis, prædicationibus & sermonibus impedire præsumpserunt & præsumunt.

Et cum debuissent & deberent in sermonibus & prædicationibus suis astantes & audientes informare & instruere de & super fide Catholica & articulis eiusdem, ac de Ecclesiasticis sacramentis & aliis tendentibus ad salutem animarum, ipsi fratres non quærentes quæ Dei sunt, sed pecuniariis quæstibus inhiantes, frequenter parùm attenti salubribus dogmatibus & doctrinis ad confabulationes, adulationes, etiam interdum immiscendo errores & abusiones, ac varias & reprobas doctrinas, prorumpunt, personas nobiles & potentes maximè ad eorum fraternitatem inducere, & earum nomina inrotulare & scribere, ac participationem omnium bonorum factorum & fiendorum in ipsis orationibus promittere in morte & in vita, & personas

quamplurimas in suis iniquitatibus & reprobis actibus, & eorum facta reprobata sub quibusdam verborum palliationibus sustinere, ac adulatoriis, deceptoris, & subtilibus, ac perniciosis persuasionibus, & inductionibus Parrochianos & subditos vtriusque sexus Ecclesiarum etiam Parrochialium ad elargiendum de bonis suis temporalibus, tam in vita, quam in testamentis & aliis ultimis voluntatibus, & aliis sub diuersis & variis coloribus, fratribus & ordinibus supradictis, & ad eligendum etiam cum iuramento & votis & fidei datione, sepulturas in eorum Ecclesiis, cimiteriis & locis, etiam cælum & saluationem animarum promittendo, & eorum peccata super se recipiendo, & ad recurrendum ad fratres dictorum ordinum pro confessionibus & Ecclesiasticis sacramentis, & suas parrochiales Ecclesias & eorum Curatos relinquendum & contemnendum, nec non iuuenes etiam impuberes præcipuè diuites, vt quos sperant magnas diuitias habituros, eorum parentibus & amicis insciis ac renitentibus & inuitis, ad ingrediendum & profitendum ordines supradictos, singuli, vt videlicet in suo ordine contra canonica instituta, nec eosdem in-

tra annum probationis existentes ordinem eorum exire permittunt, ac ad dandum & erogandum dictis ordinibus vsuras, & alia malè acquisita allicere, inducere, imò verius seducere; ac quod dantes eisdem ordinibus vsuras & malè quæsitæ, etiam pro decimis & iuribus Ecclesiis parrochialibus per parrochianos & debitores eorum subtractis, tam personalibus quàm realibus, supra memoratis fratribus seu ordinibus ipsis aut aliquid erogantes siue soluentes huiusmodi liberationem consequantur, etiamsi illos quibus restituenda sunt non ignorent, & à peccatis his contractis dantes & soluentes huiusmodi absque satisfactione alia qualicùnque absolvere, & quod etiam benefactoribus dictorum ordinum maiores sunt concessæ indulgentiæ à summis Pontificibus & aliis Prælati quàm veritas se habeat, sepultosque apud eos maiora consequuturos suffragia ac maiores indulgentias, & maioris fuisse & esse meriti apud eos, quàm in matricibus Ecclesiis parrochialibus seu alibi sepeliri, ac eis quàm aliis, & suis quàm aliis Ecclesiis erogare, donare & legare in derogationem & gratuam iacturam Ecclesiarum & aliarum matricum & Parrochialium & ecclesiastica

rum personarum, & alias temerè asserere, constanter prædicare etiam publicè, & iuvenes, sicut præfertur, deceptos ad diuersa, & à parentibus & amicis eorum remota loca, ne à parentibus & amicis eorū ab ipsis ordinibus extrahantur, seu repetātur, transmitters, cōseruare & inuitos retinere, & eisdem parentibus & amicis occultare nequiter præsumpserunt & præsumunt.

Item multi & fere omnes dictorum Ordinum fratres, maximè Presbyteri, etiam per suos superiores non electi; & locorum diocesani non præsentati, & per ipsos diocesanos non admissi, & ad hoc etiam inhabiles & ignari atque insufficientes & sine licentia & beneplacito diocesanorum locorum & præter & vltra præsentatos per suos superiores ad hoc non admissos, & sub vmbra sic electorum præsentatorum & ad hoc admissorum, & in cauernis & latebris & locis occultis latentibus & inhonestis confessiones sibi volentium confiteri audire, & pœnitentias iniungere, & multa inhonesta sub tali colore committere, & sic confitentes etiam à sententiis maioris excommunicationis, & tam auctoritatibus ordinariarum, sedis Apostolicæ legatorum, quàm delegatorum & subdelega-

torum iudicum executorum & subexecutorum etiam auctoritate Apostolica deputatorum & Canonum etiam pro violentis manuum iniectionibus factis in personas Ecclesiasticas constitutionum seu statutorum etiam prouincialium Synodaliū seu aliās localium, & in his casibus etiam Prælati maioribus, & sedi Apostolicæ reseruatis, & aliis indifferenter vbi eis non licuit nec licebat de facto absoluere: & sic confitentes, ipsorumque animas subdole decipere etiam propter quæstum pecuniarum præsumpserunt damnabiliter & præsumunt, sicque per mundum discurrentes & quæstus magnos facientes & congregantes, & animas decipientes, & quascunque sententias seu censuras Ecclesiasticas fratres ipsi seu eorum loca inciderūt, siue à iure, siue ab homine, latas, ab huiusmodi sententiis & censuris Ecclesiasticis mutuò se absoluunt, & prætendunt & iactant se habere, vt in his, Apostolicam etiam auctoritatem seu potestatem.

Prætereà fratres ordinum prædictorum considerantes quod Prælati & Curati consueuerunt in pœnitentiis iniungendis qualitates personarum & peccatorum circumstantias & alia circa hoc attendenda atten-

dere & debite ponderare, & his attentis pœnitentias iniungere salutare, vt parochianos à confitendo suis Curatis & propriis sacerdotibus abstrahant, & ad confitendum fratribus dictorum ordinum attrahant, leues & pecuniarias eis pœnitentias, & ad erogandum fabricis & structuris Ecclesiarum, fenestrarum & ædificiorum, locorum suorum & subuentionibus fratrum ipsorum nonnullos etiam volentes aliter & alibi suas eleemosynas facere sibi confidentes inducunt ad conuertendum easdem eleemosynas in vsus & ad opus ordinum prædictorum, ac sic homines & per leuium pœnitentiarum impositionem ac blanditias, & alias verbo & facto induxerunt & inducunt ad eligendum confessores de fratribus ordinum prædictorum, ac prædicare & asserere præsumpserunt & præsumunt quod melius, expeditius, eligibilius & securius est fratribus dictorum ordinum & in locis ipsorum, quàm Curatis propriis vel aliis sacerdotibus in Ecclesia eorum parrochiali confiteri. Et propterea parrochiani obmiserunt & obmittunt etiam semel in anno secundum statutum Concilij generalis, *Omnis utriusque sexus*, propriis sacerdotibus confiteri, & recurrerunt &

recurrunt ad fratres dictorum ordinum pro prædictis & aliis, & dixerunt, vt communiter dicitur, quod melius forum habebunt de pœnitentiis à fratribus quàm ab eorum Curatis, & etiam prouidè præfati parrochiani peccare & peccata, crimina & excessus etiam graues seu grauia committere minùs curant & nullatenus erubescunt nec abhorrescit. Dictique fratres, præsertim ad audiendum confessiones, vt dicitur, deputati, asseruerunt & asserunt se habere tantam seu maiorem potestatem & auctoritatem in confessionibus audiendis, pœnitentiis iniungendis, & absolutionibus impendendis in foro pœnitentiali, quàm habent Episcopi siue diocesani etiam in casibus eis reseruatis in periculosam deceptionem animarum, & adeò passim & sine delicto à sententiis, & censuris Ecclesiasticis quibuscunque absoluunt de facto, quod iurisdictio & censura Ecclesiastica & neruus Ecclesiasticæ disciplinæ parui penduntur, & non habentur, sicut deceret, in reuerentia & honore neque timore: & sic fuit vt est dictum, habitum & reputatum ac verum & notoriũ, ac pro vero & notorio habitum & reputatum palam & notorie.

Item, fratres dictorum Ordinum sæpissimè prætendentes corpora seu cadauera decedentium maximè diuitum parochianorum vtriusque sexus Ecclesiarum parochialium, & præsertim quos prætendunt de eorum fraternitate fuisse, vel apud eorum Ecclesias sepulturas elegisse, licet ad hoc per eos vt impedire consueuerunt, & impediunt ne huiusmodi defunctorum corpora ad suas parochiales Ecclesias, etiamsi hoc fuisset per ipsos defunctos in vita sua dispositum, seu aliàs de consuetudine fieri deberet, deportentur. Quinimò corpora defunctorum cum omnibus funeralibus etiam violenter rapere, & cum omnibus funeralibus ad suas deportare Ecclesias, & parochiales Ecclesias & earum Curatos ei spoliare & eisdem rectoribus & Curatis iniurias & violentias inferre, & etiam de electione & fraternitate prætensa huiusmodi nulla fide facta, licet sit petitum, necnō etiam frequenter temporibus interdictorum publicè & nominatim excommunicatorum & interdictorum & manifestorum vsurariorum & aliorum carere debentium Ecclesiastica sepultura in suis Ecclesiis & cimiteriis etiā scienter sepelire, ac quartam partem emo-

lumentorū exinde prouenientium Ecclesiis parrochialibus ac earum Rectoribus & Curatis debitam iniuste & per fraudes & machinationes, etiam legata & donationes reuersura aliis personis ab eis procuratis, subrogatis & submissis in fraudem & diminutionem fieri quartæ procurando ac coloribus exquisitis diuersis aliàs diminuerē & vsurpare præsumperunt & præsumunt: & de ea integre satisfacere requisiti & debite interpellati recusauerunt & recusant, & maxime quando corpora fuerunt primò ad suas parrochiales Ecclesias deportata. Et si interdum aliquid timore quartæ huiusmodi soluerunt, quod rarò contigit, ipsam quartam diminuunt & sibi retinent & defalcant pro libito voluntatis. Et si quandoque aliquid soluerunt de prædictis, hoc non absque magna difficultate exigitur ab eisdem, ac prædictorum occasione Ecclesiæ parrochiales & eorum Rectores & Curati multa damna sustinere & sumptus graues & expensas facere habuerunt & habent, & propter culpas, derogationes, substrationes & malitias fratrum Ordinum prædictorum, ac fraudes & procuraciones multiplicatas quartam huiusmodi oblationes & alia iura
parrochialia

parrochialia Ecclesiarum parrochialium occupare, diminuere, vsurpare & sibi retinere: & dum Prælati, Rectores & Curati ipsarum Ecclesiarum vel alij super recuperatione iurium, vel propter alias iustas causas fratres dictorum ordinum impetunt, vel querelas contra eos deferunt, fratres huiusmodi aliquando per suos Conseruatores, & interdum per Inquisitores hæreticæ prauitatis de suis ordinibus existentes procurauerunt, & fecerunt, procurant & faciunt querelantes huiusmodi & alios eis in aliquo displicentes ad loca remota trahi, & vbi possunt ad magis propinquiora conueniri ad maiores fatigationes, & taliter fatigari, & fatigationibus affici & vexari, quod ipsi habuerunt & habent necesse, vel iuri suo cedere, vel damnosas inire pactiones, aut ipsorum fratrum se submittere voluntati, & eos grauitè affligunt & damificant laboribus & expensis, ac indebitè & iniuste.

Item, & tempore interdictorum etiam ianuuis apertis & præsentibus excoimunicatis & interdictis, & eis propter quorū crimina sunt apposita interdicta, missas & alia diuina officia celebrare, & prædictos ad Missas & diuina officia & Ecclesiastica sa-

cramenta admittere, etiam in casibus non permissis à iure, scienter præsumpserunt & præsumunt, nec interdicta legitimè prolata seruant, licet viderint & sciuerint Ecclesias Cathedrales & matrices idem interdictum obseruare, & alias in suis ordinibus, & aliis supradictis tangentibus malè versati fuerunt & versantur. Quodque ordines & fratres prædicti per præmissa & eorum prætextu impugnati vsurpatione iurisdictionum & iurium Prælatorum, Rectorum & Curatorum prælatorum, & Ecclesiarum prædictarum, & commodis seu emolumentis temporalibus in prædictis prouenientibus plurimùm inhiantes domos, Oratoria, Collegia & Cōuentus personasque Ordinum suorum per mundum multiplicauerunt & dilatauerunt, adeò quod ipsorum multitudo est importabilis, & nimium onerosa, & Ecclesiarum matricum & parrochialium iurium & iurisdictionum prædictarum destructio & ruina, & nimis damnosa eisdem, ac pro præmissis per importunitatem & licentiàm indulta à Sede Apostolica, vt dicitur, impetrarunt subrepticè & dolosè de facto.

Item Inquisitores & pœnitentiarios fieri & creari, & ad diuersa officia habentia sti-

pendia, lucra & emolumenta temporalia, & propter stipendia & emolumenta huiusmodi & eorum occasione se promoueri, ac Missas eorum in certo numero & ad certum tempus & pro certis pecuniariis summis contra professionem eorum vendunt, & pecunias exinde percipiunt, & exinde extortis & congregatis magnis lucris & pecuniarum summis, ac etiam per importunitates & subtilitates suas & alias iniuste & indignè se ad praelaturas procurarunt & procurant promoueri, ac fecerunt & faciunt per alios procurari, & in commissis sibi officiis etiam potestatem eis datam & fratres eius excedendo, & aliis multis modis se malè & perperam gesserunt & gerunt. Quodque prædicta & eorum singula fuerunt & sunt manifesta vera & notoria, & pro veris & notoriis habita reputata palam & publicè, ac de & super prædictis fuerunt & sunt præfati fratres & ordines publicè & apud bonos & graues personas meritò diffamati, ac de & super præmissis fuit & est communis opinio, reputatio, credulitas & publica vox & fama. Et quod Magistri, Vicarij, Gardiani, Ministri, Priores, & Custodes, Officiales, ac singuli Conuentus, & fratres singulares Con-

uentuum ordinum prædictorum de prædictis omnibus & singulis habuerunt, potuerunt, dixerunt, asseruerunt, confessi fuerunt & sunt notoria, non solum non resistere curauerunt, sed & ea tacite ac expresse approbarunt, ac fratres prædicta committentes receptauerunt, confouerunt in prædictis, & sustinuerunt, ac præmissa facere permiserunt, voluerunt, procurarunt, & fecerunt, & ea etiam nomine & ad instantiam & procuracionem eorum facta rata & grata habuerunt, & se habere dixerunt.

Cùm verò dictas constitutiones, concessionem, priuilegia, & alia indulta prætenso statui eorum & professioni, super quibus, vt asserunt, fundati sunt repugnantia & aduersa ex causis præmissis & aliis diuersis rationibus, sana non potuerunt retinere conscientia seu eisdem gaudere & vti fratres prædicti. Petit ergo & supplicat per vos Reuerendissimos Patres prædictos & vestram sententiam pronunciari, decerni & declarari vsum & omne exercitium concessionum, constitutionum & priuilegiarum prædictorum ipsis ordinibus & fratribus eorundem in & super confessionibus audientibus, pœnitentiis iniungendis, absolutionibus impendendis, sepulturis parrochianorum

parrochialium Ecclesiarū habendis, & corporibus sepeliendis, ac prædicationibus & sermonibus in præiudicium Ecclesiarum prædictarum, & detractionibus illicitis in vituperium & scandalum & diminutionē honoris Prælatorum, Rectorum, Vicariorum seu Curatorum, & aliorum præmissorum faciendis, quibus, ut præmittitur, & per prædicta se reddiderunt indignos, interdiciendum fore perpetuò & interdicti ac eis inhibendum fore & inhiberi ne actibus huiusmodi uti præsumant, ipsiſque non licuisse nec licere prædicta fecisse & facere, ac excessus & actus prædictos fuisse & fore abusuos, perniciosos, excessiuos, temerarios, iniquos & iniuriosos, ac propterea dictos fratres fuisse ac esse ac se effecisse & reddidisse indignos, ac priuandos fuisse & fore priuari & nudari huiusmodi privilegiis & concessionibus tam à iure, etiam per constitutionem, *Super cathedram*, siue, *Dudum*, quàm alias etiam per indulta Apostolica quæcunque prætenſa, & qualitercumque sibi super præmissis concessis seu factis, ac eas & ea debuisse & debere amississe & amittere & eorum Ecclesias & cimiteria interdicta & eosdem fratres sententiis contra tales à iure promulgatis fuisse &

fore ligatos, & vsque ad condignam satisfactionem sic ligatos publicè nunciandos & nunciari, & ad satisfaciendum prædictis Ecclesiis, in matricibus & parrochialibus & earum Prælati & Rectoribus & Curatis de & super quartis & aliis iuribus emolumentis prædictis quatenus ipsos tangunt, dictaque priuilegia, concessiones, constitutiones & indulta cassanda, irritanda, annullanda, reuocanda, & omnino tollenda fore, cassari, irritari, annullari, reuocari & sublata nuncianda fore ac publicè nunciari: & ad emittendum extra prædictos ordines & abire ad solutionem redire permittendum liberè iuuenes prædictos, vt præmittitur, per eos deceptos, consuratos, seductos & retentos, & eorum parentibus & amicis exhibendum assignandis & restituendis, ac ad cauendum idoneè quod talia de cætero nõ debeant attentare cõdemnandos & compellendos fore condemnari & compelli, & extrauagantem quæ incipit, *Vas electionis*, declarandã & moderandam, ac moderari, & declarari, & de ea disponi, pro Ecclesiarum parrochialium & Prælatorum ipsarum utilitatibus & iurium conseruatione ac cõmodo subditorum & profectibus animarum ipsorum visum fuerit expedire, & fieri

222
vltcrius in præmissis, & circa ea quod fuerit
opportunū. Et prædicta dicit & proponit,
dicit & diuifim ac omni modo, iure, forma
& caufa quibus melius poteft, & cum dam-
nis & expenfis factis & infuper faciendis, &
alias fuper præmissis veftrum Reueren-
dum officium implorando, faluo iure cor-
rigendi, &c.

EXPLICIT.

*Ex Thoma Vvalfinghami Historia
Anglicana.*

ANno gratiæ millefimo trecente-
fimo quinquagefimo octauo, qui
eft annus regni Regis Edvvardi à
conqueitu tertij tricesimus fecundus, im-
mediatè post feptuagesimam tenuit Rex
Angliæ Parliamētum apud Vveft mona-
fterium, vbi de pace reformanda inter duo
regna, per fapè colloquentes, nusquam
concordarunt. Quo quidem tempore ma-
gna controuerfia coram summo Pontifice
facta eft inter Magiftrum Richardum La-
tinè filium Radulfi Fizrauf, Primatem hi-
bernix Armachanum videlicet, & Cle-
rum Anglicanum ex vna parte, & quatuor

Ordines Mendicantium ex altera, super statu & regula eorundem fratrum. Qui videlicet Armachanus opiniones suas erga fratres coram summo Pontifice diu pluresque sustinuit, & ipsos manifestè à suis deuiasse regulis multis rationibus demonstrauit. Sed tandem (proh dolor!) Clero Anglicano sibi subtrahente promissa, & exuberante in curia fratrum satis magna pecunia, adhuc lite pendente, Fratres sua priuilegia sicut per ante sub data noua obtinuerunt.

FINIS.



De Cleonville, Avertissement aux
provinces sur les nouveaux
mouvements du Royaume 227
no. 1

Richardus Archiepiscopus Arma-
chanus Hyberniae Primas ~~no~~ De:
feriorum Curatorum no. 2

~~Fridericus Abbas, Teironium de~~
~~Richardus Archiep. Armachanus~~ no. 3

VINE

De
... ..
... ..

... ..
... ..
... ..
... ..
... ..